

რამაზ სურმანიძე

ყადირ შერვაშიძე

თბილისი
2001

აგტორისაგან

შერვაშიძეთა გვარს ერთი იმ იშვიათთაგანია, რომელმაც აქარის თავზე დატეხილი ყველა ისტორიული მოვლენა თავის მსრებზე გადაიტანა და ღირსეული კვალი დატოვა სამხრეთ საქართველოს განთავისუფლებისა და აღდგენა-აღორძინების მატრიანეში.

შერვაშიძეთა გვარმა მრავალი ღირსეული შვილი მისცა საქართველოს. ჩვენ შეძლებისდაგვარად მხოლოდ აქარელ შერვაშიძეთა წარმომადგენლებს შევებებით, განსაკუთრებით კი მკითხველის ყურადღებას შევაჩერებთ ყადირ-ბეგ შერვაშიძეზე, რომლის ხანმოკლე, მრავალი ფაფერაკებითა და რომანტიზმით აღსავსე ბიოგრაფია ამას ნამდვილად იმსახურებს.

ფაქტების სიზუსტისა და მათი აღქმის გაადვილების მიზნით ნიკნს დაეურთეთ ჩვენს ხელთ არსებული ზოგი ფოტოსურათი, რომლებიც მოხსენიებულია ტექსტში, ავრთოვე ზოგი საარქივო დოკუმენტი, რომლებიც მეტნაკლებად ასახავს შერვაშიძეთა დიდი ოჯახისა და პირადად ყადირ-ბეგ შერვაშიძის ცხოვრების ეპიზოდებს.

ამიერკავკასიის სეიმის წევრის, საქართველოს დამოუკიდებელი რესპუბლიკის დამფუძნებელი კრების მონაწილის, ქართული ცხენოსანი დივიზიის მეთაურის, პოლკოვნიკ ყადირ-ბეგ შერვაშიძის ცხოვრება-მოღვაწეობის შესწავლა და გამომხეურება საბჭოთა ცენზურის მხრიდან გარკვეულად შეზღუდული იყო.

პირველი წერილი სამოციანი წლების დასაწყისშივე დაინერა. მაგრამ მისი გამოქვეყნება მხოლოდ 1967 წელს, დაბადებიდან 80 წლის-ოაზე მოხერხდა. ამის შემდეგ 30 წლის განმავლობაში ვრძელდებოდა გამოკვლევები და დაკვირვებები, რომლის შედეგადაც მომზადდა ეს წიგნი. მიუხედავად ამისა ის სრულყოფილად არ მიგვანჩნია, ამიტომ ყველა შენიშვნასა და განხილვებულ მოსაზრებას, იუ ის დასაბუთებული იქნება, სიამოვნებით გავიზიარებთ.

16 მარტი 1998 წ.
ქ.ბათუმი

რედაქტორი: აბოლ ხუციშვილი

გვარის ისტორია

ენათმეცნიერთა აზრით შერვაშიძე ერთ-ერთი უძველესი ქართული გვარია და თითქოს შარვანშაჰებიდან მოდის. იგი დაფიქსირებულია თამარ მეფის პირველი ისტორიკოსის თხზულებაში (აფხაზეთის ერისთავი დაღათი და ცხუმის ერისთავი ოთალო შარვაშიძე). რუმის სულტანის ყიასდინის მხარეზე ჯარების მოაგარსარდალი “შარვაშისძე აფხაზი დარდინი“ იბრძოდა, რომელიც თათრებთან შეტაკების დროს დაიღუპა.

ამგვარად ეს გვარი მე-13 საუკუნიდან გვხვდება და ძალზე პოპულარულია საქართველოში. ზოგი ავტორი ერთმანეთთან აიგივებს შარვაშიძესა და შარაშიძეს, ასევე თვლის, რომ შერვაშიძე და ნანბა, ანჟა, ანნაბაძე იდენტიურია. სკენი აზრით, შერვაშიძე მხოლოდ შარვაშიძის იდენტიურია. 1996 წლის მონაცემებით საქართველოში 816 შარვაშიძე ცხოვრობდა, ხოლო შერვაშიძეთა რიცხვი ამ დროისათვის 1092-ს აღწევდა.

შერვაშიძეთა გვარის ბუდეადგილად, დღემდე აფხაზეთია მიჩნეული, რადგან ამ გვარის წარმომადგენლებს სამთავროს გაუქმებაშივე ეპყრათ აფხაზეთი და მისი მთავრები იყვნენ. საყურადღებოა, რომ ერთხანს შერვაშიძეები მთლიანად ფლობდნენ საქართველოს ზღვისპირა ზოლს, ხოლო საპორტო ქალაქებში, ბათუმსა და ფოთში ბეგლარ ბეგებად სწორედ ამ ოჯახის შვილები იხდნენ.

შერვაშიძეებს ტრადიციული ნათესაობა ჰქონდათ გურიის მთავრებთან და აჭარელ თავადებთან. მამია მესამის (გარდ. 1717 წ.) შვილს გიორგი IV გურიელს (1717-1726) ცოლად ჰყავდა შერვაშიძის ქალი მარიამი, ხოლო ლევან გურიელის შვილს გიორგის მიხეილ შერვაშიძის ასული ანა.

აფხაზეთის მთავრების, შერვაშიძეების და აჭარის წარჩინებული გვარის თავდგირიძეების თუ სხვა გვარების ნათესაურ ურთიერთობაზე მეტყველებს საქართველოს კ.კმკელიძის სახ. ხელნაწერთა ინსტიტუტში დაცული ერთი დოკუმენტი, რომელშიც ვკითხულობთ:

“ამა ქორანიკონსა (1744 წ.რ.ს) მოიყვანა თავდგირიძემ გიორგი შარვაშიძის ქალი. აღდგომა და ხარებაი სწორა იყო. კინტრიშს სასახლეში ქორწილი იყო. ფაშათ ერთი ძმა იყო შარვაშიძე რიონისა და ჭანეთის რიზინს (რიზეს, რ.ს.) ამოღმა. მეორე ძმას

ბათუმის ბეგობაი ქონდა და მესამეს სოხუმის ბეგობაი ქონდა“ (- კოლექცია, საბ. №1700).

ამგვარად ამ საბუთით დასტურდება, რომ 1744 წელს ქობულეთის ერთ-ერთ ბეგს თავდგირიძეს ცოლად შეურთავს აფხაზეთის მთავარის გიორგი შარვაშიძის ქალი. ეს ქორწინება შემთხვევითი არ იყო, რადგანაც დასავლეთი საქართველო რიზემდე შარვაშიძეთა მორჩილებაში ყოფილა. კერძოდ რიონს (ე.ი.ფოსს) და რიზეს შორის ტერიტორიას შერვაშიძეთა ერთი ძმა ფლობდა (უაშად იყო), მეორე ძმა ბათუმის ბეგი, ხოლო მესამე სოხუმის ბეგი იყო. გამორიცხული არ არის, რომ გვარის სწორედ ასეთი აღზევების დროს გადმოსახლებულიყვნენ აფხაზი დიდებულები აჭარაში, კერძოდ ქედისა და ხელვანაურის რაიონებში. ამჟამად აქ ყველა შერვაშიძის გვართ იხსენიება. მათი რიცხვი ბათუმში 184 სულაია, ხელვანაურში - 190, ქედაში 152. გამონაკლისია, შუახევის რაიონის სოფელი წაბლანა, სადაც რამდენიმე ოჯახი შარვაშიძედ იწოდება. საკურადღებოა, რომ 1805-1809 წლებში ბათუმის ბეგი და გარნიზონის უფროსი ქუნუკ-ბეგ შერვაშიძე იყო.

კავკასიის რუსულ ხელისუფლებას მაშინ მოლაპარაკება ჰქონდა ქუნუკ-ბეგ შერვაშიძესთან, რათა ნაებარებიინა ბათუმის ციხე, რომელსაც დიდ სტრატეგიულ მნიშვნელობას ანიჭებდნენ. ამის საფასურად მას დიდ ტიტულებს და ქრთამს სთავაზობდნენ, მაგრამ ბეგს უარი განუცხადებია. როცა რუსეთის სარდლობას იმედი გადაეწურა, ტერორზე გადავიდა. 1809 წელს ქუნუკ-ბეგის ძმასთან ერთად მოუკლავთ, ხოლო 1810 წლიდან მის ადგილას ლაზი ომარ-ალა ჟორდანიას დაუნიშნავთ (ქ.ჩხატარაიშვილი. გურიის სამთავროს შეერთება რუსეთთან, თბ, 1985, გვ. 28,36).

ჩანს, შერვაშიძეთა გავლენა ბათუმზე არც ამის შემდეგ შეწყვეტილა. 1811 წლის 3 ნოემბერს გენერალი სიმონოვიჩი მთავარმართებელ მარკიზ პაულინს წერს: “თავადი, პოლკოვნიკი მანუნარ შერვაშიძე (იგი სამურზაყანოს მმართველი იყო) ცდილობს ბათუმი ჩვენს ხელისუფლებას გადასცეს მისი ნათესავის თავად სოსლან-ბეგის მეშვეობით, რომ ბათუმის მცხოვრებლები მინვეულნი არიან ჰყავდეთ მმართველი შერვაშიძეთა გვარიდან“ (Акты, том V, 1873, გვ.181). სოსლან ბეგ შერვაშიძე ბათუმის კომენდანტად სჩანს 1811-12 წლებში. სხვადასხვა დროს ამ თანამდებობაზე იყვნენ ქუნუკ-ბეგი, ქელეშ-ბეგი, მეჰმედ-ბეგ შერვაშიძეები.

ამგვარად, აჭარელ შერვაშიძეთა აფხაზეთიდან გადმოსახლების რამდენიმე სარწმუნო საბუთი არსებობს და ეს ფაქტი თითქოს ეჭვს არ უნდა იწვევდეს.

ბუნებრივია, ამ გვარის ყველა წარმომადგენელი, სადაც არ უნდა ცხოვრობდეს იგი, თავის წარმომავლობას აფხაზეთს უკავშირებს მაშინაც კი, როცა ამის დამადასტურებელი რაიმე ისტორიული საბუთი არ არსებობს. ეს აზრი იმდენად დამკვიდრებული და ტრადიციულია ქვეული, რომ მკვლევარებს აღარც კი უცდიათ შეესწავლათ სხვა მეცნიერული ვარიანტები, მიუხედავად იმისა, რომ არის ამ გვარის სხვა ქართულ პროვინციებში ძველ-თაგანვე არსებობის დამამტკიცებელი არგუმენტები.

ამ მხრივ გამონაკლისია ბატონ იაკობ ახუაშვილის დამაჯერებელი ნარკვევი, რომელიც მან გაზეთ დედა-ში გამოაქვეყნა (№5, მაისი, 1997, გვ. 8).

ავტორი კატეგორიულად აცხადებს, რომ “შარვაშიძეები ქართლები არიან” და ეს ფრაზა სათაურადაც გამოაქვს. ნარკვევის შესავალში უარყოფილია ამ გვარის რაიმე კავშირი შარვანშაჰებთან, ასევე ჩანბა-ანჩაბაძესთან და ნათქვამია, რომ შერვაშიძე (შარვაშიძე) “სადაურობის მიხედვით ნაწარმოები გვარია“. ამის დასადასტურებლად ი.ახუაშვილი იმომეებს მის მიერვე მოკვლეულ “შარვაშიძეთა საგვარეულო სიგელს“ და სხვა წყაროებს. ამ მასალებზე დაყრდნობით დასტურდება, რომ შარვაშიძეები ცხოვრობდნენ თეგამის (თეძამის) ხეობაში. აქ ისინი მოსულან არა აფხაზეთიდან, არამედ “სხვა მხარიდან“ “დროსა გიორგი მეფისასა ქრისტეს აქეთ წელსა 1325-სა, რომელმაც მიიღო კარგად და უბოძა ადგილნი თეგამის (თეძამის) ხეობასა ზედა არიან მუნიდგან. ხოლო დროსა მეფისა ირაკლისასა უმეტეს წარჩინებულ იქმნა ელიზბარ შარვაშიძე, რომელიც დროსა ნადირშაჰისასა თანა წარყვა მეფე ირაკლის ინდოეთსა და ახლდა მუნ და ოდეს მუნიდგან მოვიდა მეფე ირაკლი და შეაერთა ქართლი და კახეთი, მაშინ იყო იგი არაგვის ერისთავის მოადგილედ და აგრეთვე უბოძა მოლარეთუხუცესის ხარისხი და აწ არიან მისი შთამომავლობანი ორ სახლად: 1. მალაქიასშვილი და 2. ივანესშვილი“. (იოანე ბატონიშვილი, შემოკლებით აღწერა საქართველოსა შინა მცხოვრებ თავად-აზნაურთა ოჯახებისა, რომლებიც შეტანილ არიან გეორგიევსკის 1783 წლის ტრაქტატსა შინა. ციტირებულია ი.ახუაშვილის წერილიდან).

რაც შეეხება გვარის ეტიმოლოგიას, ი.ახუაშვილი თვლის, რომ იგი გეოგრაფიული სახელიდან, შერვაშეთი-დან ნაწარმოები გვარია. ასეთი ტოპონიმი- შარვაშეთის მთა (ვახუშტი) მართლაც არის შიდა ქართლში. ჯავახეთის საზღვარზე. აქვეა წმიდა გიორგის ეკლესია შერვაშეთისა. სხვათაშორის, თამარ მეფის კარზე სხვა საგვარეულოებთან ერთად მოიხსენიება შარვაშეთის სახლიც და ა.შ.

ამგვარად ბ-ნ იაკობ ახუაშვილის დასკვნით შერვაშეთეები ქართლში მოსულან არა აფხაზეთიდან, არამედ “სხვა მხრიდან“ და შემდეგ გადასახლებულან აფხაზეთში, აქედან გურიაშიც: “შარვაშიძე გურიაში მოვიდა აფხაზეთიდან“ (ვახუშტი). გურიაში და ქართლში მცხოვრებ შერვაშეთეებს იოანე ბატონიშვილი ერთ შტოდ თვლის, რაც განამტკიცებს ი.ახუაშვილის მოსაზრებას დასავლეთ საქართველოში შერვაშეთეა ქართლიდან მიგრაციის თაობაზე: “ხოლო ამათნი... გვარნი რომელნიმე სახლობენ გურიასა თავადად და სხვანი ქართლსა შინა“.

მეცნიერების დამსახურებული მოღვაწე პროფესორი ვლადიმერ შარვაშიძე თავს ქართლელ შარვაშიძეთა შთამომავლად თვლის. მისი მეუღლე ნელი კოპალიანი იგონებს ბონდო შარვაშიძეს, რომელიც სწავლობდა გვარის ისტორიას და თავს შიდა ქართლელად თვლიდაო-ამბობს ი.ახუაშვილი.

ამგვარად, როგორც ზემოთ აღვნიშნე, ეს ცნობები საკმაოდ დამაჯერებელია, მაგრამ, სამწუხაროდ, მათში არაუფერია ნათქვამი აჭარულ შარვაშიძეებზე. ასევე გასარკვევია ქართლში რომელი “სხვა მხრიდან“ მოვიდნენ ამ წარჩინებული გვარის წარმომადგენლები.

ამ მხრივ ყურადღებას იქცევენ შუახევის რაიონის სოფელ წაბლანაში მცხოვრები შარვაშიძეები, რომლებიც მაინცდამაინც აფხაზეთიდან გადმოსახლებულად არ თვლიან თავს. ისინი წარმომავლობის დასახელებისას უფრო ტაო-კლარჯეთისაკენ იხრებიან.

სვენც ხელთა გვაქვს ორი საყურადღებო საბუთი, რომლებიც შერვაშეთეა ბუდე-ადგილად ადასტურებენ ტაო-კლარჯეთს და აქედან ამ გვარის მიგრაციას მოსაზღვრე პროვინციებში: აჭარაში, სამცხე-ჯავახეთსა და ქართლში.

ელქისედექ ყანაელის 1658 წლის ერთერთ საბუთში წათკვირია: “ბერშოეთს გლარჯაძეები მაისის ცხრასა ერთს ბატკანს

დაკლავდნენ თვისსა ალაგსა და მისს ჰურსა და ღვინოს და ხარჯავდნენ, ერთ მღუდელს ჟამს გვაწირვინებდნენ და შენდობით მოგვიხსენებდენ“ (თ.ხაჟომია, მეღქისედეკ ყანსაეღის 1658 წლის საბუთი. კრებული ქართული წყაროთმცოდნეობა, 1, თბილისი, 1965, გვ. 96-103). რატომ აკეობდნენ აქაური გლარჯადეები (კლარჯადეები) ამას? ამის გასარკვევად მკვლევარი თ.ხაჟომია ესაუბრა ბერშოეთელ დამახაზურებულ პედაგოგს ალექსანდრა ნებიერიძეს. მის ნაამბობზე დაყრდნობით მეცნიერმა გამოთქვა ვარაუდი, რომ ფორმა გვარისა გლარჯადეები იქნებ კლარჯეთს უკავშირდებოდესო. ამასთან ერთად მეცნიერი ეურადღებას ამახვილებს იმ ფაქტზე, რომ XVI-XVII საუკუნის საბუთებიდან ყანსაეღის საბუთი გამონაკლისია, სადაც ეს გვარი გლარჯადედ (კლარჯადედ) მოიხსენიება.

თ.ხაჟომიას ამ ფროთხილ ვარაუდს, წყენი აზროთ, უტყუარს ხდის მისივე ინფორმატორის ა.ნებიერიძის მონათხრობი: “კლარჯეთში (სამხრეთ საქართველო) ოთხ ძმას შერვაშიძეებს მამულის გაყოფის ნიადაგზე შექმნილი დავის დროს შემოკვდომიათ ერთ-ერთი, უფროსი ძმა. ამის შემდეგ, რაკი მათ თავის სამფლობელოში არ ედგომებოდათ, გადაცმულნი, ფარულად გადმოხვეწილან კლარჯეთიდან, ხანგრძლივი სავალი გზით გატანჯულნი, მდაბიოს სამოსში გახვეულნი, მისულან შიომღვიმის მონასტერში და მღვდლისათვის გაუნდვიათ თავიანთი საიდუმლო. მონასტრის წინამძღოლს ისინი შეუვრდომებია და ჩადენილ ცოდვის მოსანანიებლად, სამი წლის განმავლობაში, ყოველ დილა-სადამოს ლიტანია, მონასტრისათვის ჩოქვით შემოვლა და უვალეზია.

ამბობენ: დილით მზის ამოსვლისას და საღამოს, მზის ჩასვლის ჟამს მონასტრის ყრუ კედლებთან ხშირად შეინიშნებოდა დაჩოქილი სამი სილუეტო.“

სამი წლის შემდეგ მღვდელმთავარს მათთვის ცოდვა მოუხსნია, მონასტრის თავისუფალ მამულზე დაუსახლებია და იმ ადგილისათვის “ბერშოეთი“ უწოდებია (ახლანდელი გორის რაიონის, ზედდუღეთის საკრებულო). ხოლო ცოდვაგანტკეპებულ კლარჯელი ძმებისათვის ძველი გვარი შერვაშიძე შეუცვლია “კლარჯადედ“. ზემოთნახსენებ მაღაქიასშვილისა და ივანესშვილის მსგავსად შემდგომში ამ გვარმაც განიცადა სახეცვლილება და გლარჯადედ გადაკეთდა.

გლურჯიძეები დღესაც აქ ცხოვრობენ, გადმოგვცემს აქმულ-ება და კავშირს არ წყვეტენ შიო მღვიმის მონასტერთან. “ყველიერის ხუთშაბათი მონასტრის საეკლესიო დღესასწაულია. გლურჯიძეები ახლაც ღოცვას და შესაწირავს იხდიან და უამინდობის შემთხვევაში უსათუოდ წარმომადგენელს მაინც გაზენიან შიო მღვიმის მონასტერში“-ო.

მომდევნო საუკუნეებშიც (XV ს.) ტაო-კლარჯეთიდან ქართლში მოსახლეობის იძულებითმა მიგრაციამ მასობრივი ხასიათი მიიღო. სწორედ ამ პერიოდს მიეკუთვნება ტაო-კლარჯეთიდან, კერძოდ ფანასკერტიდან ბრძენთმოთავრის, მკურნალისა და დიდი მეცნიერის ზაზა ციცის ძე ფანასკერტელის გადმოსახლება ქართლში, ძამას ხეობაში.

საყურადღებოა, რომ ზაზა ფანასკერტელის ნათესაური ძაფები და მისი უკვდავი შემოქმედებითი ნააზრევის წერილობითი კვალი (ჩვენი მეორე ვერსია) აჭარისაკენ, კერძოდ, ქედისაკენ მოდის და სწორედ აქაურ შერვაშიძეთა ოჯახს უკავშირდება, რომლის ახსნა ჩვენ ვცადეთ მონოგრაფიაში (“მცირე კარაბადინი“, II, ბათუმი, 1990, გვ. 30-32). ეს წიგნი მთლიანად ძველი სამკურნალო ხელნაწერის ტექსტით და კომენტარებითაა წარმოდგენილი.

ამჯერად ჩვენთვის საინტერესოა ამ ხელნაწერის აღმოჩენის ისტორია და მისი მფლობელის ვინაობა.

გასული საუკუნის ბოლოს გამოქვეყნებული ქართული გაზეთებიდან ვიცოდით, რომ ქედის რაიონში არსებობდა რამდენიმე ძველი სამკურნალო ხელნაწერი, ერთი მათგანი აბდულ მიქელაძემ აღმოაჩინა სოფელ აგარაში და ზაქარია ჭიჭინაძეს გადასცა, (იხ. ჩვენი მცირე კარაბადინი, ბათუმი, 1974 წ). მეორე ხელნაწერის ძებნა ჩვენ გეხვდა წილად.

პირველი ინფორმაცია ჯერ კიდევ “მცირე კარაბადინის“ გამოქვეყნებამდე 1969 წელს მივიღეთ ჩემი ნათესავის ხელვაჩაურის რაიონის სოფელ თხილნარის მცხოვრებ 93 წლის ოსმან შერვაშიძისაგან. მისი თქმით, ქედის მაზრის უფროსის თუფან შერვა-

შიძის ბიძის, სეფერის ქალიშვილს ფემბას ჰქონდა ხელნაწერი, რომლითაც სამხვედროს (ბუასილს) მკურნალობდაო. მოხუცი დაბეჯითებით შეგვიპირდა, - ამ ხელნაწერს მე მივაგნებ და გადმოგცემთო. ჩვენც ნაადრევად ვირწმუნეთ ხელნაწერის მიღება და ჩვენს “მცირე კარაბადინში“ მას ს.თხილნარში აღმოჩენილი ხელნაწერი ვუწოდეთ (გვ.74). სამწუხაროდ, ჩვენმა გულკეთილმა ინფორმატორმა ვერ მოასწრო პირობის შესრულება. იგი 1970 წელს გარდაიცვალა. მიუხედავად ამისა, მისმა ნაამბობმა დიდი სამსახური გაგვიწია, რადგანაც კიდევ უფრო გააძლიერა ხელნაწერის ძებნის სურვილი და, მართალია, გვიან, მაგრამ ეს ძიება წარმატებით დამთავრდა. ჩვენ ხელნაწერი სრულიად შემთხვევით აღმოვაჩინეთ და დავადგინეთ მისი მულობელიც. ეს იყო ფემბა სეფერის ასული შერვაშიძე (1826-1897) ახლანდელი ქედის რაიონის სოფელ ძენწმანში ყოფილა გათხოვილი გულა ხუსეინის ძე სურმანიძეზე (1811-1898). 1844 წელს გულას ოჯახი ახლანდელი შუახევის რაიონის სოფელ ჭალაში, წინაპართა კუთვნილ მაძულში გადასახლებულა და დაფუძნებულა. შერვაშიძეთა ოჯახიდან ფემბას მზითვად მოყოლილი კარაბადინიც თან წაუღია.

1897-1898 წლებში ზემო აჭარაში სახადი (მუცლის ტიფი) გაჩენილა, რასაც ემსხვერპლა ფემბას ოჯახის ყველა მოზრდილი წევრი, 8 სული მათ შორის: გულა, ფემბა, მათი შვილები და რძლები. ცოცხლად გადარჩენილა ცამეტი მცირეწლოვანი ბავშვი. ნათესავებს-ვეჭილებს ბავშვები აღსახრდელად საკუთარ ოჯახებში წაუყვანიათ, მათი ქონებაც გაუყვიათ და წაუღიათ. ერთ დროს სიცოცხლით საკსე სახლი გავერანებულა. ამგვარად მცირე ნაწილი ქონებისა, მათ შორის ფემბასეული სამკურნალო წიგნიც ერთერთი ნათესავის ოჯახში მოხვედრილა.

ძველ ხელნაწერებს ბევრი უბუნური ჩვენს დროშიც. ემტერებოდა, რის გამოც მის გამომენას ვერ ბედავდნენ. (აღბათ იმიტომაც, რომ შესაძლოა მის კანონიერ პატრონს წაღებული ქონებაც მოეთხოვა). ასე დარჩა ხელნაწერი ამ ოჯახში ბოლო დრომდე. სანამ სახლის უფროსმა, გულვერ სურმანიძე-ჭაღალიძემ სკვდილის წინ არ მოითხოვა კანონიერი პატრონისათვის მისი დაბრუნება.

ოსმან შერვაშიძის გარდაცვალების შემდეგ ფემბას მომსწრეებთან შეხვედრის იმედი გადაგვიწურა. საბედნიეროდ ეს

აზრი ნანქარევი აღმოჩნდა. 1987 წელს ქედის რაიონის სოფელ დანდაჯაოში ვნახეთ 93 წლის ქალი ფადიმე აღის ასული ავალიანი (1894-1993), რომელსაც მკურნალი “დიდნენეი ფემბეხანუმი ლანდათ ახსოვდა“.

დაკუბრუნდეთ ისევ შერვაშიძეთა კუთვნილ წიგნს. ფემბასეული ხელნაწერის მცენარეული სამკურნალო საშუალებები შედარებულია ქართულ კლასიკურ სამედიცინო წიგნებთან და აგარელის ხელნაწერთან სპეციალურ თავში, “მსგავსება სხვა ქართულ კარაბადინებთან - პარალელები“. ყველა მათგანთან, როგორც მოსალოდნელი იყო ვნახულობთ უამრავ მსგავსებას, რაც ქართული ხალხური სამკურნალო მეთოდების ერთიანობაზე მიუთითებს. ჩვენს განსაკუთრებულ ინტერესს იწვევს ერთი ადგილი ფემბასეული კარაბადინიდან, რომელიც უნდა განვიხილოთ არა როგორც ჩვეულებრივი პარალელი, არამედ თითქმის უცვლელი განმეორება ზაზა ფანასკერტელის “სამკურნალო წიგნიდან“. ამიტომ ეს ადგილი საგანგებო შედარებას იმსახურებს:

ზაზა ფანასკერტელი- ციციშვილი

ფემბა შერვაშიძე- სურამანიძე

“თუ კაცმან მუჭრი ღუინთ სვას, აწყინთს, პირი გაუყვითლდეს და გაუსიფდეს, მისი წამალი: აიღო ინა და წყლით ადუღო, ბერბე დაღუჯ, რომ დაწმდეს და გაურთო ცაპარზი შაქარი და ნუშის ზეთი და ერთსა ღამესა ცასა ევუმ დაღვი და დილასა შვასთი და უმეულის“ (გვ. 642).

“თუ კაცმან მუჭრი ღვინთ დალითს და აწყინთს, პირი გაუყვი(თლდეს) და გაუ(სიფდეს) მისი წამალი ინა წყლით ადუღო და დაღვი, დაწდეს იმაში შაქარი და ნუშის ზეთი გაურთო ერთ ღამეს კარში დაღვი და დილას ასვი და უმეულის“ (გვ.3).

როგორც ვხედავთ, მსგავსება მართლაც რომ საოცარია. შეუძლებელია ფემბასეული კარაბადინის გადამწერს, ან ავტორს ეს ადგილი ჩაეწერა ზაზას სამკურნალო წიგნის, ან მისი მოგვიანო ვარიანტების გარეშე. საიდან შეიძლებოდა მოხვედრილიყო აჭარაში, შერვაშიძეთა ოჯახში ზაზა ფანასკერტელის ხელნაწერი? ის ხომ 1479-1505 წლებს შორის დააწერა, ხოლო

1709 წელს განაახლა და აკისმა ვახტანგ VI. შემდეგ ხელნაწერი ქართლის მეფესთან ერთად რუსეთში მოხვდა. 1737 წელს, ე.ი. ვახტანგ VI გარდაცვალების შემდეგ იგი ჯერ უფლისწულ ბაქარის ეკუთვნოდა, ხოლო შემდეგ მისი შვილაშვილის გიორგი ალექსანდრეს ძის ხელში გადასულა. 1852 წელს, გიორგის გარდაცვალების შემდეგ, როგორც მეცნიერები (მ.შენგელია) ვარაუდობენ, ხელნაწერი შესანახად გადასცეს ქ. ნიჟნი-ნოვგოროდის არქივს, ხალაც მთელი საუკუნე ხელუხლებლად იდო. 1945 წელს საქართველოს მეცნიერებათა აკადემიის ექსპედიციის წევრმა ფილოლოგიის მეცნიერებათა დოქტორმა თორნიკე ჭყონიამ ამ არქივში აღმოაჩინა ზაზას ხელნაწერი და იგი საქართველოში წამოიტანა. ამჟამად ინახება ს.ჯანაშიას სახელობის მუზეუმის ხელნაწერთა განყოფილებაში. ეს ხელნაწერი ნაწილ-ნაწილ (ერთადაც) გამოსცეს პროფესორებმა ი.აბულაძემ და კ.გრიგოლიამ (რედაქტორი პროფ. მ.სააკაშვილი) და პროფ. მ.შენგელიამ.

თუ გავიხსენებთ ზაზა ფანასკერტელის თავდაპირველ სამუშაოებს, სამხერთ საქართველოს (ტაოს, კლარჯეთს, ფანასკერტს, შავშეთს), რომელშიც ერთ დროს აჭარაც იყო გაერთიანებული, როგორც უშუალოდ მომიჯნავე პროვინცია, აგრეთვე ზაზას აჭარელ თანამოგვარეების (შესაძლოა უშუალო ნათესავთა) გადმოცემას მათი ტაო-კლარჯეთიდან გადმოსახლების შესახებ, შეიძლება ვივარაუდოთ, რომ კარაბაღინის ნაწილი, ან მისი ერთი ვარიანტი ფანასკერტიდან აჭარაში წამოიტანეს გადმოსახლებულმა ფანასკერტელებმა ან მათი სასახლის კარის უახლოესმა დიდებულებმა შერვაშიძეებმა, რომლებიც ამჟამად ცხოვრობენ ქედის რაიონში. როდის შეიძლებოდა ეს მომხდარიყო? ალბათ მას შემდეგ, რაც ზაზა ფანასკერტელის მთელი სახლეულობა ფანასკერტიდან დაიძრა და ქართლში გადასახლდა, ხოლო ამ დიდი ოჯახის ერთი შტო ციციშვილები კუთვნილ მამულში ქედაში გადმოსახლდნენ (ახლა ციციანიძეებად იწოდებიან). ეს პროცესი დაიწყო XVI საუკუნიდან, როცა ოსმალეთმა ტაო საბოლოოდ დაიპყრო.

ზაზა ფანასკერტელი-ციციშვილის “სამკურნალო წიგნისა“ და ფემბასეული ხელნაწერის მსგავსება მარტო ამ ერთი ფრაზით იმდენად სარწმუნოა, რომ არავითარ ეჭვს არ იწვევს, მაგრამ უფრო საყურადღებო მეორე მომენტია. კერძოდ, რატომ მაინცდამაინც შერვაშიძეთა ოჯახში აღმოჩნდა ზაზას კარაბაღინიდან გა-

დაწერილი ერთ-ერთი ვარიანტი? იმიტომ ხომ არა, რომ შერვა-შიძეები ცხოვრობდნენ ტაო-კლარჯეთში და ახლო ურთიერთობა ჰქონდათ ფანასკერტელებთან? შესაძლოა. მათი რომელიღაც წინაპარი აგრძელებდა ზაზას სამკურნალო საქმიანობას. რაც მომდევნო თაობამ გადმოიტანა აჭარაში, კერძოდ. ქედამი გადმოხსნა ხლეების შემდეგ.

ამგვარად აჭარაში, კერძოდ ქედისა და შუახევის რაიონებში მცხოვრები შერვაშიძეები (შარვაშიძეები) მიეკუთვნებიან ძველ ქართულ თავადურ გვარს და XV-XVI საუკუნეებში შესაძლოა უშუალოდ ტაო-კლარჯეთიდან ან ქართლიდან არიან გადმოსახლებულნი. ქართლში მათ ჰყავთ ასევე კლარჯეთიდან გადმოსული შორეული ნათესაეები, რომლებმაც რაღაც მოტივით გვარი შეიცვალეს და ადრე კლარჯაძეებად იწოდებოდნენ, ხოლო ამჟამად გლურჯიძეთა გვარს ატარებენ.

აჭარელ შერვაშიძეთა ხსოვნა გვარის ბუდეადგილად ქედას, სოფელ ალიქოღლებს (ოქტომბერი) ჰიძინებს. შერვაშიძეთა ახლანდელი მოდგმისათვის ცნობილია 8-9 თაობა, რომელთა წინაპარი, მათი თქმით, აფხაზეთიდან უნდა იყოს მოსული. როცა ჩემი ახალი ვერსია გავაცანი, ზოგი მათგანი მომემხრო და მხარი დამიჭირა. ჩვენ ამ ვერსიას კატეგორიულად არ ვამტკიცებთ, გვჯერა საკუთარი გვარის წარმომავლობის ისტორიას, ვეიქრობ, მომავალში თავად შერვაშიძეები უკეთ გაარკვევენ.

წარმომავლობის გარდა გასარკვევი ბევრი რამ არის. ჯერ ერთი უნდა დადგინდეს შარვაშიძე და შერვაშიძე ერთია თუ სხვადასხვა წარმოშობის გვარია. საყურადღებოა, რომ როგორც აღვნიშნე, საქართველოში 816 შარვაშიძე ცხოვრობს. აქედან 300-მდე ქუთაისში, 100-ზე მეტი თელავში და 100-მდე თბილისში. რაც შეეხება შერვაშიძე-ს, საქართველოში ამ გვარს 1100 მოქალაქე ატარებს: აქედან 200-ზე მეტი თბილისში, 200-მდე ხელგანაურში, 180 ბათუმში და 150-ზე მეტი ქედამი. ამგვარად შარვაშიძე-შერვაშიძეთა საერთო რიცხვი 2000-მდე აღწევს.

ამ გვარმა მრავალი სასახელო შვილი მისცა საქართველოს. სამწუხაროდ თავადურ გვარს სასტიკად გაუსწორდა ბოლშევიკუ-

რი რეჟიმი. მათი დიდი ნაწილი 1921-24 წწ. განადგურდა, ხოლო დარჩენილთაგან მრავალი 1937 წლის რეპრესიებს ემსხვერპლა. ამ საშინელი ტერორისა და განუკითხაობის დროს მარტო ქედის რაიონიდან ბათუმში 7 შერვაშიძე დახვრიტეს, რომელთაც დააბრუნებული არც კი წაუყენეს. ამჟამად ყველა მათგანი რეაბილიტირებულია.

შარვაშიძე სვიმ ხაშიდის ძე, 66 წლის, ქედა.

შარვაშიძე თეოდორ-გაბ მამულის ძე, 60 წლის, ქედა-ალიქოღლები

შარვაშიძე ახმედ შიდადის ძე, 76 წლის, ქედა

შარვაშიძე ნური ასლანის ძე, 58 წლის, ქედა-ალიქოღლები

შარვაშიძე მამედ ასლანის ძე, 70 წლის, ქედა-ალიქოღლები

შარვაშიძე ხუსეინ ღურსუნის ძე, 60 წლის, ქედა-ალიქოღლები

შარვაშიძე სვიმ ააფიზის ძე, 68 წლის, ქედა-ვაიო.

ამ გვარს არც მეორე მოსოვლით ომში დააკლო ხელი. მარტო აჭარიდან 1941-45 წლებში დაიღუპა ან უგზოუკვლოდ დაიკარგა შერვაშიძეთა გვარის 12 წარმომადგენელი.

1. შარვაშიძე ნიკო ოსმანის ძე. ბათუმი. 1941

2. შარვაშიძე ნიკო ოსმანის ძე. 1916 წ. დაბ. ქედა-ზენდიდი. 1941.

3. შარვაშიძე ივრამ ნურის ძე 1917 წ. დაბ. ქედა-ოქტომბერი. 1941

4. შარვაშიძე ხასან ნურის ძე 1920 წ. დაბ. "-“ 1941

5. შარვაშიძე სოლალ ხულუნის ძე 1921 დაბ. ქედა-ოქტომბერი 1942წ.

6. შარვაშიძე უსუფ აფიზის ძე 1920 დაბ. "-“ 1943წ.

7. შარვაშიძე შვიმ ოსმანის ძე "-“ 1941წ.

8. შარვაშიძე ხალით შარადის ძე 1919 წ. დაბ. "-“ 1943წ.

9. შარვაშიძე ვასილ სოკრატის ძე 1902წ. დაბ. ქობულეთი 1943წ.

10. შარვაშიძე ივრამ ნურის ძე 1912წ. დაბ. "-“ 1941წ.

11. შარვაშიძე იუსუფ ვაღის ძე ხელვან. კახაბერი 1941

12. შარვაშიძე დავით შარდოს ძე ხელვანაური 1942წ.

მომდევნო წლებში საზოგადოებისათვის სასარგებლო შრომით მრავალმა შერვაშიძემ ისახელა თავი. მათ შეხვედებით პოლიტიკურ ასპარეზზე. აგრეთვე მეცნიერების, განათლების, კულტურის, ჯანმრთელობის დაცვის, სოფლას მეურნეობის, მრეწველობის, ბიზნესისა და ქველმოქმედების სფეროებში.

გადმოცემით პირველი შერვაშიძე იყო ალექსანდრე, ქრისტიანული აღმსარებლობისა, რომელიც ქედაში მოვიდა და დამკვიდრდა. მისი შვილები არიან მემედი და ახმედი. ჩვენი წიგნი მემედის შთამომავალთა ცხოვრება-მოდგაწეობას შეეხება. მათ შორის საპატიო ადგილი ეკავა მემედ-ბეგის შვილიშვილს თუფან-ბეგ შერვაშიძეს, რომლის ცხოვრება-მოდგაწეობა მეტ-ნაკლებად შემოგვინახა ისტორიამ.

თუფან-ბეგი

(1846 - 1913)

თუფან-ბეგი ჰაჯი-ასლან-ბეგის შვილი იყო. მისი ყმაწვილკაცობიდან თითქმის არაფერი ვიცით. დავაჟკაცებული, საკმაოდ ასაკში შესული და ცხოვრებაგამოვლილი მოესწრო იმ სანუკვარდროს, როცა საუკუნეების წინ მიტაცებული მხარე-სამხრეთი საქართველო გათავისუფლდა და მართალია რუსთა მმართველობის ქვეშ, მაგრამ მაინც დედა-სამშობლოს უარგლებში მოექცა. 1877-78 რუსეთ-თურქეთის ომისა და დაზარალების შემდეგ ახლადდაპყრობილ ქართულ პროვინციებში რუსეთის ხელისუფლებას ხანდო და ხალხის მიერ აღიარებული პირები სჭირდებოდა (დროებით მაინც). ქედის მაზრაში არჩევანი თუფან-ბეგზე შეაჩერეს. მას მაიორის წოდება მიანიჭეს და ქედის მაზრის უფროსობაც ჩააბარეს. თედო სახოკიას თქმით “მასზე უკეთესს, ბუნებისაგან ჭკუით დაჯილდოებულს, დარბაისელს და გავლენიანს ამ მხარეში ვერც იპოვნიდნენ“. ანალოგიურია ზაქარია ჭიჭინაძის უფრო ადრინდელი დახასიათებაც. მისი თქმით, თუფან-ბეგი იყო, “დიდი ერთგული თავისი ქვეყნის, მომხრე ქართველ მაჰმადიანთა ცხოვრების და თითქმის მისთვის მებრძოლიც, რომ ქართველი მაჰმადიანები ოსმალეთში სულ არ წასულიყვნენ“. ე.ი. თუფან-ბეგი მუჰაჯირობის წინააღმდეგ თავგამოდებული მებრძოლი იყო. ზაქარია ჭიჭინაძე სხვა დროსაც შეხვედრია მას და მოუხმენია: “ჩაბარების წინა თვეებში (ე.ი. 1878 წლამდე, რ.ს.) აჭარაში კინალამ ამიკლეს და სულ მიწაზე გამასწორეს მხოლოდ იმიტომ, რომ მე ვუქადაგებდი ხალხს ნუ იყრებით, იყავით თქვენთვის, ჩავბარდეთ რუსებს, მათ ხელში ცუდი არ მოგვეღის რაო“.

თუფან-ბეგის საქმიანობას მუჰაჯირობის წინააღმდეგ მოგვიანებით, მისი სიკვდილის შემდეგაც ესება ქართული პრესა. 1915 წელს გაზეთი "საქართველო" წერდა: "თუფან ბეგი ძლიერ წინააღმდეგობას უწევდა ალი ფაშა თავდგირიძის აგიტაციას გადასახლების სასარგებლოდ და დიდი თანაზიარი იყო აჭარის მუჰთის ახმედ ხალიფაშვილი, რომელიც ილაშქრებდა აგრეთვე მუჰაჯირობის წინააღმდეგ".

თუფან ბეგმა ქართული წერა-კითხვა არ იცოდა და მისი შესწავლა დაუწყია პეტრე უმიკაშვილის მიერ ქელაში გამოგზავნილი დედა-ენით. ამის შესახებ აბდულ მიქელაძე პეტრეს წერს: "რამდენიმე პირები: თუფან შერვაშიძე, ალი-ბეგ შერვაშიძე, ალი-ალა აბულაძე სხვებიც ეწვევიან წერას. თქვენ რომ აზბუკები მიბოძეთ, იმათგან დოურიგე ამათ თქვენი შემწეობით, მეც ყურადღებას ვაძლევ". (ა.მიქელაძე, წერილები აჭარიდან, თბ., 1991, გვ. 43).

შემდგომში თუფან-ბეგს ისე კარგად შეუსწავლია ქართული წერა-კითხვა, რომ "ვეფხისტყაოსანსაც" კი კითხულობდა, რომელიც მას ძალზე უყვარდა.

ზაქარია ჭიჭინაძე აგრძელებს თუფან-ბეგის დახასიათებას. "1891-92 წლებში ამასთან ცხოვრების დროს ბეგმა მიამბო, რომ აყრის და გადასახლების დროს მე 2000-3000 კაცის შენახვა მიხდებოდა. მუდამდღე აჭარაში უქვილს ვურიგებდი მუქთად და ასე ეაწყნარებდით. ბეგი მოყვარელია "ვეფხისტყაოსნის" კითხვის" (ზ.ჭიჭინაძე, ქართველ მაჰმადიანთა გადასახლება ოსმალეთში, თბ., 1914, გვ. 187,188). იგივე აბდულ მიქელაძე 1898 წლის 8 ნოემბერს წერს: "აჭარის უფროსად აგერ ოცი წელიწადია თუფან ბეგ შერვაშიძე იმყოფება. იგი მუდამ ღარიბი ხალხის მოსარჩლე და სწორს გზაზედ დამყენებელი იყო. აქ ყველა მისი მადლობელია, რადგან თუ რაიმე სიკეთე გვჭირს დღეს, ეს სულ თუფან ბეგ შერვაშიძის წყალობით. სხვას რომ ყველაფერს თავი დაეანებოთ, იგი რათ ჰღირს, რომ მისის რწყევითა და მამაშვილურის დარიგებით, ბევრი აღარ გადასახლდა ოსმალეთში. ეხლა ამ დალოცვილმა თავისის ნებით სამსახურს თავი დაანება ჩვენში, რის გამოც ჩვენებური ხალხი ძლიერ სწყუხს". (იქვე, გვ. 63).

თუფან შერვაშიძე ყოველთვის გამოდიოდა ადგილობრივი მოსახლეობის, უსამართლობით შევიწროებული ხალხის დამცველად და ამისათვის ხშირად თავის კეთილდღეობას მსხვერპლად წირავდა.

სტეფანე ქემხაძის მოგონებით ყანადებს მოუკლავთ ხოჯა ყუ-
ლიჯ ოღლი. თურქოფილები შეეცადნენ ეს მომენტი გამოეყენებინათ
არეულობის შესატანად და ხალხის მისამხრობად. მკვლელობას
ქართველ ქრისტიანებს აბრალებდნენ, რითაც კდილობდნენ შუღ-
ლის ჩამოგდებას. მათ თუფან-ბეგს შემოუთვალეს: მოგდივართ,
შენც დაგვახვედრე შეიარაღებული ხალხი, ჩავიდეთ ბათუმში და
შური ვიძიოთო. თუფან-ბეგმა შეუთვალა: ხალხს არ შეგაგროვებ
და არავითარ შურისძიებას არ ვაპირებო. ხოჯის მკვლელობა
შემთხვევით მოხდა, თუ ეს არ დადასტურდება, სამსახურიდან გა-
დავდგებით. მიუხედავად ამისა, სოგიერთი გაბრიყვდა, შეიარაღ-
და და ბათუმისაკენ გაემართა, მაგრამ აჭარისწყალზე მათ
მემედ-ბეგ აბაშიძე დახვდათ. მან დაარწმუნა, რომ მოატყუეს.
ხალხმა ბეგს მადლობა გადაუხადა და უკან გაბრუნდა.

ხოჯა ყულიჯ -ოღლის მკვლელობაზეც ჩვენი აზრი გვაქვს.
ვფიქრობთ, რომ ეს აქტი ცარიზმის ხელისუფლებამ დაგეგმა
ადგილობრივ მცხოვრებთა, განსაკუთრებით ქრისტიან და მაჰმადი-
ანიან ქართველთა შორის შუღლისა და მტრობის ჩამოსაგდებად.
რადგანაც აქედან არაფერი გამოვიდა, ბათუმის ადმინისტრაცია
შეეცადა ახალი პროვოკაცია მოეწყო. “ბათუმის პოლიცემისტერ-
მა ჩიქოვანმა 200 მანეთი შეაძლია ერთ ახალგაზრდა კაცს თუ-
ფან-ბეგ შერვაშიძის და სხვა გავლენიან მაჰმადიან ქართველთა
მოსაკლავად. ამით ბათუმის პოლიცია ორ კურდღელს დაიჭერდა:
თავიდან მოიშორებდა მისთვის არასასურველ თუფან-ბეგს, ხოლო
მის მკვლელობას ქრისტიანებს დააბრალებდა და მათ შორის
მტრობას გააღვივებდა. ჩიქოვანის მოქმედება დროზე შეიქცეო
თ. შერვაშიძემ და პოლიციის ოინები ჩაიშალა“ (ვლ. სიჭინავა, ბა-
თუმის ისტორიიდან, ბათ., 1958, გვ. 237). აჭარის სახელმწიფო
არქივში დაცული საბუთით მტკიცდება, რომ “იმ ახალგაზრდამ,
რომელსაც შერვაშიძის მოკვლა დაავალა პოლიცემისტერმა, ყვე-
ლაფერი უამბო მემედ აბაშიძეს, როგორც დიდ გავლენიან პირს.
ამ უკანასკნელმა კი დაუყოვნებლივ მიიღო ზომები პოლიციის
მიერ მომზადებული ხოცვა-ჟლეტის თავიდან ასაცილებლად“ (ფ.
13, ს.144, ფურც. 117).

ამ გეგმის ჩაშლის მიუხედავად, როგორც სჩანს, ბათუმის
პოლიცია მაინც არ დაცხრა. ამიტომ ვფიქრობთ, ხუსეინ-ბეგ
შერვაშიძის მკვლელობა შემთხვევითი არ იყო, რაზეც
მკითხველს ქვემოთ მოგახსენებთ.

თუფან-ბეგს საკუთარი წარმოდგენა ჰქონდა ყანალებზე. მიან-ნდა, რომ ისინი იყვნენ არა იმდენად ავაზაკები და მძარცველები, რამდენადაც უსამართლობას განრიდებული აბრაგები, ხალხის დამცველნი და ნამდვილ მძარცველთა ამლაგმავები. ასეთთა რიგს მიეკუთვნებოდა თუფან-ბეგის ნაილული, გულეპელი მყველუდ დი-ასამიძე. მისი შეუკრობა თუფან ბეგს დაეკალა, მაგრამ ბრძენმა კაცმა ამაზე კატეგორიული უარი განაცხადა და სწორედ ამიტომ “თავისის ნებით სამსახურს თავი დაანება“. დიად, თუფან-ბეგმა საკუთარი ხელით აიყარა წინ-ეპოლეტები. სამაგიეროდ მის ადგილას მისულმა პორუნიკმა ვლადიმერ ივანეს ძე ვოსკრესენსკიმ, სულ რაღაც ორ თვეში დაღატით დაახოცვინა ხუსნი ქობულაძე და ახმედ დიასამიძე. ხოლო მათი მეთაური მეველუდი მისიმედ დაჭრეს, შეიპყრეს და სიკვდილით დასაჯეს.

თუფან ბეგთან კ.უმიკაშვილის, ზ.ჭიჭინაძის, თ.სახოკიას გარდა სტუმრად ყოფილან ისტორიკოსი დიმიტრი ბაქრაძე, არქეოლოგი გრაფინია პრასკოვია უვაროვა და სსვ. რომლებმაც ბევრი საქებარი სიტყვა უძღვნეს გულკეთილ და ხელგაშლილ მა-სპინძელს, სამწუხაროდ, ნვენმა თაობამ ვერ შევძელით თუფან-ბეგის ისტორიული სახლის შენახვა, რომელიც მომავალი თაობებისათვის ჭეშმარიტი მუზეუმი, მაღალზნობრიობის სკოლა იქნებოდა.

თუფან-ბეგ შერვაშიძე 1913 წელს ბათუმში გარდაიცვალა, თავისივე სახლში, რომელიც 15 წლის წინ ააშენა. საყურადღ-ებოა ამ სახლის აშენების ისტორიაც. თუფან-ბეგს ქედიდან წაბლის ნედლი ჯოხი წამოუღია და ბათუმში, კუშკინის ქუნაზე ახლადშემენილი მიწის ნაკვეთზე დაუსვია. რამდენიმე დღის შემდეგ ჯოხი გაცოცხლებულა, ფოთლები ამოუყრია და ნამდვი-ლი წაბლის ნერგად გადაქცეულა.

სახლის საძირკვლის ნაყრის დროს თუფან-ბეგი ქედაში იყო. იქედან გამოგზავნა ოსტატები და თან დააბარა სახლის წინა საძირკველი გაეჭრათ წაბლის ჯოხიდან ერთნახევარი მეტრის დაშორებით. ასეც მოქცეულან. საბედნიეროდ ეს სახლი დღესაც შენახულია, ასევე ცოცხალია ას წელს გადაცილებული უზარმა-ზარი წაბლის ხე, რომელიც გადაშლილი ტოტებით იქაურობას მოლიანად უარავს. აქ ბეგს ჰყავდა ზეინკალი, დურგალი, მინის წამსმელი, მრეცხავი და მსახურები, რომლებიც ამავე სახლში ცხოვრობდნენ.

თუფან-ბეგის ბიოგრაფიიდან ნვენთვის ბეგრი რამ ჯერჯერობით უცნობია. ამას ხელი შეუწყო 70 წლის განმავლობაში გამოყვებულმა ავტორიტარიზმმა, რომელმაც ყოველივე ძველს, მეფურს, თავადურს და ფეოდალურს ჯვაროსნული ომი გამოუცხადა. სამწუხაროდ ეს მკრეხელობა გადაედო მწერლობასაც, ამის გამო მრავალი ისტორიული პირის, მათ შორის თუფან-ბეგ შერვაშიძის ბიოგრაფიაც ზოგიერთ ნაწარმოებში დამახინჯებულადაა წარმოდგენილი.

შერვაშიძეთა გვარის ცნობილ წარმომადგენელთაგან რამდენიმე მათგანზე გაგვანია კენტი ცნობა. მკითხველს ვთავაზობთ ამ ცნობებს იმ მიზნით, რომ იქნებ ვინმეს აღმოაჩნდეს სხვა მასალები და შეაგოს ამ პიროვნებათა ბიოგრაფია.

ბენხეთ-ეფენდი შერვაშიძე 1899 წლის ერთ-ერთი საბუთით ბათუმისა და ართვინის ოლქების სახალხო სასამართლოს თავმჯდომარეა (ყადი). საბუთი გაცემულია ჰაფიზ სურმანიძეზე, რომელიც დამტკიცებულია ბათუმის მენეთის იმამის თანამდებობაზე. ვფიქრობთ უინტერესო არ იქნება ამ საბუთის მთლიანად გაცნობა: “ მოწმობა. ბათუმისა და ართვინის ოლქების სახალხო სასამართლო ამ მოწმობას აძლევს ქუთაისის გუბერნიის, ბათუმის ოლქის, ქვემო აჭარის უბნის, სოფელ ძენწმანის მცხოვრებ ჰაფიზ-ეფენდი სურმანიძეს, მისივე თხოვნით, ქუთაისის სამხედრო გუბერნატორის თანაშემწის წინადადებით და 1885 წლის 18 ნოემბრის №4891 განკარგულებით მაზედ, რომ დღეიდან ამ სასამართლოს ყადის, ბენხეთ-ეფენდი შერვაშიძეს, სასამართლოს თავმჯდომარის, სამხედრო გუბერნატორის თანაშემწის გენერალ-მაიორ სამოილოვის და წევრების ოსიპ ზაქარიანის და ისაკ-ეფენდი ხალვაშის თანდასწრებით, მან წააბარა გამოცდები მუსულმანურ დოგმატებზე, რომლებიც აუცილებელია მაჰმადიანური მენეთის იმამის თანამდებობის დასაკავებლად. ამასთან ერთად გამოსაცდელმა ჰაფიზ-ეფენდი სურმანიძემ გამოავლინა ზემოთდასახელებული თანამდებობის დასაკავებლად სრული ცოდნა, რაც დასტურდება ხელმოწერებითა და სახელმწიფო ბეჭდით. 1899 წლის 18 მარტი. ქ.ბათუმი.

სასამართლოს თავმჯდომარე, გენერალ-მაიორი სამოილოვი (ხელმოწერა რუსულად).

ყადი, ბეხნეთ-ეფენდი შერვაშიძე (ხელმოწერა არაბულად).

წევრები: ო. ზაქარიანი (ხელმოწერა რუსულად)

ი. ხალვაში (ხელმოწერა რუსულად)

საქმეთა მწარმოებელი (ხელმოწერა გაურკვეველია)“

საბუთს ადევს ლუქი და ბეჭედი.

შერვაშიძეთა გვარიდან შედარებით ნაკლებად ცნობილია ხუსეინი. იგი ჰაჯი-ასლან-ბეგის შვილი, თუფან-ბეგის ძმა და ყადირის ბიძაა. შ. მეგრელიძის ცნობით, ხუსეინ-ბეგი 18 წელი მაზრის უფროსად იყო ბათუმსა და ტრაპიზონში, ჰქონდა პოდპოლკოვნიკის წოდება და რუსული კურსით 100 მან. ხელფასი თვეში (იხ. მისი აჭარის წარსულიდან, თბ., 1964, გვ. 37). მის შესახებ ისიც ვიცით, რომ 1906 წლის 7 იანვარს ბათუმის ოლქის უფროსის მოვალეობის შემსრულებელთან ა. ი. ივანოვთან ქუჩაში სეირნობისას ტერორისტებმა სასიკვდილო ჭრილობა მიამყენეს ივანოვს. ხუსეინ-ბეგმა დიდ შეურაცხყოფად მიიღო მის გვერდით მყოფი გენერლის მკვლელობა, იძრო რევოლვერი და მკვლევლებს დაედევნა. ტერორისტს გრიგოლ კინწურაშვილს სულაც არ ჰქონდა სურვილი მასთან შეტაკებისა, მაგრამ ხუსეინ-ბეგი მოსაკლავად მისდევდა და იძულებული გახდა ესროლა. აჭარის სახელმწიფო არქივის ერთ-ერთ საბუთში ეს ფაქტი ასეა აღწერილი: “დაახლოებით დღის 2 საათზე ბათუმის ცენტრალურ ქუჩაზე მოკლეს ბათუმის ოლქის უფროსის მოვალეობის დროებით შემსრულებელი, ტიტულარული მრწველი ივანე ალექსანდრეს ძე ივანოვი. მასთან ერთად ქუჩაში მიდიოდა ქვემო აჭარის სოფელ ალიქოღლის მცხოვრები მემაბულე, ხუსეინ-ბეგ შერვაშიძე, რომელიც რევოლვერით დაედევნა მკვლევლებს, ის-ის იყო დაეწია კიდეც მათ, მაგრამ მასაც მოხვდა ტყვია და იქვე დაეცა“ (ფ. 13, ს. 2, ფურ. 142, 152).

ისტორიკოს ხარიტონ ახვლედიანის თქმით “შერვაშიძემ ძალით შეაკლა მათ თავი, სრულებით არ ფიქრობდნენ მის მოკვლას, ტერორის ობიექტი იყო ივანოვი. მან რევოლუციის დამარცხების შემდეგ დაიწყო სამსახური პოლიციაში იმ მიზნით, რომ შური ეძია რევოლუციონერების წინააღმდეგ. სწორედ ამის გამო მას გაუსწორეს ანგარიში. ხუსეინ-ბეგმა შეურაცხყოფად მიიღო, “როგორ თუ გაბედეს ჩემს გვერდში მყოფი ადამიანის მოკვლაო“. იგი დაედევნა მკვლევლებს, თორემ ივანოვის მკვლელი გრიგოლ კინწურაშვილი სრულებით არ ფიქრობდა შერვაშიძის მოკვლას“ (სახალხო-განმათავისუფლებელი ბრძოლის ისტორიიდან სამხრეთ საქართველოში, ბათ. 1956, გვ. 197).

არ შეიძლება არ დაეთანხმო დეაწლმოსილი მეცნიერის ამ ლოგიკურ განსჯას. ისიც საფიქრებელია, რომ სწორედ იმ ხანებში რეაქციონერები აპირებდნენ ხუსეინ-ბეგის ძმის თუფან-ბეგ შერვაშიძის მოკვლას (ამაზე იხილეთ ზემოთ), მაგრამ ეს ვერ შეძლეს. ხუსეინ-ბეგის მკვლელობა ხომ არ იყო მისი ძმის თუფან-ბეგის განუხორციელებელი მკვლელობის ცდის გაგრძელება? ვფიქრობთ ლოგიკის ელემენტები აქაც არის.

ასევე ცალი სიტყვა შეიძლება ვთქვათ ვინმე მოლა-ალიზე, რომელიც 1873 წელს ქედაში შეხვედრია დიმიტრი ბაქრაძეს და მისთვის მეგზურობა გუწვევია. დ.ბაქრაძის თქმით, იგი გვარად გივიშვილია, “თუმცა თვისონ აჭარაში ცნობილი ბეგების გვარს შერვაშიძეს წმულობდა. იგი ძალიან მხიარული და დიდი ოხუნჯი კაცი გამოდგა და ისე შემეთვისა, რომ დიდხანს არ მომშორებია. მოლა-ალიმ გზაში მისივე შეთხზული ბევრი სიმღერა მიკარნახა, მაგრამ სამწუხაროდ, ეს სიმღერები იმდენად უწმაწურია, რომ მათი გამოქვეყნება არ შეიძლება“ (დ.ბაქრაძე, არქეოლოგიური მოგზაურობა გურიასა და აჭარაში, ბათ., 1987, გვ. 34), გივიშვილის გვარი ერთი იშვიათია საქართველოში (გვხვდება თბილისში, კახეთში). არც ახლა, არც სხვა ავტორებთან არ შემხვედრია, თუმცა იგი შესაძლოა აჭარაში ერთი გამქრალი გვარი იყოს. თუ თავად მოლა-ალის დაუუჯერებთ, რომ ის შერვაშიძეა, საფიქრებელია, თუფან-ბეგის ძმა იყოს. მოლა-ალი დ.ბაქრაძეს სხალთაშიც ახლდა, თუმცა ეკლესიის დათვალიერებაზე, სარწმუნოებრივი მოსაზრებებით მას უარი უთქვამს (გვ. 55).

დიმიტრი ბაქრაძე თუფან-ბეგის მეორე ძმას ხასან-ბეგსაც შეხვედრია. იმ დროისათვის ბეგი 60 წლისა ყოფილა. მას ცოლად ჰყავდა თუთიე-ხანუმი სურმანიძე. ხასანს აჭარული მილიციის ათასეულით 8 წელი ბოსნიაში დაუყვია. სადაც ადგილობრივი ენაც შეუსწავლია. 1873 წელს ხასან-ბეგი მთავრობას დაუნიშნავს იმ კომისიის თავმჯდომარედ, რომელიც აზუსტებდა აჭარისა და ქობულეთის ქონებას და შეჰქონდა საინვენტარო წიგნებში.

ყურადღებას იქცევს დიმიტრი ბაქრაძის ხულოელი მასპინძელი და ინფორმატორი, 80 წლის მემედ-ალა შარაშიძე, რომელიც, დროებით მურთაზ-ბეგის მოვალეობას, მუდრობას ასრულებდა ხულოში. დ.ბაქრაძის თქმით, ისიც შერვაშიძეთა გვარს მიეკუთვნება (გვ.64). წვენ ამის დამადასტურებელი სხვა საბუთი არ გაგვანინია, ამიტომ მემედ-ალას შესახებ ამით დავკმაყოფილდეთ.

ყადირ-ბეგ შერვაშიძე

(ბავშვობა)

თუფან-ბეგს ცოლად პყავდა დანდალოელი ბეგის ავალიანის ქალი უატმა-ხანუმი. მისგან შეეძინა ოთხი ვაჟი და ხუთი ქალი; ვაჟები: ზეკერია, ქამილი, რეშიტი და ყადირი; ქალები: ულუგოთი, ზერე, ხალიყ, უნქარი და ესმა. ქამილი და უნქარი 14 წლის ასაკში სახადით გარდაიცვალნენ.

ყადირი 1887 წლის 29 ივნისს დაიბადა. პირველი განათლება ოჯახში მიიღო. მისი აღმზრდელი ყოფილა თალიბ-აღა. შემდეგ 10 წლის ასაკში ყადირი მამამ ბათუმში გიმნაზიის მოსამზადებელ განყოფილებაში შეიყვანა. სწორედ ამ დროს იყო თუფან ბეგთან სტუმრად თედო სახოკია. 24 აგვისტოს სტუმართან ერთად თუფან ბეგის შვილები ქამილი და ყადირი, აგრეთვე მათი ორი ნათესავი (ჩვენი აზრით ერთ-ერთი მათგანი იყო ავალიანი, ხოლო მეორე - სულეიმან შერვაშიძე) ბათუმში გამგზავრებულან. აი როგორ აღწერს ამ მომენტს დეაწლმოსილი ეთნოგრაფი: “24 მარიაპოლისთვის მშვენიერ დილას სოფ. ქედასაც თავი დაგუჟართო. თანამგზავრებად მომყვებოდა ოთხი მოზარდი ყმაწვილი: ორი თუფან ბეგ შარვაშიძის შვილი და ორიც მისი ნათესავი. ოთხივე ბათუმში, ახლადგახსნილ გიმნაზიაში უნდა მიებარებინათ. ორ მათგანს ბათუმის საქალაქო სასწავლებელში უსწავლიათ და ცდილობდნენ ჩემთან რუსული ენის ცოდნით თავი გამოეჩინათ. თუმიცა მეტად უჭირდათ ამ ენაზე ლაპარაკი. სამაგიეროდ მათ ქართული ლაპარაკის სმენას არა სჯობდა-რა. მეტად საამო საყურებელნი იყვნენ ეს თავისუფალნი შვილნი აჭარის ბუნებისა, აჭარულად კოხტად გამოწყობილნი: თავზე სირმიანი ყაბალახები პქონდათ შემოხვეული. ოთხსავეს ცხენებზე ისე მაგრად ეჭირათ თავი, თითქო ზედ დაბადებულანო.

ქედის ბოლოში შემოგვიერთდა ბათუმელი ახალგაზრდა ბეგი აბაშიძე, მეტად კოხტა, აჭარულადვე სირმიან ტანისამოსით გამოწყობილი. ქართულს წმინდად ლაპარაკობდა...” (მოგზაურობანი. თბ. 1950. გვ. 244).

ბათუმის გიმნაზიაში.

1897-99 წლებში ყადირი სწავლობდა ბათუმის ვაკუა გიმნაზიის მოსამზადებელ განყოფილებაზე. 1899 წელს ჩაირიცხა გიმნაზიის პირველ კლასში. საქართველოს ცენტრალურ სახელმწიფო არქივში აღმოჩენილი საბუთი (ფ.441, საქ.1785, ფურ.84) წარმოდგენას გვიქმნის ყადირის სწავლის, აკადემიური მანგენებლების, ყოფაქცევისა და საზოგადოებრივ მოძრაობაში მონაწილეობის შესახებ.

იმავე საბუთით ნათელი ხდება ყადირის ჯანმრთელობის მდგომარეობაც. როგორც ცნობილია შავი ზღვის სანაპირო ზოლი და მიმდებარე სოფლები იმ დროისათვის მალარიის ბუდეს წარმოადგენდა. ამიტომ მოსახლეობა იქ დამკვიდრებას ერიდებოდა, მხოლოდ დროებით, ზამთრობით ჩამოდოდა. მუდმივ ცხოვრებას უფრო მთიან სოფლებში არჩევდა. ყადირიც ბათუმში აბსოლუტურად ჯანსაღი ჩამოვიდა, მაგრამ პირველ წელსვე დაავადდა ე.წ. ჭაობის ცხელებით, მალარიით. მის პირად უწყისში აღნიშნულია, რომ 1898 წლის მესამე მეოთხედში დაავადების გამო გააცდინა 4 გაკვეთილი, მეოთხე მეოთხედში 29 გაკვეთილი, 1899 წლის მეორე მეოთხედში ხუთი გაკვეთილი. მესამე მეოთხედში 5 გაკვეთილი 1900 წლის მესამე მეოთხედში 12 გაკვეთილი. მეოთხე მეოთხედში 8 გაკვეთილი. მომდევნო წელს როგორც ჩანს, ვერ წარმოადგინა ავადმყოფობის ცნობა, რის გამო პირად საქმეში ჩაუწერეს, თვითნებურად გააცდინა და ორი საათით პატიმრობა მიესაჯა.

საყურადღებოა, 1897-1905 წლებში ბათუმის გიმნაზიაში ყადირთან ერთად სწავლობდნენ: მელენტი ზაქარიაძე, ხასან ლორთქიფანიძე, ქამილ შერვაშიძე, ხასან თავდგირიძე, ს.ხალვაში, ბექირ შაშიკაშვილი, ვალერიან მაქაცარია, გიორგი ხენინაშვილი, ჯემალ და სულეიმან დიასამიძეები, სულეიმან შერვაშიძე, მუხამედ და ჰაიდარ კონცელიძეები, ისრაფილ-ბეგ ხიმშიაშვილი და სერგო კლდიაშვილი.

გიმნაზიაში ყოფნის პირველ წლებში ყადირი ხასიათდება: როგორც მონდომებული, შრომისმოყვარე და ყურადღებიანი ახალგაზრდა, რაც კულტურულ ოჯახში მისი აღზრდის ნაყოფი იყო. გიმნაზიის მეორე კლასიდან პირადი საქმის ჩანაწერების

მიხედვით იგი “ზოგჯერ ავლენს თავაშეგებულობას, ნაკლებად მონდომებულია, თვითნებურად ტოვებს გაკვეთილებს“ და ა.შ.

ამ ჩანაწერს მოსდევს 1903 წლის 16 მაისის №56 ოქმი, რომ-
ლთაც ვგებულობთ, რომ მე-3 პარალელური კლასის მოსწავლეე-
ბი ხასან ლორთქიფანიძე, ყადირ შერვაშიძე და სხვები как
успевающие по всем предметам, переведены в четвертый класс
ამით დასტურდება ყადირის წინა დახასიათების ტენდენციურობა.

“მონდომებული შრომისმოყვარე და ყურადღებიანი“ მოსწავ-
ლის გამოგონილი “თავაშეგებულობა და თვითნებობა“ იწყება
1902 წლიდან, როცა ბათუმის გიმნაზიაში გამეფებული რეჟიმის
წინააღმდეგ დაირაზმა მოსწავლე ახალგაზრდობა და დაიწყო ფა-
რული წრეების შექმნა. ამ საქმეში მათ ხელს უწყობდნენ
პროგრესული პედაგოგები: ა.მგელაძე, მ.შარაშიძე, ცნობილი
აკადემიკოსი - სლავისტი, ნ.დერჟავინი, ა.ბერიძე (შემდგომში
ცნობილი მხატვარი), ე.კოციხოვსკი და სხვ. ისინი არარუს
მოსწავლეებში აღვივებდნენ სიძულვილს თვითმპყრობელური
რეჟიმის წინააღმდეგ. ამიტომ იყო, რომ მოსწავლეები ხშირად არ
ემორჩილებოდნენ რეაქციონერი მასწავლებლების მოთხოვნებს
და დამოუკიდებლად მოქმედებდნენ. ასეთი მოსწავლეები
მასწავლებლებსაც ათვალწუნებული ჰყავდათ, ისინი ასმენდნენ
ოხრანკაში, აგენტებთან, რის გამო განსაკუთრებული მეთვალ-
ყურეობის ქვეშ იმყოფებოდნენ. თითოეულ მათგანს მიუჩინეს
მასწავლებლები, რომლებიც მიზეზით თუ უმიზეზოდ ტოვებდნენ
იმავე კლასში ან აიძულებდნენ მოსწავლეებს მიეტოვებინათ გიმ-
ნაზია. ასე დატოვეს მე-4 კლასში ყადირ შერვაშიძეც.

საარქივო მასალებიდან ირკვევა, ყადირ შერვაშიძე თვალში
ამოიღეს მათემატიკისა და გერმანულის მასწავლებლებმა,
ა.ჟელტუხინმა და ო.გაბულოვმა. გაკვეთილების დროს ზოგჯერ
მათი საუბარი არასასურველ მოსწავლესთან, იმდენად
გამომწვევი და პროვოკაციული იყო, რომ ყადირი იძულებული
იყო მიეტოვებინა გაკვეთილი, ან საერთოდ არ გამოცხადებუ-
ლიყო. ყოველივე ეს იწერებოდა მოსწავლის პირად საქმეში.
მოახსენებდნენ გიმნაზიის ხელმძღვანელობას, რაც კიდევ უფრო
ართულებდა მიზანში ამოღებული მოსწავლის მდგომარეობას.
იმავე მათემატიკასა და ფრანგულში 1905 წლის მაისში ყადირს
ნიშნები არ დაუწერეს და გამოცდები შემოდგომისათვის გადაუ-
ტანეს. 27 აგვისტოს ჩანაწერებით კი დასტურდება, რომ მან გამ-
ოცდები მაინც წააბარა და მე-5 კლასში გადაიყვანეს.

ბუნებრივია, პედაგოგების მიკერძოებული ქმედება მოსწავლე-ემიც იწვევდა ზიზღსა და სიძულვილს. ძალაუნებურად უნდა ეძებნა გზები მასწავლებლების წინააღმდეგ. ან უნდა გასცლოდა გიმნაზიას.

მოსწავლეთა შეფასების წესზე თავის დროზე ყურადღება მიუქცევია აჭარის განათლების ისტორიის ცნობილ ეკვლევარს გ.ჭანტურიას. (В.Г.Чантурия. Очерки по истории просвещения в Аджарии. Бат., 1941. стр.82).

1901 წელს რსდმპ ბათუმის კომიტეტმა მსხვილ საწარმოებში შექმნა სოციალ-დემოკრატიული ჯგუფები, რომელთა გავლენით ვაჟთა გიმნაზიაში თვითგანვითარების წრეები ჩამოყალიბდა. დასაწყისში ამ წრეში ათიოდე მაღალი კლასის მოსწავლე იყო გაერთიანებული. 1905 წლიდან წევრთა რიცხვმა რამდენიმე ასეულს გადააჭარბა. მას ჰყავდა წინამძღოლები და, ცხადია აგიტატორებიც, რომლებიც ფარულად ახერხებდნენ მოსწავლეთა იდეურ აღზრდას. წრის ერთ-ერთი წევრი ივანე რამიშვილი 1902 წლის 5 აპრილს დააპატიმრეს იოსებ ჯულაშვილთან ერთად, რაც მრავლისმეტყველია. როგორც სხანს ყადირიც ამ დროიდან ხდება აღნიშნული წრის აქტიური წევრი.

ფარულ წრეებში ყადირმა გაიარა ძალზე აქტიური იდეური წრობა. ეს ნათლად გამოვლინდა რუსეთის პირველი რევოლუციის დროს, რომელშიც გიმნაზიის უფროსი კლასის მოსწავლეები და პროგრესულად მოაზროვნე მასწავლებლები აქტიურად მონაწილეობდნენ. 1905 წელს ყადირის თანაკლასელებმა მოითხოვეს დირექტორის გადაყენება, ხოლო შემდეგ ტყვეები დაუშინეს მეფის სურათს, რის გამო ზოგიერთი შემწინეული მასწავლებელი და IV კლასზე უფროს მოსწავლეთა ნაწილი დააპატიმრეს, ნაწილი კი, მათ შორის ყადირ შერვაშიძეც, “მგლის ბილეთით“ გიმნაზიიდან გარიცხეს.

1905 წლის 24 სექტემბრის ჟურნალში ჩაწერილია, რომ მთავარმართებლის კანცელარიის შუამდგომლობით მიზანშეწონილად მიაჩნიათ გიმნაზიის V კლასში მიღებულ იქნას IV კლასის ყოფილი მოსწავლე გიორგი ხვინგია, რომელსაც რამდენიმე დღის წინ ამაზე უარი უთხრეს. ახლა ამის პირობები შეიქმნა და შესაძლოა მისი ჩარიცხვა გიმნაზიიდან გასული თავადი შერვაშიძის ადგილზეო (აჭარის ცსა, ფ 10, არქ. №(17.7) - წერია საარქივო დოკუმენტში.

თბილისის გიმნაზიაში

რამდენიმე დღის შემდეგ პედაგოგი ნიკოლოზ დერჟავინი (შემდგომში ცნობილი სლავისტი-აადემიკოსი) გაათავისუფლეს და ბათუმიდან გაასახლეს. იგი თბილისში გადავიდა და პირველ კლასიკურ გიმნაზიაში შეუდგა მუშაობას. სწორედ მისი და ნათესავების დახმარებით “მგლის ბილეთის” მქონე, ყადირმა მაინც შეძლო ამავე გიმნაზიის მეხუთე კლასში შესვლა. აქ რუსულ ენას ნიკოლოზ დერჟავინი ასწავლიდა.

თბილისში ცხოვრება ყადირისათვის საკმაოდ მძიმე აღმოჩნდა. თუჟან ბეგი ამ როს უკვე აღარ მუშაობდა. მეკვლულ დიასამიძის და ილიას ხილაძის საჯაროდ სიკვდილით დასჯის შემდეგ, როგორც ზემოთაც ვთქვით, პროტესტის ნიშნად მან მიიტოვა სახელმწიფო სამსახური და პენსიაზე გავიდა. ასეთ ვითარებაში გაძნელდა შვილების მატერიალური უზრუნველყოფა. როგორც საარქივო მასალებით მტკიცდება ყადირი გიმნაზიის დარბაზ მოსწავლეთა სიაში შეუტანიათ და რამდენიმეჯერ მისთვის საქველმოქმედო ფულადი დახმარება გაუწევიათ.

“თბილისში ყადირ შერვაშიძე სულ სხვა გარემოში აღმოჩნდა. მართალია აქაც იგრძნობოდა რეაქციის სუსხი რევოლუციის უკანდახვევისა და შემდეგ დამარცხების გამო, მაგრამ ამის მიუხედავად დედაქალაქი მაინც რჩებოდა ეროვნული ცხოვრებისა და ცნობიერების ცენტრად და, ეჭვსგარეშეა ამ მხრივ მან მნიშვნელოვნად გააფართოვა ემაწვილის გონება და, რაც მთავარია, ეროვნულ-პოლიტიკური თვალსაწიერი“. (აბ.სურგულაძე, ყადირ შერვაშიძე - თამარის ორდენის რაინდი, ქუთაისი, 1997, გვ. 19)

გიმნაზიის დამთავრებისთანავე უნივერსიტეტში გასაგზავნი საბუთებისათვის საიმპერატორო ფოტოგრაფთან ე.კლართან გადაულია სურათი, რომლის მეორე გვერდზე არის გიმნაზიის დირექციის წარწერა რუსულ ენაზე, “ბეგი შერვაშიძე, რომელმაც 1909 წელს დაამთავრა თბილისის პირველი ვაჟთა გიმნაზია“. მინაწერი დასტურდება ხელწერითა და სახელმწიფოს ბეჭდით 1909 წლის 17 ივლისს.

ყადირთან ერთად გიმნაზია დაამთავრეს ნიკოლოზ გიჟიშვილი, პეტრე ქარუმიძე, მიხეილ ჩიქოვანიძე, ალი-ბეგ გაიბოვმა და სხვ. (საქ.ცსა, ფ441, საქ.1834, ფურ.92).


უნივერსიტეტი

1909 წელს ყადირ შერვაშიძემ დაამთავრა თბილისის გიმნაზია, მის წინაშე ახალი დილემა დადგა. "მგლის ბილეით" თბილისში კი შეძლო სწავლის გაგრძელება, მაგრამ ამ საბუთებით რუსეთის უმაღლეს სასწავლებლებში მისთვის ყველა კარი დაკეტილი იყო. ერთადერთი, სადაც შეიძლებოდა შესვლა იყო ტარტუს უნივერსიტეტი. ნიკოლოზ დერჟავინის რჩევით ყადირმა ტარტუსაკენ აიღო გეზი. მატარებლით მოგზაურობისას ყადირმა



გაიცნო ქუთაისელი ინტელიგენტის, ტიტულარული მრჩევლის, ვარლამ მარკოზის ძე ბახტაძის (ცხოვრობდა ქუთაისში, ბაღის ქუჩაზე) ქალიშვილი ნადეჟდა (ცუცა). როგორც სწინას ამ მოგზაურობამ ახალგაზრდების ბედიც გადაწყვიტა. ყადირმა გულით შეიყვარა მშვენიერი ცუცა. საყურადღებოა რომ ტარტუსში ჩასვლისას, ბინაც ერთ სახლში დაიდგეს. ცუცა ნინო ჭოღლიშვილთან ერთად მეორე სართულზე ცხოვრობდა, ხოლო ყადირი და გიორგი (გოგლიკა) შერვაშიძე პირველ სართულზე იყვნენ.

Handwritten signature of Qadir Sherashvili.



ყადირ შერვაშიძე 1909 წ.

ცუცა უნივერსიტეტის კბილის საექიმო ფაკულტეტზე ნაირიცხა, ხოლო ყადირი

სამედიცინო ფაკულტეტზე. საყურადღებოა, რომ დასაწყისში ჭაბუკს სულ სხვა სპეციალობა სურდა, მაგრამ, როგორც ჩანს, ცუცასთან ურთიერთობამ ამ განზრახვაზე ხელი ააღებინა და თავადაც მკურნალის პროფესია აირჩია.

ხელთა გვაქვს ტარტუს უნივერსიტეტში ჩვენს მიერ მოძრული და ჩამოტანილი ყადირის პირადი საქმის ფოტოპირი. აქ ძირითადად განცხადებები, მიწერ-მოწერები, თხოვნები და სხვა საბუთებია წარმოდგენილი.

გხვდებით აკადემიურ მანვენებლებსაც.

გვყავს აგრეთვე უნივერსიტეტთან არსებული ბავშვთა

პოლიკლინიკის პრევატ-დოცენტის მიერ გაცემული ცნობა, რომლითაც მტკიცდება, რომ მასთან ნადეჟდა ბახტაძემ მოისმინა ყვავილის აცრის სპეციალური კურსი, მეცადინეობდა მისი ხელმძღვანელობით აღამიანებზე ყვავილის აცრაში და ჩატარებული გამოცდის დროს ცოდნა ფრიადზე გამოავლინა. რუსეთის იმპერიის საექიმო წესდების მიხედვით ძირითადი პროფესიის, კბილის ექიმის დიპლომის მიღებამდე ენიჭება ყვავილის ამცრელის წოდება და უფლება აქვს ჩაატაროს დაავადებისაგან დამცავი აცრები. ცნობა გაცემულია 1911 წლის 14 თებერვალს, როცა ნადეჟდა ბახტაძე უნივერსიტეტის მეორე კურსის სტუდენტი იყო.



ნადეჟდა ბახტაძე 1915 წ.

ტარტუში ყადირი თავისი რწეულის ნამდვილი მზრუნველი და დამცველი იყო. როგორც იტყვიან ფეხლაფეხ დახდევდა და ვინ იქნებოდა ისეთი თავზე ხელაღებული, რომ ქალისათვის რაიმე გაეხებდა, უბრალო კომპლიმენტიც კი. ერთხელ ქუნაში მიმავალ ცუცვას მეორე სართულის ფანჯრიდან რომელიღაც თაყვანისმცემელმა ყვავილი გადმოუგდო. იგი ქალიშვილის წინ დაეცა. თურმე ცუცვას უკან ყადირი მიდიოდა. ამჟამა თავადიშვილმა იუკადრისა “პატივისცემა“ და ახალგაზრდა დუელში გამოიწვია. მაშინ დუელის წესები შეხლულელი იყო. შეიძლებოდა მხოლოდ წელს ქვემოთ სროლა და ყადირმაც მეტოქე ფეხებში დაჭრა, თავად კი უკნებლად გადარჩა.

ყადირი ჭეშმარიტ რაინდად ყალიბდებოდა. ქალისადმი პატივისცემა კანონად იქცა. მიუხედავად ამისა ზოგჯერ უნებლიედ იძულებული იყო წესი დაერღვია: ერთხელ იგი ერთ მოწუღართან ხელნართულ ბრძოლაში ჩაება. მეტოქეები ხანჯლებს ატრიალებდნენ. მათ შორის ერთ-ერთის მეუღლე ჩადგა: ქალი ისე მოულოდნელად გამოჩნდა, რომ ყადირმა მოქნეული ხანჯალი ვეღარ დაიმორჩილა და მას მკლავი გაუკაწრა. ამან ახალგაზრდა ყადირი დიდად შეაწუხა. იმ ქალს კი ეს ნაწიბური დაანდა და არათუ საყვედურობდა ყადირს, პირიქით ამჟობდა კიდევ, რომ სამკვდროსასიცოცხლოდ წაკიდებული ბიჭები შეანერა. ყადირს თურმე მთელი სიცოცხლე აწვალეებდა სინანული მომხდარის გამო.

ახალგაზრდა ყადირის ცხოვრებაში მრავალი კურიოსებიც მომხდარა. ერთ-ერთი ნადიმის დროს მეგობრები ქუნაში გამოვიდნენ და ეტლში ჯდებოდნენ. ერთ-ერთის მეუღლეს ისე ვიწრო კაბა ეცვა, რომ ეტლში ფეხი ვერ შედგა, დიდხანს იწვალა, მაგრამ არაფერი გამოუვიდა. მეუღლე ისე მოვრალი იყო, რომ ცოლს ვერ დაეხმარა. ყადირმა კი ვერ უკადრა ხელით აყვანა. ბოლოს მოთმინება დაკარგულმა თავადიშვილმა ხანჯალი იშიშვლა და ქალს კაბა მუხლებამდე ჩაუჭრა: - აბრძანდით ქალბატონო ეტლში. - უთხრა, ქმარიც გვერდზე მიუსვა, თავად კი სხვა ეტლი დაიქირავა.

ტარტუს უნივერსიტეტი ლიბერალური წესების გარდა სხვა მხრივაც იყო განთქმული რუსეთის იმპერიაში. სხვა უმაღლეს სასწავლებლებთან შედარებით აქ სწავლის ხარისხი გაცილებით მაღალი იყო. ამისათვის ისიც საკმარისია თუ ვიტყვი, რომ აქ მოღვაწეობდნენ და ლექციებს კითხულობდნენ მსოფლიოში აღიარებული მეცნიერი-მედიკოსები: ნ.ნ.ბურდენკო, ნ.ი.ლუნინი,

ე.ვ.ვერესაევი და სხვ. გასაკვირი არაა, რომ ტარტუს უნივერსიტეტის სამედიცინო ფაკულტეტადამოვრებული მრავალი ჩვენი თანამემამულე ქართული მედიცინის სხვადასხვა დარგის და სამედიცინო პროფილის ფუძემდებელი გახდა: კონსტანტინე ერისთავი-ქირურგი, ერმალო თოდაძე-უროლოგი, ვლადიმერ თოხაძე-პედიატრი, მიხეილ ჟორჟოლიანი-ჯანდაცვის ორგანიზატორი (სხვათაშორის ის რამდენიმე წელს აჭარის ჯანდაცვის სახალხო კომისრის მოადგილე იყო), ალექსანდრე შატილოვი-ოკულისტი, სიმონ კანდელაკი-პარაზიტოლოგი და სხვ. რომ დასცლოდა, ალბათ ყადრიც გააგრძელებდა სამედიცინო საქმიანობას, მაგრამ მას ბედმა ბავშვობიდანვე ფათურაკები, მოუსვენარი, ხმალშემართული ბროლა არგუნა. ეს მიმეც ცხოვრება ტარტუსიც გაგრძელდა. რამაც ასახვა პოეზია მის ბიოგრაფიაში.

უნივერსიტეტში შესვლის პირველი დღეებიდანვე ყადირ შერვაშიძე პოლიციის ფარული მეთვალყურეობის ქვეშ იმყოფებოდა. მის ბინას ხშირად საიდუმლოდ ათვალიერებდნენ, მაგრამ საექვოს ვერაფერს ნახულობდნენ. პოლიციამ კარგად იცოდა ნადეჟდას და ყადირის სიახლოვე. ამიტომ ახლა თვალთვალი დაუწყეს ცუცას ბინას. ტარტუს უნივერსიტეტის არქივში ჩვენ ვნახეთ საბუთი, რომლითაც ირკვევა, 1910 წლის 1 ნოემბერს უნივერსიტეტის კბილის საექიმო ფაკულტეტის სტუდენტის ნადეჟდა ვარლამის ასული ბახტაძის ბინაში პოლიციამ უმკაცრესი ჩხრეკა ჩაატარა, მომდევნო წლის თებერვალში აგენტურამ ჟანდარმერიას აცნობა, რომ მზადდებოდა სტუდენტთა კრება. პოლიცია მოულოდნელად შეიჭრა ამ შენობაში და 22 სტუდენტი, მათ შორის ყადირ შერვაშიძეც დააპატიმრა. საქმეში ჩაერია უნივერსიტეტის პროფესორი, იმპერატორის ლეიბქირურგი ციოგე ფონ მანტეიფელი და რექტორი, მათ ადმინისტრაციას აცნობეს, რომ ეს დაპატიმრებები სტუდენტთა მასობრივ მოძრაობას და დიდ უწყსრიგობებს გამოიწვევდა. ადმინისტრაციამ 6 დღის პატიმრობის შემდეგ ყველა სტუდენტი, მათ შორის ყადირიც გაათავისუფლა, თუმცა მათ მიმართ ჟანდარმერიამ კიდევ უფრო გააძლიერა მეთვალყურეობა. ეს ამბავი დაუყოვნებლივ აცნობეს კავკასიის სასწავლო ოლქის მზრუნველს, რომელმაც ყადირ შერვაშიძეს მოუხსნა სტიპენდია. ამგვარად იგი გარიცხვას კი გადაურჩა, მაგრამ სრულიად უსახსროდ დარჩა. ამას დაერთო მამის თუფან-ბეგ

შერვაშიძის გარდაცვალებაც (1913 წ.), რამაც კიდევ უფრო გაართულა სტუდენტის მდგომარეობა.

ყადირის პირად არქივში ინახება მრავალი თხოვნა სტიპენდიის აღდგენაზე, მაგრამ ყველა მათგანში გაცემულია ბიუროკრატიული პასუხი: “სტიპენდია დაენიშნა სხვა პირს, ამიტომ თქვენ ვერ დაგაკმაყოფილებთ”.

ასეთ დროს სტუდენტის მიმართ დიდ მზრუნველობას იჩენდა ქართველ სტუდენტთა გაერთიანება.

სტუდენტთა სათვისტომო

რუსეთის იმპერიაში იურიევის (ტარტუს, დერპტის) უნივერსიტეტს, როგორც გამონაკლისი, მინიჭებული აქონდა ავტონომიური უფლებები. ამ სასწავლებელში სხვა უნივერსიტეტებიდან “მგლის ბილეთით” გარიცხულებსაც ღებულობდნენ, ამიტომაც აქ თავი მოიყარეს მეფის ხელისუფლების მოწინააღმდეგე ახალგაზრდებმა, რომელთათვის სხვა უმაღლესი სასწავლებლების კარები დახშული იყო.

გასული საუკუნის მიწურულს იურიევის უნივერსიტეტში მრავალი ქართველი ახალგაზრდა ჩაირიცხა. მათ იქ შექმნეს ქართველ სტუდენტთა სათვისტომო. ამ ეროვნული ორგანიზაციის შესახებ ცნობებს ვხვდებით ი.ტატიშვილის და თ.დეკანოზიძის წიგნში “მოსკოვის უნივერსიტეტი და ქართველი ახალგაზრდობა“ (1969წ.), ტარტუს ქართულ სათვისტომოზე გაზეთ “ლიტერატურულ საქართველოში“ ვრცელი წერილი გამოაქვეყნა ვიოლეტა გაგუამ (ოქტომბერი, 1978 წ.), მაგრამ როგორც თვით ავტორი აღნიშნავს იგი ძირითადად სათვისტომოს ბიბლიოთეკაზე ამახვილებს მკითხველის ყურადღებას, თუმცა წერილში სხვა მრავალი საინტერესო საკითხიც არის გაშუქებული.

ტარტუს ქართველთა სათვისტომოს უფრო ვრცლად შეეხო ესტონელი მეცნიერი სერგეი ისაკოვი თავის წიგნში “წლებსა და მანძილს შორის“ (1971 წ. რუსულ ენაზე). სათვისტომოს საქმიანობის შესასწავლად 1970, 1977 და 1980 წლებში სპეციალურად ვიმოგზაურე ესტონეთის ქალაქებში. ჩემს მიერ მიკვლეული

მასალები წარკადგინე ბალტიისპირეთის რესპუბლიკების სამეცნიერო კონფერენციებზე და წავიკითხე სამი მოხსენება, რომლებიც ცალკე შრომების სახით კიდევ დაიბეჭდა.

რუსეთის პირველ რევოლუციამდე ტარტუს ქართველთა სათვისტომო არალეგალურად არსებობდა, ამიტომ ცნობები მისი მოღვაწეობის შესახებ შემონახული არაა. ამავე მიზეზით ჩვენთვის ჯერჯერობით უცნობია სათვისტომოს დაარსების ზუსტი თარიღი. როგორც ცნობილია 1892 წელს ტარტუს უნივერსიტეტში სწავლობდა ერთადერთი ქართველი სტუდენტი ზ.გ. აბდუშელიშვილი. 1897 წელს სტუდენტთა რიცხვი 10-მდე გაიზარდა, ხოლო ერთი წლის შემდეგ 30-ს მიაღწია.

ჩვენი აზრით, ტარტუსში ქართველ სტუდენტთა სათვისტომო დაარსდა 1898 წლის 14 თებერვალს, ე.ი. სწორედ მაშინ, როცა ქალაქის ბიურგერმუსეს დარბაზში გაიმართა პირველი ქართული საღამო, მისი საერთო ხელმძღვანელობა ცნობილმა ქართველმა კომპოზიტორმა მელიტონ ბალანჩივაძემ გასწია. საღამოს ნატარებაზე პასუხისმგებლობა იკისრა ესტონელმა პროფესორმა ლეონჰარდ მაზინგმა, რომელიც, სხვათაშორის, ქართულ ენასაც ფლობდა.

ქართველთა სათვისტომოს გარდა ტარტუს უნივერსიტეტში არსებობდა იურისტ სტუდენტთა წრე, მედიკოს სტუდენტთა საზოგადოება, რუს სტუდენტთა საზოგადოება, კავკასიელ სტუდენტთა საზოგადოება, სომეხთა სათვისტომო, ებრაელთა სამზარეულო და სხვ. მათ შორის განსაკუთრებული აქტიურობით, მდიდარი სამოქმედო პროგრამით გამოირჩეოდა ქართველ სტუდენტთა სათვისტომო.

ჩვენს თანამემამულე ახალგაზრდებს ჰქონდათ საკუთარი წესდება, რომლითაც სათვისტომოს წევრობა შეეძლოთ მხოლოდ ქართველ სტუდენტებს თუ სხვა ერის წარმომადგენლები გამოთქვმდნენ მათთან გაერთიანების სურვილს, საკითხს გადაწყვეტდა საერთო კრება.

სათვისტომოს მუშაობის მრავალფეროვნებაზე მეტყველებს მისი მიზნები და ამოცანები: ღარიბ სტუდენტებზე მატერიალური დახმარება; საღამო-კონცერტების გამართვა; სტუდენტების დაახლოება და მათ შორის მეგობრული ურთიერთობის განმტკიცება; სასწავლო ნიუთებით, სახელმძღვანელოებით და სხვა წიგნებით უზრუნველყოფა: სტუდენტებზე დახმარება მათი

ავადმყოფობის ან მშობლებისა და ახლობლების გარდაცვალების შემთხვევაში; არაქართველი საზოგადოებისათვის საქართველოს ისტორიის, კულტურისა და ეთნოგრაფიის გაცნობა; სტუდენტთა იდეურ-პოლიტიკური მომზადება და მათთვის რევოლუციური იდეალების შთაგონება.

ს.ისაკოვი თვლის, რომ ტარტუს ქართველთა სათვისტომოში თავისი არსებობის მანძილზე ჩარიცხული იყო 110 სტუდენტი. თავად ავტორი ამ ციურს არასრულს უწოდებს. მართლაც, ამ სი-
აში შეტანილი არაა მრავალი ქართველი. მარტო სამეიციხის ფაკ-
ულტეტიდან გამოტოვებულია 20 ახალგაზრდა. ამგვარად სკენ
მიერ შეგროვილი არასრული ცნობებით სათვისტომოში ჩა-
რიცხულ სტუდენტთა რიცხვი 160-მდე გაიზარდა.

სათვისტომოს ჰყავდა 14 საპატიო წევრი. მათ შორის პოე-
ტები: აკაკი წერეთელი და ვაჟა ფშაველა, დავით კლდიაშვილი,
იაკობ გოგებაშვილი, ივანე ჯავახიშვილი, ნიკო მარი, კომპოზიტორი
კოტე ფოცხვერაშვილი, პუბლიცისტი არჩილ ჯორჯაძე და სხვ.

ქართულ გაზეთებში გამოქვეყნებული ცნობებით მტკიცდება,
რომ ტარტუს ქართველთა სათვისტომო მატერიალურ დახმარებას
უწევდა არა მარტო უნივერსიტეტის სტუდენტებს, არამედ სტიპენ-
დური უბედურებით დაზარალებულ საქართველოს მოსახლეობასაც.

1899 წელს ქართველმა სტუდენტებმა ტარტუსში გახსნეს ბიბ-
ლიოთეკა, რომელიც შემდგომში წიგნებით შეავსეს ქართული
გაზეთების “ივერიის“, “კვალის“, “აკაკის კრებულის“, “ცნობის
ფურცლის“, “მომამბის“, “ჯეჯილის“ და სხვათა რედაქციებმა,
აგრეთვე მწერლებმა და მეცნიერებმა.

ტარტუს უნივერსიტეტის სტუდენტთა კულტურულ-საგანმანათ-
ლებლო მუშაობის ძირითადი ფორმა იყო ქართველი ხალხის კულ-
ტურისა და ისტორიის შესწავლა. ამ მიზნით 1900 წელს დაარსდა
სამეცნიერო წრე, რომლის სხდომებზე (თვეში ერთხელ) ისმენდ-
ნენ რეფერატებს, მოხსენებებს, აწყობდნენ დისკუსიებს. 1913 წელს
წრეს ეწოდა იმავე წელს გარდაცვლილი ცნობილი ქართველი პუბ-
ლიცისტისა და საზოგადო მოღვაწის არჩილ ჯორჯაძის სახელი.

ქართველ სტუდენტთა ტრადიციულ საღამოებს ესწრებოდნენ
არამარტო ესტონელები, არამედ გერმანელები, რუსები, ებრაელ-
ები, ლატვიელები, ლიტველები, სომხები და სხვა ერის
წარმომადგენლები. “ამ საღამოების გავლენით ისინი ბევრს
ფიქრობდნენ ქართველი ხალხის ბედზე და ამ ხალხის ცხოვრებას
თავისას ადარებდნენ“, წერს ს.ისაკოვი.



ტარტუს ქარაკელ სტუდენტთა სათვისტომო 1913 წ.
პირველ რიგში მარჯვნიდან მეორე ყადირ შერვაშიძე
მეორე რიგში მარჯვნიდან მეოთხე ნადეჟდა ბახტაძე
ბოლო რიგში მარჯვნიდან პირველი მისეილ ჟორჯულიანი.

ქართული საღამოების მოწყობაში დიდ ორგანიზატორულ მუშაობას ატარებდა ტარტუს უნივერსიტეტის საბუნებისმეტყველო ფაკულტეტის სტუდენტი, შემდგომში ცნობილი ქართველი კომპოზიტორი კოტე ფოცხვერაშვილი. იგი გასამრჯელოს გარეშე სელმპლევანელობდა გუნდსა და ორკესტრს.

ქართველთა სათვისტომოს მიერ 1911 წელს მოწყობილ მე-8 საღამოში მონაწილეობდა გამონენილი ქართველი მიმღერალი ვანო სარაჯიშვილი. საღამოს დაწყებამდე მონაწილეთა დიდი ნაწილი დააპატიმრეს, მაგრამ ბიურგერმუსეს დარბაზი მაინც ხალხით გაივსო.

დიდი წარმატებით ჩატარდა მე-9 საღამო 1912 წელს. ამის შესახებ მემარჯვენე გაზეთი "იურიევსკი ლისტოკიცი" წერდა: "ქართული საღამო დიდი პოპულარობით სარგებლობს და ეს იურიევსის სეზონის მართლაც ერთ-ერთი ყველაზე ბრწყინვალე,

ხალხმრავალი და მდიდარი საღამო იყო, როგორც შინაარსით, ისე მონაწილეთა შემადგენლობით“.

1914 წლის 13 თებერვალს მოწყობილ საღამოზე თბილისის “ზაკვაკაზსკაია რენ“ წერდა: “ტრადიციული ქართული საღამოები ტარტუში განსაკუთრებული წარმატებით ტარდება იმიტომ, რომ ისინი გამოირჩევიან თავისი მშვენიერებით, ზემოქრობით, აგრეთვე ქართული ეროვნული კოლორიტით, რომლებიც ნრდილეთის ხალხებისათვის, რა თქმა უნდა, ახალი და ორიგინალურია. 13 თებერვალს გამართული საღამო სწორედ ასეთი იყო. აღმოსავლურად მოწყობილ ოთახებში ცოცხალ ნახატებზე წარმოდგენილი იყო მე-5 საუკუნის საქართველოს ისტორიის ერთ-ერთი თვალწარმტაცი და სევდიანი ეპიზოდი (წამებულის სიკვდილი), ტრადიციული საზანდარი, ცეცხლოვანი ცეკვები, ლეკური, შესანიშნავი გუნდი, რომელიც გამოსცემდა ხან სევდიან ხალხურ მელოდიებს, ხან კი ღირიკული პოეზიის მომხიბლავ და ნაზ ჰანგებს... იქმნებოდა გრანდიოზული პანორამა, რომელსაც მაყურებელი მიჰყავდა შორს, სადღაც კავკასიის მთების მწვერვალზე... მადლობა ქართველთა სათვისტომოს ჭეშმარიტი კმაყოფილების იშვიათი წუთებისათვის“.

ქართველთა სათვისტომო რეგულარულად მართავდა ლიტერატურულ საღამოებს ამ შეხვედრების დროს მაყურებელთა წინაშე გამოდიოდნენ კიკნა ფშაველა (სიმონ ბადურაშვილი), აკაკი პაპავა (მოგვიანებით ემიგრანტი, მეუღლესთან თამართან ერთად შესანიშნავი წიგნების ავტორი), დიმიტრი გულისაშვილი, დავით უღენტცი, ვლადიმერ ჩირაძე და სხვ. საღამოებს აწუობდნენ საქართველოს გამოსწილი მწერლების ნიკოლოზ ბარათაშვილის, აკაკი წერეთლის, ვაჟა ფშაველას ხსოვნის აღსანიშნავად. 1916 წლის 30 ოქტომბრის საღამო მიემდგნა სათვისტომოს წევრების, ტრაგიკულად დაღუპული კიკნა-ფშაველას და გრიგოლ ხერხეულიძის ხსოვნას. ამ საღამოზე სიტყვებით გამოვიდნენ პარმენ კვირიკელია, ვახტანგ კოტეტიშვილი, ვლადიმერ თოხაძე, გიორგი მარგველაშვილი, პოეტის ძმა მიხეილ ხერხეულიძე.

ტარტუს უნივერსიტეტის სტუდენტთა სათვისტომო უშვებდა ხელნაწერ იუმორისტულ გაზეთს “კოლო“. მისი ერთადერთი ცალი შემორჩა საქართველოს ეროვნულ ბიბლიოთეკას.

ქართველი სტუდენტები აწუობდნენ გაფიცვებს, რითაც ეხმაურებოდნენ ხელისუფლების წინააღმდეგ ამხედრებულ მუშებს,

ინტელიგენციას და სტუდენტებს. 1899 წლის გაფიცვის მიზეზი იყო პეტერბურგში პოლიციის მიერ მოწყობილი სტუდენტთა დარბევა. იმავე წელს ტარტუში ჩამოყალიბდა “სათვისტომოთა გაერთიანება“, რომელშიც აქტიურად მონაწილეობდნენ ქართველებიც. ეს გაერთიანება არალეგალურად ხელმძღვანელობდა სტუდენტთა რევოლუციურ მოძრაობას. აქტიურობით გამოირჩეოდნენ ვალშიბაია, ნ.მრეველიშვილი, ნ.მელიქიშვილი, დ.სულუხია, მ.ჩხენკელი, გ.ნათიშვილი, გ.მახარაძე, დ.ახმეტელი, მ.ელიაშვილი, ა.კვიციანიშვილი, ვ.ხელაშვილი, ზ.ედელიაშვილი, (ზურაბ ედილის ფსევდონომით წიგნის “საინგილო“ ავტორი) და სხვ.

საყურადღებოა, რომ ამ გაერთიანებამ 1901 წელს კავშირი დაამყარა რსდმპ თბილისის კომიტეტთან და გაავრცელა კომიტეტის მიერ ჰექტოგრაფზე გამრავლებული მოწოდება “ამხანაგო ჯარისკაცებო!“ მასობრივი გამოსვლების შემდეგ სტუდენტთა ნაწილი დააპატიმრეს. რუსეთის პირველ რევოლუციაში მონაწილეობა დაეკისრა სტუდენტთა ახალ ორგანიზაციას ე.წ. დელეგატთა კრებას, რომლის წევრი იყო გ.ხირსელი. რეაქციის წლებში ჟანდარმერიამ გააძლიერა რეპრესიები. 1910-11 წლებში დააპატიმრეს ყ.შერვაშიძე, ი.მებურიშვილი, გ.ხირსელი, რ.არსენიძე, ლ.კიღურაძე და სხვ. ჩხრეკა ნაატარეს ვ.დალაქიშვილის, ა.პაპავას, მ.ჩხეიძის, ი.გუგელაშვილის და ნადეჟდა ბახტაძის ბინებში.

როგორც აღვნიშნეთ, დაპატიმრებულთ გამოუსარსლა იმპერატორის ლეიბქირურგი პროფესორი ციოგე ფონ მანტეიფელი და უნივერსიტეტის რექტორი, რის შემდეგ სტუდენტები გაათავისუფლეს.

ქართველთა სათვისტომოში ძირითადად გაერთიანებული იყვნენ სოციალ-ფედრალისტები, ხოლო კავკასიელ სტუდენტთა საზოგადოებაში სოციალ-დემოკრატები. მათ განსხვავებული სამოქმედო პლატფორმა ჰქონდათ, რის გამოც ამ ორგანიზაციას შორის ხშირი იყო უთანხმოება, რაც ზოგჯერ მტრობაში გადადიოდა ხოლმე. მიუხედავად ამისა, საღ აზრს ყოველთვის უპირატესი ადგილი ეჭირა და სათვისტომოც დიდ როლს ასრულებდა საზოგადოებრივ მოძრაობაში, სხვადასხვა ერის შვილებთან ქართველი სტუდენტების მეგობრობის განმტკიცებაში.

პირველი მსოფლიო ომის დამთავრების შემდეგ, 1916 წელს, ტარტუს უნივერსიტეტის ქართველ სტუდენტთა სათვისტომომ არსებობა შეწყვიტა, რის გამოც საქართველო-ესტონეთის კულტურული და ლიტერატურული ურთიერთობაც შეწყდა.

ქორწინება

ხუთი წელი გაგრძელდა ნადეჟდასა და ყადირის მაღალზნეობრივი, ჰეშმარიტად გულწრფელი სიყვარული. არცერთს არ უცდია დაეჩქარებინა ქორწინება. პირობა დადეს, ექორწინათ მაშინ, როცა ექიმის დიპლომს აიღებდნენ. ნადეჟდა ექვსი თვით ადრე 1914 წელს ამთვრებდა უნივერსიტეტს (კბილის საექიმო მაშინაც ხუთწლიანი იყო), მაგრამ მოხდა გაუთვალისწინებელი, რამაც დააჩქარა მათი ბედნიერება. 1914 წელს დაიწყო პირველი მსოფლიო ომი. უნივერსიტეტის დამამთავრებელი კურსის ვაჟები დანქარებული სასწავლო პროგრამით მოამზადეს. ამიტომ ცუცასთან ერთად ყადირიც ამოვრებდა უნივერსიტეტს. ამგვარად ბედნიერება თავისით მოვიდა. გადაწყვიტეს შეუღლებულიყვნენ, მაგრამ ცუცა ამას მშობლების გარეშე ვერ გადაწყვიტდა.

ყადირის თხოვნით ცუცამ წერილი აფრინა ქუთაისში - მშობლებს ქორწინების ნებართვას თხოვდა. მალე ტარტუში ვარლამ ბახტაძის წერილი მოვიდა ყადირის სახელზე: საწინააღმდეგო არა მაქვს, მაგრამ ქრისტიანულად მოინათლეო.

ამაყი ბეგი ამ პასუხმა არათუ დააკმაყოფილა, არამედ ძალზე ატკინა გული. ახალგაზრდებს ხუთი წელი ერთმანეთი უყვარდათ, ეს ყველამ იცოდა. არასოდეს სარწმუნოებაზე საუბარიც არ ყოფილა. ისინი ერთნაირად სცემდნენ პატივს ყოველგვარ აღმსარებლობას და აი, გადამწყვეტ უამს ასეთი წინააღმდეგობა შეხვდათ.

ყადირმაც არ დააყოვნა. იმავე დღეს ცოტა არ იყოს მკვახე პასუხი გაუგზავნა სასიამაროს: “ვერ მოვინათლები, მაგრამ თქვენს ქალიშვილს ცოლად მაინც შევირთავო“.

ამის შემდეგ აღარაფერი დარჩენოდათ. 1914 წლის ოქტომბერში ჯვარის დასაწერად წავიდნენ მართლმადიდებლურ ეკლესიაში. ჩანს, უარი მიიღეს. ერთადერთი იმედი იყო კათოლიკური ეკლესია. მართლაც ჩავიდნენ ტალინში და რეველის კათოლიკურ ეკლესიაში დაიწერეს ჯვარი. ამ ეკლესიის ისტორიაში ალბათ ეს იყო უნიკალური შემთხვევა, როცა მარალმადიდებელმა ქალიშვილმა ჯვარი დაიწერა მუსლიმან ვაჟზე ე.ი. ისე, რომ არც ერთი და არც მეორე არ ეკუთვნოდა კათოლიკური ეკლესიის მრევლს.

ამ ქორწინებამ, როგორც მოსალოდნელი იყო როგორც იმერეთში, ისე აჭარაში დიდი ზიოქმან-მოთქმა გამოიწვია. ეს იყო სრუ-

ლიად გამონაკლისი შემთხვევა, რომლის მსგავსი ადრე არავის ახსოვდა (შემთხვევები იყო, მაგრამ რომელიმე მხარე აუცილებლად იცვლიდა სარწმუნოებას). ამას გამოხმაურება მოჰყვა მანინდელ პრესაშიც. ცნობილი ქართველი პუბლიცისტი, ვარლამ ბახტაძის კარგი ნაცნობი ილია ფერაძე (“ნაქუნი“) ეურნალ “თეატრი და ცხოვრების“ 1916 წლის დეკემბრის №50-ში წერდა: “ამას წინათ შეგხვდი ერთ ქართველ ქალს, რომელიც ცოლად გაჰყვა ქართველ ინტელიგენტ-მუსლიმანს. მეტად დაღონებული იყო იმის გამო, რომ თურმე ნათესავები აყვედრიან: თათარს რად გაჰყევი ცოლადო? მაგრამ პატივცემულმა ქართველმა მანდილოსანმა უფრო ხასიათის სიმტკიცე უნდა გამოიჩინოს - რაც უნდა ის სთქვან უვიცებმა, - მათი ნათქვამიდან რა გამოვა? - თქვენ, პატივცემული ქართველი ქალი, რომელმაც მეუღლედ აღირჩიეთ ქართველი მუსლიმანი, დიდი სამსახური მიგიძღვით. რაც უნდა სთქვან თქვენმა ნათესავებმა ყურადღებას ნუ მიაქცევთ. შაბაშ ქალო!...”

მართალია ილია ფერაძე გვარებს არ ახახელებს, მაგრამ როცა ეს წერილი პირადად ქალბატონ ცუცავს წავუკითხე (ეს იყო 1966 წელი), ამ ხანდაზმულმა მანდილოსანმა ქალიშვილსავე დაიმორცხვა და დაადასტურა, რომ ეს მართლაც მას ეხებოდა.

ყადირის ოჯახში შემოსვლის პირველი დღიდან ცუცა ყოველთვის ცდილობდა შინაური ქალებისათვის მიეზადა და მათგან გამორჩეული არ ყოფილიყო: “ოჯახში მისვლამდე რძალმა შლაპა მოიხადა და თავზე ქმრის ნაწუქარი შალი შემოიხვია. რაც არ უნდა იყოს მაჰმადიანურ გარემოში შედიოდა და ტრადიციისათვის ანგარიში უნდა გაეწია. დამხვდურებმაც მაშინვე დაუფასეს ტაქტი - დედამთილი თურმე კიბეზე შეიგება თავისი შვილის რჩეულს, იქვე მოხსნა შალი და ისევ შლაპა დაახურა, შენ ამით ხარ გაზრდილიო. დამხვდურებისა და მრავალრიცხოვანი მაყრიონის თანდასწრებით იმ დროისათვის ასეთი იშვიათი ურთიერთგულისხმიერება დამოყვრებული გვარების - შერვაშიძეებისა და ბახტაძეების სიყვარულის საფუძველი გახდა“ (აბელ სურგულაძე, ყადირ შერვაშიძე - თამარის ორდენის რაინდი, ქუთაისი, 1998, გვ. 23,24).

უფრო მეტიც, ქალბატონმა ცუცამ ამ დროს ისიც გვითხრა, რომ მის ოჯახში ყადირის სიცოცხლეში და მის შემდეგაც ერთნაირად ხვდებოდნენ აღდგომასაც, რამაზანსაც, შობასაც და ბაირამსაც.

ამას ყადირი, როგორც ჩამოყალიბებული ქართველი ინტელიგენტი, თავად უწყობდა ხელს. სხვათაშორის, შემორჩენილია ომის დროს კაგიზმანიდან გამოგზავნილი ერთი ღია ბარათი, რომლის ცალ გვერდზე სამხედროთა კოლექტიური ფორტოსურათი, ხოლო მეორეზე ყადირის წერილია წარმოდგენილი. აი მისი შინაარსიც: “ცუცა მივიღე შენი წერილი და სანქაროთ გაძღვევასუხს. ესეც არის ვგზავნი კაცს კაგიზმანში, რომ საშობაოთ ფული მოგისწროს. გიგზავნი ხუთ თუმანს. გულის ვაკოცებ. მოგილოცავთ ყველას. მოლოცვა-ტელეგრამას არ ღებულობენ“. წერილს თარიღი არა აქვს, მაგრამ იგი დაწერილი უნდა იყოს 1915 წლის შობის დღესასწაულზე რამდენიმე დღით ადრე. ამ წერილს ისტორიული მნიშვნელობაც აქვს, რადგანაც ეს ჯერჯერობით არის წვენამდე მოღწეული ყადირ შერვაშიძის ერთად-ერთი უაქსიმილე, რომელიც ნათლად გამოხატავს ე.შერვაშიძის ტოლერანტობას. ეს თვისება შერვაშიძეთა დიდ სახლში ისეთ წესად იქცა, რომ შემდეგ მოყვარე-ნათესავებსაც გადაედო და ადრე “თათრების მტერმა“ ვარლამ ბახტაძემაც კი დაამკვიდრა თავის ოჯახში. ამიტომ ჩემი აზრით როცა ქართველი ხალხის შემწყნარებლობაზე ზოგადად ვილაპარაკებთ, აუცილებელია ასეთი ოჯახების მაგალითებიც დავასახელოთ, რადგანაც ქვეყანა, ერი, მისი ყოფა და ადათ-წესები სწორედ ამითაა მტკიცე.

ქორწინებიდან ზუსტად ერთი წლისთავზე 1915 წლის 6 სექტემბერს ცუცას და ყადირს შეეძინათ პირმშო, რომელსაც გული დაარქვეს; 1918 წლის 31 იანვარს კი მეორე გოგონა წელი დაიბადა.

სამხედრო სამსახური

როგორც ზემოთ აღვნიშნეთ დაიწყო პირველი მსოფლიო ომი. რუსეთის არმიას დიდი რაოდენობით სამხედრო ექიმები სჭირდებოდა. იმპერიის ყველა უნივერსიტეტს დაუგზავნეს სამედიცინო ფაკულტეტის დამთავრების ახალი დანიქარებული სწავლეების პროგრამები. მეხუთე კურსზე, ერთი წლით ადრე, ვაჟი სტუდენტები ფორსირებული წესით გადიოდნენ მეხუთე დ მეექვსე კურსების მასალას, აქცენტი აღებული იყო სამხედრო საველე



ქართველ მუსლიმანთა ცხენოსანიდივიზიის მეთაური, პოლკოვნიკი ყადირ შერვაშიძე 1918 წ.

ქირურგიასა და ეპიდემიოლოგიაზე, რომლის შემდეგ ე.წ. “ზაური-ჯერჯი”-ის სახელით ამთავრებდნენ უნივერსიტეტს და პირდაპირ არმიის ში მიდიოდნენ. ყადირი ფრონტის სამხრეთ ხაზზე მოხვდა. მას საშუალება მიეცა ცოლ-შვილი ბათუმში ნამოყვანა, თავად კირუსეთ-თურქეთის საომარ მოქმედებებში ნაბმულიყო. სამწუხაროდ ჩვენ ვერ შევძელით მოგვეკვლია ყადირის არმიაში მოღვაწეობის დეტალები; ვიცით მხოლოდ, რომ მისი ნაწილები მოქმედებდა ართვინ-ერზრუმ-ყარს-კავიზმანის

ხაზზე და ახალგაზრდა ექიმის ძალიან მალე რუსულმა მხედრობამ მიანიჭა პოდპოლკოვნიკის სამხედრო წოდება.

საოჯახო არქივში შემონახულია ფოტოსურათები, რომლებზეც ყადირის სამხედრო სამსახურია აღბეჭდილი. ერთ მათგანზე ზემოთ მოგახსენეთ (ღია ფოტობარათზე). იგი სავსევე მოძრავი სამხედრო ლაზარეთის წინ არის გადაღებული, ხოლო მეორე სურათზე როგორც სწანს მთლიანად სამხედრო ნაწილის

შემადგენლობაა წარმოდგენილი. სამწუხაროდ ფოტოები ძალზე ძველი, გახუნებული და დაზიანებულია და ძნელდება ყადირის სახის ამოცნობა.

როგორც ირკვევა ორივე ფოტო გადაღებულია ყარსის ოლქის პატარა ქალაქ ყარაქლისში, სადაც განლაგებული იყო ლაზარეთი.

ბათუმში

1916 წლის ბოლოს ყადირ შერვაშიძე ჩამოვიდა ბათუმში და მუშაობდა დაიწყო “ავადმყოფ და დაჭრილ მებრძოლთა დახმარების სრულიად რუსეთის ერობის კავშირის“ რწმუნებულად, რომელსაც ცნობილი ქართველი ექიმები ალექსანდრე შატილოვი (1868-1949), გრიგოლ ელიავა (1857-1925) და პლატონ გიგინეიშვილი (1879-1949) განაგებდნენ. აქ ყადირი დარჩა 1917 წლის აპრილამდე, რადგანაც თებერვლის რევოლუციის შემდეგ რუსეთის ერობის კავშირი დაიშალა.

ბათუმში ხანმოკლე დროის მანძილზე ყადირმა მრავალი სასიკეთო საქმის გაკეთება მოასწრო. ერობის კავშირში მისი ძირითადი პაციენტები აჭარის მოსახლეობა იყო. ადგილებზე სამედიცინო კადრებს და კვალიფიციურ დახმარებას მოკლებული მოსახლეობა ახლადჩამოყალიბებულ საექიმო უწყებას მიმართავდა, სადაც ყადირის ჩარევით სათანადო დახმარებასღებულობდა. აქ მუშაობის დროს ყადირ შერვაშიძეს მონაწილეობა მიუღია წითელი ჯვრის ორგანიზაციების საქმიანობაში, ამ ორგანიზაციის კუთვნილი საავადმყოფოსა და აუთიაქის გახსნაში (ეს აუთიაქი მოთავსებული იყო ახლანდელი მემედ აბაშიძის და გენერალ მაზნიაშვილის ქუჩის კუთხეში მდებარე შენობაში, რომელიც ახლაც შემონახულია).

ყადირ შერვაშიძე გულმოწყალებისა და ქველმოქმედების შესანიშნავ მაგალითსაც იძლეოდა. 1915 წელს ინფექციური დაავადებების ეპიდემიასთან დაკავშირებით მან ქედაში არსებული ორსართულიანი სახლის ოთახების მისი წილი უსასყიდლოდ ინფექციური საავადმყოფოს ქსენონს დაუთმო.

რუსეთის ქალაქთა კავშირმა 1915 წლის ოქტომბერში ამ შენობაში გახსნა ეპიდემიური საავადმყოფო, რომელსაც ჰქონდა

12 საწოლი; აქ მუშაობდა ერთი ექიმი, ერთი ფერშალი, სანიტრები, მომვლელები. კავშირის 25 ოქტომბრის სხდომის ოქმში ნაწერილია, რომ ამ დროისათვის აქ ინფექციური ავადმყოფები არ იყვნენ. როგორც სჩანს, შემდომში ეპიდემიური აფეთქება გამწვავებულა, ავადმყოფებიც მოუთავსებიათ, მაგრამ საწოლები აღარ ეყოთ. 1916 წლის 19 იანვრის ჩანაწერებით ირკვევა, რომ საწოლთა რიცხვი 25-მდე გაზარდეს, შესაბამისად მოიმატა პერსონალის რაოდენობამაც. (აჭარის სახ.არქივი, ფ.8, და ფ. ი-66. жюриал БКВС2, 25 октября 1915 г.)

შემდგომ წლებში საწოლებზე მოთხოვნილება კიდევ უფრო გაიზარდა. ამიტომ ყადირმა თავის ძმებს თხოვა საავადმყოფოსათვის დაეთმოთ მათი წილი ოთახებიც.

ამ კავშირის საქმიანობის შესწავლა სცადა ბატონმა აბელ სურგულაძემ, მაგრამ საარქივო საბუთებში ყადირ შერვაშიძის გვარს ვერ მიაკვლია, ამიტომ ბუნებრივია ამ ორგანიზაციაში მის მუშაობაზე ეჭვი დაებადა. ამასთან სამართლიანი სინანულით აღნიშნა, რომ “ბათუმში 1917-1918 წლებში მოღვაწე არც ერთმა ექიმმა, რომელთაგან ზოგმა მოგონებებიც დაწერა, ცალი სიტყვითაც არ მოიხსენია თავისი კოლეგა, სხვათაშორის, ერთ-ერთი პირველი აჭარელი ექიმი ყადირ შერვაშიძე“ (დასახ. ნაშრომი, გვ.27). მთლიანად ვეთანხმები ავტორს, თუნდაც იმიტომ, რომ ზოგიერთ ამ ექიმს პირადად ვესაუბრე და ჩემი ყოველგვარი ცდის მიუხედავად ყადირზე სიტყვა ვერ დავაცდევინე. ამის მიზეზი ჩვენთვის ცნობილია - კვლავ მძვინვარებდა საბჭოთა ცენზურა. რომელიც მენშევიკებთან ურთიერთობაში მყოფ პიროვნებებზე ყოველგვარ მსჯელობას კატეგორიულად კრძალავდა.

რაც შეეხება რუსეთის ქალაქთა კავშირში ყადირ შერვაშიძის მოღვაწეობას, აქ საეჭვო არაფერია. აჭარის სახელმწიფო მუზეუმის ხელნაწერთა განყოფილებაში (ყადირ შერვაშიძის პირადი საქმე) ინახება სავიზიტო ბარათი რუსულ-ქართლ ენებზე, რომელზეც გარკვევით სწერია, რომ “ყადირ ტუფანის ძე შერვაშიძე“ არის სრულიად რუსეთის ქალაქთა კავშირის რწმუნებული ბათუმში“ (იხ. დანართი “დოკუმენტები“). უფრო მეტიც, შესაძლოა ვიფიქროთ, რომ ამ კავშირში ყ. შერვაშიძე შევიდა არა 1916 წელს, როგორც ზემოთ აღვნიშნეთ, არამედ უფრო ადრე, 1915 წლის ოქტომბრამდე, როცა ქედაში საკუთარ სახლში გახსნა რუსეთის ერობის კავშირის საავადმყოფო.

აჭარის სახელმწიფო მუზეუმის ხელნაწერთა ფონდში ინახება ერთი საბუთი-მინდობილობა, რომლის ავტორია ყადირის უფროსი ძმა ზეკერია-ბეგი. ჯერ კიდევ ყადირის სიცოცხლეში, 1919 წლის 25 თებერვალს ზეკერია თავის რძალს ცუცას სწერს, რომ მისი წილი შენობის ქირა არ აუღია და ამ საქმეს მთლიანად ანდობს მას. როგორც ირკვევა უმცროს ძმას უფროსებმაც მიბაძეს და საბოლოოდ მთელი შენობა სტაციონარს გადასცეს, სადაც აგერ ჩვენს დრომდე რაიონული ცენტრალური საავადმყოფო იყო მოთავსებული. იგი 1972 წელს დაანგრეეს და ამ ადგილას ახალი საცხოვრებელი სახლი ააგეს.

საქართველოს დამოუკიდებლობის გამოცხადებამდე ქართველი სოციალ-დემოკრატები და სხვა პარტიები დიდ მნიშვნელობას ანიჭებდნენ ხელისუფლების ახალი სტრუქტურების ჩამოყალიბებისათვის წინასწარი საფუძვლების მომზადებას. ამ მიზნით მნიშვნელოვანი იყო ერობის ინსტიტუტი. როგორც ზემოთ აღვნიშნეთ ბათუმის ოლქში ერობის რწმუნებულის მოვალეობა ყადირ შერვაშიძეს დაევალა, მაგრამ მალე ყველა დარწმუნდა, რომ ეს შეუპოვარი მებრძოლი, ევროპულ განათლებამიღებული, უცხო ენების მცოდნე კაცი, რომელსაც ადგილობრივი მოსახლეობა დიდ პატივს სცემდა და აუფასებდა, უფრო დიდ და მნიშვნელოვან საქმეში გამოდგებოდა.

ბრძოლა საქართველოს ერთიანობისათვის.

პირველი მსოფლიო ომის შემდეგ, როცა განაპირა პროვინციებზე რუსეთის გავლენა შესუსტდა, თავი წამოყვეს ოსმალეთის ემისრებმა და ადგილობრივმა თურქოლოგებმა, რომელთაც მიზნად დაისახეს სამუსლიმანო საქართველოს ტერიტორიების წაგლეჯა და კვლავ ოსმალეთისათვის მიერთება. ამ მზაკვრულ გეგმებში მათ დასაყრდენი ჰქონდათ აზერბაიჯანში მოკალათებულ “საქველმოქმედო საზოგადოებასთან“. საქმე იქამდე მივიდა, რომ ბათუმში ე.წ. “ისლამის კომიტეტის“ დაარსებაც გადაწყვიტეს (ე.მესხია, სამხრეთ-დასავლეთ საქართველოს ისტორიიდან. ბათუმი. 1997. გვ. 8).

დაყოვნება არ შეიძლებოდა. სულეიმან დიასამიძე სათავეში ჩაუდგა ანტიქართული მოძრაობის წინაღმდეგ ბრძოლას და კიდევ ჩაშალა იგი, მაგრამ ეს არ იყო საკმარისი. “ისლამის კომიტეტი” აპოლოგეტებს და პანისლამისტებს უნდა დაპირისპირებოდა მილაკრი ეროვნული ორგანიზაცია, რომელიც ხელში აიღებდა მხარის პატრიოტული მოძრაობის სადავეებს და იქნებოდა საქართველოს ერთიანობის გარანტი სამხრეთ პროვინციებში.

1917 წლის თებერვალში ბათუმში მცხოვრებმა პატრიოტებმა მკენთ “აზი”-ში მოიწვიეს მოსახლეობის წარმომადგენელთა კრება, რომელსაც ქართველ მუსლიმანთა გარდა ესწრებოდნენ ქართველი ქრისტიანები: სიმონ მდივანი, კაპიტონ გოგოლაძე, აპოლონ წულაძე, სერგი გერსამია და სხვ. კრებამ აირჩია “ქართველ მუსლიმანთა კომიტეტი”, რომელშიც შევიდნენ: მემედ აბაშიძე, ჰაიდარ აბაშიძე, ზექერია შერვაშიძე, ყადირ შერვაშიძე, სულეიმან დიასამიძე, ჯემალ ქიქავა, ხასან ვარშანიძე და სხვ. კომიტეტის თავმჯდომარედ მემედ აბაშიძე დაამტკიცეს (იქვე გვ.9).

კომიტეტმა დიდი მუშაობა გააჩაღა ადგილობრივ მოსახლეობაში ეროვნული გათვითცნობიერების, თვითშეგნების შეტანისა და იმ გაბატონებული რწმენის უარსაყოფად, რომელიც საუკუნეების განმავლობაში ეროვნებას და სარწმუნოებას ერთმანეთთან აიგივებდა და უპირისპირებდა. ამავე მიზნით 1917 წლის შემოდგომაზე მემედ აბაშიძის ინიციატივით ჩამოყალიბდა ბათუმის ოლქის მუსლიმანთა საქველმოქმედო საზოგადოება, რომელმაც დიდი მუშაობა გააჩაღა პანისლამისტური საზოგადოების წინააღმდეგ. საზოგადოების თავმჯდომარე და ყველა მისი საქმიანობის ორგანიზატორი იყო მემედ აბაშიძე, ხოლო მისი ერთ-ერთი აქტიური წევრი ზექერია შერვაშიძე. ეს აქტიურობა მას ძვირად დაუჯდა. 1917 წელს კერენსკის მთავრობის დროს ზექერია, მემედ აბაშიძესთან და ჯემალ ქიქავასთან ერთად, სევასტოპოლის საზღვაო კონტრდაზვერვამ დააპატიმრა და ბათუმის ციხეში ჩასვა.

ქართული ეროვნული მოძრაობის დასათრგუნავად ოსმალებმა ძალას მიმართეს. 1918 წლის 1 აპრილს ისინი აჭარაში შემოიჭრნენ. ბათუმი დაიკავეს, შექმნეს ოლქის ახალი ადმინისტრაცია და მოსახლეობის ძარცვა-გლეჯვას და ჭარბევა-აწიოკებას მიჰყვეს ხელი. საოკუპაციო ხელისუფლების მიზანი იყო ბათუმის ოლქი ავტონომიის სტატუსით ოსმალეთის შემადგენლ-

ობაში შეეყვანათ. ოკუპაციიდან ხუთი დღას შემდეგ ახალმა ადმინისტრაციამ ოსმალეთიდან საგანგებოდ ჩამოსულ სამხედრო მინისტრს და ჯარების სარდალს ქალაქის თვითმმართველობის შენობაში დიდი შეხვედრა მოუწყო. ბათუმის საზოგადოებას სახელით სტუმრებს მემედ აბაშიძემ მიმართა სიტყვით, რომელიც შემდეგ ისტორიულ ლოზუნგად იქცა: “აჭარა საქართველია, ბათუმი, როგორც აჭარის ნაწილი, საქართველოში შედის, თქვენ აქ სტუმრები ხართ, სვენ კი მასპინძლები. ამიტომ მოგესალმებით, როგორც სტუმრებს და იმედი გვაქვს მოკლე დროში ბათუმსა და მის ოლქს დატოვებთ“ (სერგი გერსამია, მემედ აბაშიძე, ბათუმი, 1960, გვ. 66,67).

ასეთი გაბედული და პრინციპული გამოსვლა, ბუნებრივია უყურადღებოდ არ დარჩენილა. დელეგაციის წევრები მემედ აბაშიძე, ჯემალ ქიქავა, დაუდ-ფუენდი სირბილაძე (სირაბიძე?), სულეიმან ბეჟანსიძე და ხასან ლორთქიფანიძე დააპატიმრეს და ტრაპიზონის ციხეში ჩასვეს, კომიტეტის დანარჩენი წევრები ჰაიდარ და ზია აბაშიძეები, ყადირ შერვაშიძე, ქემალ ნოღაიდელი, სულეიმან დიასამიძე, ხასან თხილაიშვილი თბილისში გადაიხვეწნენ. 1918 წლის 15 მაისს მათ შექმნეს სამუსლიმანო საქართველოს განმათავისუფლებელი კომიტეტი, რომლის თავმჯდომარედ დაუსწრებლად აირჩიეს მემედ აბაშიძე, დროებითი თავმჯდომარეობა კი ზია აბაშიძეს დაევალა. ეს კომიტეტი შეიქმნა საქართველოს დამოუკიდებლობის გამოცხადების წინ, რაც სერიოზული, ძალზე მნიშვნელოვანი და სასარგებლო განაცხადი იყო.

ქართველი საზოგადოებრიობა, საქართველოს დემოკრატიული მთავრობის მომავალი შემადგენლობა უდიდესი ყურადღებით ადევნებდნენ თვალს მოწინავე თანამომძე მუსლიმან ქართველებს, მათს გმირულ ბრძოლას ეროვნული თვითმყოფადობისა და ქვეყნის ერთიანობისათვის.

ჯერ კიდევ 1917 წლის 22 ნოემბერს საქართველოს ეროვნული საბჭოს ყრილობაზე დელეგატებად აირჩიეს აჭარის წარმომადგენლები. ამიტომ გასაკვირი არაა, რომ ასამდე სხვა ქართველ მამულიშვილს შორის ჰაიდარ აბაშიძე და ყადირ შერვაშიძე ხელს აწერენ საქართველოს დამოუკიდებლობის აქტს, რომელიც დამფუძნებელთა კრებამ შეიმუშავა და მიიღო 1918 წლის 26 მაისს, ნაშუადღევს 5 საათსა და 10 წუთზე. ამდენად ისინი ამ აქტის თანაავტორებიც არიან: “ქართველი ერის დღევ-

ანდელი მდგომარეობა აუცილებლად მოითხოვს, რომ საქართველომ საკუთარი სახელმწიფოებრივი ორგანიზაცია შექმნას, მისი საშუალებით გარეშე ძალის მიერ დაპყრობისაგან თავი გადაირჩინოს და დამოუკიდებელი განვითარების მტკიცე საფუძველი ააგოს“ - ნათქვამია აქტში.

ყადირ შერვაშიძე მთელი თავისი ხანმოკლე სიცოცხლის მანძილზე ამ იდეის ერთგული იყო და სწორედ მის განხორციელებას შესწირა თავი.

განმათავისუფლებელი კომიტეტის რწმუნებული ახალციხეში.

საქართველოს დამოუკიდებლობის გამოცხადებამ და ამ დიდ ისტორიულ მოვლენაში მუსლიმან ქართველთა აქტიურმა მონაწილეობამ დააფრთხო ოსმალთა მოხელეები და პანისლამისტები, მათთან ერთად რენეგატებიც. მათ შორის იყო ჯერ კიდევ ცარიზმისაგან ნაფერებ-ნალოლიაკები, ახლა ოსმალთა მარიონეტადქცეული სერვერ-ბეგ ათაბეგოვი (ქობლიანსკი).

306 იყო სერვერ-ბეგი?

სამცხე-საათაბაგოს ფაშა, ჯაყელების უკანასკნელი შთამომავალი, ფეიზულა-ბეგ ათაბაგის შვილი, რომელსაც “ქობლიანის პრინცს“ ქობლიანსკი-ათაბეგოს უწოდებდნენ. მამამისი ფეიზულა-ბეგი დიდი უძრავ-მოძრავი ქონების მფლობელი და ფრიად გავლენიანი პირი იყო.

ახალციხის საფაშოს იურიდიულად გაუქმების მიუხედავად იგი სამცხე-საათაბაგოს ფაქტობრივი მმართველი-ფაშა იყო და დიდი პოპულარობით სარგებლობდა რუსეთის ადმინისტრაციასშიც. იგი ცარიზმის ერთგული დარჩა სიცოცხლის ბოლო წუთამდე ამ სიტყვის პირდაპირი გაგებით.

1899 წლის 28 ივნისს აბასთუმანში მყოფი მეფის ძე გიორგი ალექსანდრეს ძე რომანოვი ველოსიპედით სეირნობისას გადმოვიარდა და დაიღუპა. პეტერბურგში გასვენებისას კუბოს ქვეშ

მყოფი ფეიზულ-ბეგ ათაბეგოვი ცუდად გახდა. იგი იქვე, სოფელ კარხანის კანცელარიაში მიიყვანეს, სადაც გარდაიცვალა კიდეც. ფეიზულ-ბეგს ცოლად პეკედა ყაზანელი თათრის ქალი, ხოლო მოურავად სომეხი. ფეიზულ-ბეგის მოულოდნელი გარდაცვალების შემდეგ ამ სომეხმა მისი ქვრივი საყვარლად გაიხადა და თავის ჭკუაზე აამოქმედა. ისინი ახალგაზრდა სერვერ-ბეგს აწვეოებდნენ ჭორებს და ქართველებს აძულებდნენ. მოუხედავად ამისა პრინცი ქართველად იზრდებოდა და თავის ეროვნებას სათანადო პატივით ეპყრობოდა.

როგორც ისტორიკოსები თვლიან, დასაწყისში სერვერ-ბეგი ნეკულებრივი მუსლიმანი ფეოდალი იყო და არავითარი მტრობა საქართველოსთან არ ჰქონდა. არც ოსმალეთს ეჭროვდა მაინც-დამაინც, მაგრამ საქართველოს მთავრობის მიერ გამოცხადებულმა აგრარულმა რეფორმამ (მიწების, შენობების ჩამორთმევა და სხვ.) სხვა თავადური წოდების წარმომადგენლებთან ერთად, ისიც დაფრთხო. ამის საბაბი გახდა მამულის დაკარგვის შიში, რამაც ათაბაგთა უკანასკნელი მოპიკანი ქვეყნის წინაღმდეგ განაწყო. სამწუხაროდ, ამ წარჩინებული და საკმაოდ განათლებული პიროვნების ეს განწყობილება აშკარა მტრობაში გადაიზარდა.

როგორც შალვა მაღლაკელიძე თვლის, “ეს გამოწვეული იყო არა ოსმალეთისადმი სიყვარულით, ან ოსმალური ორიენტაციით, არამედ იმ ყოვლად მიუღებელი აგრარული რეფორმის მიზეზით, რომლის ძალით სერვერ ათაბაგი, დიდი მიწათმფლობელი უნდა გადატაკებულიყო. ამ ნიადაგზე მას შეუერთდნენ ბევრი დანარჩენი ბეგებიც“ (ქართველები გერმანული დროშის ქვეშ მეორე მსოფლიო ომში. თბ., 1994. გვ. 249. გამოსცა ვიქტორ რცხილაძემ); ჩვენი აზრით დანარჩენ ბეგებში ბახში-ბეგ მანაბელი და ომარ ყიფიანი (ყაიკი) იგულისხმება.

სერვერ-ბეგი აწყურში ეახლა ახალციხე-ახალქალაქის მხარეთა ჯარების უფროსს, გენერალ კ.მაყაშვილს, რომელიც გენერალ-გუბერნატორის უფლებებით იყო აღჭურვილი და განუცხადა, რომ შექმნა “სამხრეთ-დასავლეთ კავკასიის მთავრობა“. არის მისი მეთაური და მოითხოვა ბრძანებების შესრულება. ცხადია, ქართველმა გენერალმა ამაზე კატეგორიული უარი განუცხადა და უთხრა, რომ ის სცნობს მხოლოდ საქართველოს მთავრობას და ასრულებს მის მითითებებს. ამ დროისათვის კ.მაყაშვილთან მუსლიმან ქართველთა ცხენოსან დივიზიას

პოლკოვნიკი ყადირ შერვაშიძე მეტაურობდა და სერვერ-ბეგის რაზმებთან უშუალო შეტაკებებიც მას უხდებოდა. გაბოროტებულმა ათაბაგმა თავისივე მშობლიურ მხარეს, ისტორიულ სამცხე-საათაბაგოს შეუსია მოთარეშე რაზმები. მოსახლეობას აშინებდნენ და აიძულებდნენ რათა ოსმალეთისათვის ერთგულება გამოეცხადებინათ და ამ ქვეყნის ხელქვეით დარჩენილიყვნენ.

სერვერ-ბეგის "მთავრობა", როგორც აღვნიშნეთ, ამიერკავკასიის დასავლეთ ნაწილის ყარსის, არტაანის, ბათუმის, ახალციხის და ახალქალაქის მუსლიმანთა (მათ შორის ქართველთა) გაერთიანების პრეტენზიებს აცხადებდა, რითაც ლამობდა განეხორციელებინა მუსავატელთა მზაკვრული იდეა, ზღვაზე ნავთობის გასატანი გზების გამაგრებას რომ გულისხმობდა. აღვირახსნილმა ათაბეგოვმა კავშირი დაამყარა დაშნაკებთანაც. ახალციხელი ზ.დიდიმამიშვილის დღიურებით ირკვევა, რომ დაშნაკებთან ერთად სერვერ ბეგს დაურბევია ოლთისისა და ახალციხის სოფლები. მარტო სოფელ აბში მოთარეშე რაზმებს ორმოცი სახლი დაუწვავთ, ქართველი მოსახლეობის დიდი ნაწილი ძირითადად მესხები, 1400 კაცამდე დაუხოციათ. დანარჩენი მოსახლეობა ქართულ რეგულარულ ჯარს გადაურჩენია (ზ.დიდიმამიშვილი. ახალციხის დღეები (1918წ.) აჭარის სახ. მუზეუმის ხელნაწ. ფონდი. საბ. №107).

მესხეთისა და ჯავახეთის მოსახლეობის ასე მიტოვება აღარ შეიძლებოდა. სამუსლიმანო საქართველოს განმათავისუფლებელმა კომიტეტმაც ოზურგეთის მსგავსად თავისი განყოფილება შექმნა სამცხე-ჯავახეთშიც, რომლის რწმუნებულად ყადირ შერვაშიძე დანიშნა. როგორც უკანასკნელ ხანებში გამოვლენილი დოკუმენტებით დასტურდება "კომიტეტის ერთ-ერთი ყველაზე აქტიური და მამაცი წევრი"-ს ყადირი მარტო რწმუნებულის მოვალეობის შესრულებით არ იფარგლებოდა. მან აქ შექმნა საკმაოდ დიდი სამხედრო ქვედანაყოფი, ცხენოსანთა დივიზია - ქართული რეგულარული ჯარის ერთი შემადგენელი ნაწილი, რომელსაც თავად ჩაუდგა სათავეში. დადასტურებულია, რომ მას ამ დროს საქართველოს სარდლობამ პოლკოვნიკის სამხედრო წოდება მიანიჭა. საქართველოს დემოკრატიული მთავრობის განკარგულებ

ბით ყადირ შერვაშიძე დაინიშნა მთავრობის საგანგებო რწმუნებულად ახალციხეში, ზემო აჭარასა და ფოცხოვის უბანში (ა.სი-ლაგაძე, ვ.გურული. საქართველოს განუყოფლობისათვის ბრძოლის ისტორიიდან, ნაკ.1, თბ. 1966, გვ. 55), ე.ი. იმ მხარეებში, სადაც მეტად იგრძნობოდა თურქოფილთა ზეგავლენა.

მოსახლეობაში მუშაობის გაშლის, მათ შორის ეროვნული თვითშეგნების ამადლების და მკვიდრი მოსახლეობიდან თავდადებული თანამებრძოლების შეგროვების მიზნით ე.შერვაშიძე; ხშირად მოგზაურობდა აჭარის სოფლებში, რაც დიდ რისკთან იყო დაკავშირებული. მოწინააღმდეგენი დიდ ფაოერაკებს უწყობდნენ. არაერთხელ სცადეს თავს დასხმოდნენ, მაგრამ გულადი და ჭკვიანი ე.შერვაშიძე ვერ მოიხელთეს და ყველა მზაკერული გეგმა ჩაეშალათ. სამუსლიმანო საქართველოს განმათავისუფლებელმა კომიტეტმა ყადირ შერვაშიძის პირადი აქტიობით თავისი პირველადი უჯრედები და ორგანიზაციები გახსნა ქველაში (ზ.შერვაშიძე), ჭვანაში (დ.სურმანიძე), დიდაჭარაში (ი.სირაძე), ხიხაძირში (ქ.გაბაიძე), ხულოში (გ.ბოლქვაძე). სულ მაშინდელ ბათუმის ოლქში 11 განყოფილება გაიხსნა (ე.მესხია. დასახ. ნაშრომი, გვ. 51,52).

დაეუბრუნდეთ ქართველ მუსლიმანთა სამხედრო ქვედანაყოფებს, როგორც ზემოთ აღვნიშნეთ მათი შექმნის მიზანი იყო ყველა ოკუპანტის და აგრესორის აღაგმვა და საქართველოს ტერიტორიიდან გაძევება. ამ სამხედრო ფორმირებების შექმნის თარიღებს და მეთაურების ვინაობას შეეხნენ ე.მესხია და ა.სურგულაძე.

ე.მესხიას აზრით ოზურგეთის ქართველ მუსლიმანთა ბატალიონი შეიქმნა არაუადრეს 1918 წლის აგვისტო-სექტემბრისა. ჩვენი აზრით, დაახლოებით იმავე დროს ჩამოყალიბდა ქართველ მუსლიმანთა ცხენოსანი დივიზია ახალციხეში. ამგვარად პირველ რიგში ამ სამხედრო ქვედანაყოფების სახელწოდებები უნდა განვასხვაოთ, რათა დავადგინოთ მათი მეთაურები. ოზურგეთის ბატალიონს გენერალი ასლან აბაშიძე მეთაურობდა. ახალციხის დივიზია უშუალოდ პოლკოვნიკმა ყადირ შერვაშიძემ ჩამოაყალიბა, სათავეშიც თავად ჩაუდგა და სიკვდილამდე მისი მეთაური იყო. ე.მესხია ზია აბაშიძის ანგარიშზე დაყრდნობით თვლის, რომ 1919 წლის 15 აგვისტოს შექმნილი ახალი საჯარისო ფორმირების-ესკადრონის მეთაურად მოიწვიეს მაიორი ბახნი-ბეგ მანაბე-

ლი. ამ დროს ყადირი ცოცხალი აღარ იყო, ამიტომ ის ესკადრონის უფროსი ვეღარ იქნებოდა. ქართული ჯარის ქვედანაყოფის უფროსად ბახნი ბეგ მანაბელის მოწვევა აბელ სურგულაძეს საექვოდ მიანიბა, რადგანაც “ბახნი მანაბელი, როგორც ვერმანხტის ყოფილი გენერლის, შალვა მალლაკელიძის მოგონებიდან და სხვა მასალებიდან სნანს, ძალზე ორჭოფულად მოქმედებდა და მესხეთ-ჯავახეთის სომხებისადმი მტრული დამოკიდებულებით რეგიონში კიდევ უფრო ძაბავდა პოლიტიკურ სიტუაციას”.

ჩვენ ვეთანხმებით აბ.სურგულაძეს, რადგანაც ყველა ჩვენი ინფორმატორი (ა.ჯიჯავაძე, ჯ.უღალავა, ნ.ბახტაძე და სხვ.) ბახნიბეგ მანაბელს თვლიან რენეგატ ქართველად, ოსმალური ორიენტაციის პიროვნებად, რომელიც სერეკერ-ბეგ ჯაყელი ქობლიანსკის მსგავსად იქეთ იხრებოდა, ვინც მას ფეოდალურ პრივილეგიებს შეუნარჩუნებდა. იმ დროს ასეთად, ოსმალეთის ხელისუფლება ითვლებოდა. უფრო მეტიც, ყველა ჩვენი ინფორმატორი უპეკველად თვლის, რომ ყადირის ნაადრევ დაღუპვაში სწორედ ბახნი მანაბლის ხელი ურევია. მასთან პქონდა ყადირს პირისპირ შეტაკება, რაც კინალამ სისხლის ღვრით დამთავრდა და სწორედ მან მიუგზავნა დაყოვნებითი საწამლავით ვილაც მსახური ქალი.

სათქმელია ისიც, რომ ყადირის გარდაცვალებიდან (8 მაისი 1919) ესკადრონის შექმნამდე (15 აგვისტო 1919) ძალზე მოკლე დროა, ამიტომ კომიტეტის ხელმძღვანელობამ შესაძლოა კარგად არ იცოდა ბახნი-ბეგ მანაბლის მიერ ჩადენილი დანაშაულობანი, ამიტომ კატეგორიულად ესკადრონის მეთაურად მისი მიწვევის გამორიცხვა არ შეიძლება.

ვინ იყო ბახნი ბეგ მანაბელი?

ეს იყო ადიგენელი ბეგი, რომელსაც ცოლად ჰყავდა იქაური სულეიმან ერისთავის (თორნიკე ერისთავის პირდაპირი შთამომავლის) დაი. ფლობდა სარწყავ წყალს და უნაწილებდა მოსახლეობას. იყო დიდი ტანის წარმოსადგეი კაცი. ქართველობდა კიდევ. ამიტომ შ.მალლაკელიძემ კომისრად დანიშნა. ტანსაცმელი და იარაღიც მისცა და პოლკოვნიკობაზე წარადგინა. მას ასევე პატივისცემით ეყურობოდა გ.კვინიტაძეც.

1917 წელს იგი გამოცხადდა შ.მაღლაკელიძესთან წინადადებით, რომ უფლება მოგვეცი ახალციხის მხრიდან სომხები გავეძევოთ და ამოვქვლიტოთ. იმ დროს ახალციხეში მართლაც ბატონობდნენ სომხები. როგორც ზემოთაც ვთქვით, თავად სერვერ ბეგის დედის, ყაზანელი თათრის ქალის უკანონო ქმარი სომეხი იყო და ახალგაზრდა სერვერ-ბეგს განაწყობდა ქართველების წინაარმდეგ.

ბახში-ბეგმა აწყურის, აბასთუმნის, ადიგენის და სხვა რაიონებიდან შეკრიბა წარმომადგენლები (სერვერ-ბეგ ათაბაგი, ომარ-ბეგ ყოფიანი (ფაიკი) ახმედ- ალა ფეფინაშვილი) და ამ დელეგაციით წარუდგა შ.მაღლაკელიძეს, სომხების ამოუღებელი მოთხოვნით. მათ რა თქმა უნდა უარი მიიღეს და საქმე კინალამ სისხლისღვრით დამთავრდა, შემდეგ გაირკვა, რომ ამ საქმის ინიციატორი ყოფილა სპარსული წარმოშობის პოლკოვნიკი კაჯარი, რომელიც რუსებს გადაებირებინათ და ახალციხის ფაშობას შეპირებოდნენ. სწორედ მან მოაწყო მაზრის უფროსების შეთქმულება სომხების წინააღმდეგ. შ.მაღლაკელიძემ წარმომადგენლები დააპატიმრა და მღელვარებაც ჩაცხრა.

საყურადღებოა, რომ ამ დელეგაციაში მონაწილეობდა ზია-ბეგ აბაშიძეც, ჩვენთვის სრულიად მოულოდნელი აღმოჩნდა მისი დიამეტრალურად საწინააღმდეგო პოზიცია სამუსლიმანო საქართველოს მომავალი ბედის გადაწყვეტილსა. შ.მაღლაკელიძის ჩანაწერებით, რომლებიც აუცილებელ გადამოწმებას საჭიროებს, ზია-ბეგ აბაშიძე ქართული ცხენოსანი რაზმის უფროსის თანაშემწე ყოფილა. 1917 წლის ნოემბერში შალვა მაღლაკელიძესთან, როგორც სამუსლიმანო საქართველოს რწმუნებულთან გამოცხადებულა მაჰმადიან ქართველთა დელეგაცია ზია-ბეგ აბაშიძის მეტურობით, რომელსაც შემდეგი ულტიმატიური მოთხოვნები წაუყენებია: “1. ქალაქი ახალციხე გამოემცხადებინა მთავარ ქალაქად სამცხე-ჯავახეთის და არტაანის ოლქისათვის. 2. მიმელო ახალციხის მაგიერ სახელი “ახისხა“, 3. გადაიქცა თავისუფალი ყაზარმები მაჰმადიან მოხალისეთა განკარგულებაში, 4. დამეთმო ოფიცერთა საკრებულოს შენობა მერვე მაჰმადიანთა პოლკის შტაბისათვის. 5. გარნიზონის უფროსად ქართველის მაგივრად დამენიშნა პოლკოვნიკი კაჯარი, რომელიც ამ მერვე პოლკის უფროსად იყო დანიშნული თბილისიდან და რომელსაც მე დღემდე ახალციხეში არ ვუშვებდი, 6. 24 საათით მე და ჩემი

სამხედრო ძალები გადავსულიყავით ქალაქის ძველ ნაწილში, რაბათში, 7. თუ ამ წინადადებას არ მივიღებდი, მაჰმადიანების შეიარაღებული ძალები დაუყოვნებლივ ქალაქში შემოიჭრებოდნენ და სომხობასთან ერთად ქართველი ქრისტიანებიც იქნებოდნენ ამოხოცილხ... დელეგაცია იმ წუთშივე დავაპატიმრე“ (გვ. 242,243).

ამგვარად სამცხე-საათაბაგოს ფეოდალებმა სერგერ-ბეგ ჯაყელმა, ბახში-ბეგ მანაბელმა, ომარ-ბეგ ყიფიანმა (ფაიკი), მისმა დისშვილმა ახმედ-ალა ფეფინაშვილმა, რომელთაც შიგადაშიგ მხარს უჭერდნენ და ცოცხალი ძალითაც ეხმარებოდნენ აჭარელი ბეგები ჯემალ-ბეგ ხიმშიაშვილი და ზია-ბეგ აბაშიძე, ოსმალებს გაუადვილეს ამ უძველესი მხარის დაკავება. ზაქარია დიდმამიშვილის თქმით 1918 წელს “ახალციხე-ახალქალაქის მახრები ოსმალებმა ადგილობრივი ბეგების ჩაგონებით დაიპყრეს“.

აქვე ვიტყვი, რომ ამ ბეგებს შორისაც არ იყო ერთგვაროვანი აზრი. მათი რაქციული ნაწილი (სერგერ-ბეგ ჯაყელი (ქობლიანსკი), ომარ ყიფიანი (ფაიკი) და სხვ.) მოითხოვდნენ ძველი მესხეთის ტერიტორიაზე ახალი სახელმწიფოს შექმნას, ხოლო მეორე ნაწილი (ბახში-ბეგ მანაბელი, ხალით-ბეგი და სხვ.) თვლიდნენ, რომ ქართული მიწები კვლავ დამოუკიდებელ საქართველოს უნდა დაუბრუნდეს, იყო მესამე ნაწილიც, (ყ. შერვაშიძე) რომელსაც მიაჩნდა, რომ მესხეთ-ჯავახეთი საქართველოში ავტონომიური უფლებებით უნდა შესულიყო (შ.ლომსაძე, მესხები. თბ. 1997. გვ. 287,288,294).

ალბათ მართლაც სწორი იქნებოდა, ამ მხარეს ავტონომიური უფლებები მინიჭებოდა. მაშინ აჭარის მსგავსად, მრავალი უბედურებაც ასცდებოდა, არ დაცარიელდებოდა და კულტურულ-ეკონომიურადაც დაწინაურდებოდა.

გენერალ შალვა მაღლაკელიძის თქმით, ბახში-ბეგ მანაბელი იყო “ოსმალეთის სასარგებლოდ მომუშავე“, რომელიც “საქართველოს დამოუკიდებლობის დროს, თავისი ქვეყნის სამსახურს შეუდგა და გულწრფელადაც“ (გვ. 230).

სხვათაშორის ადიგენელი სულეიმან ერისთავის შვილს 24 წლის ბეხრი-ბეგს ცოლად შეურთავს ხულოელი თემურ-ბეგ ხიმშიაშვილისა და ყუდრეთ-ხანუმ სურმანიძის ქალი სურიე, რომელიც ამ დროს 20 წლისა იყო. ეს მოხდა დაახლოებით 1916 წელს. ამ ქორწილში საპატიო სტუმრად ყოფილა რუსეთის სრუ-

ლიად ახალგაზრდა ოვიცერი შალვა მალლაკელიძე. იგი ბეხრი-ბეგის “კმადედ“ დაუნიშნავთ და ხულოში ზოგიერთ საქორწილო რიტუალში (მზითვის აღწერა და სხვ.) მონაწილეობაც მიუღია. ამგვარად იგი ერისთავთა ნათესავი გაიხდარა. ქალებთან გამო-სამშვიდობებლად, როცა ბახში-ბეგ მანაბელი მათს ოთახში შემოიძღვა, “ქალბატონმა მანაბლისამ პირველმა აიხადა რიდე და მეჩვენა ღია სახით, შემდეგ სწვდა რძალს, აუწია საფარი და ტკბილის ღიმილით ორივეს ყავით გაგვიმასპინძლდა“ (იქვე, გვ.234).

წესის მიხედვით სტუმარს გამომშვიდობებისას პატარძლისათვის ფული უნდა ენუქებინა, მაგრამ შალვას მოერიდა და საჩუქარი თავად ბახში-ბეგს გაატანა, რომელმაც სამაგიეროდ გამოუტანა პატარძლის საჩუქარი. “თვით რძალის მიერ დაგვირ-შტეებული და მოქარგული ორი პერანგი, ორი პირსახოცი. თურმე ამ საჩუქარს თვით რძლისაგან მივიღებდი, რომ გამებედნა და ფული დროზე თავის ადგილას დამედო“ (იქვე) - სწერს შ.მალლაკელიძე.

ამასობაში რუსეთის იმპერატორი დაამხეს და დროებითი მმართველობა (მთავრობა) დაამყარეს. ახალციხის ქალაქის თავმა მოსესიანცმა და მაზრის უფროსმა გუდიევმა (ინგუშმა), რომლებიც კარგად იცნობდნენ შალვა მალლაკელიძეს, თავიანთი უფლებამოსილება მოიხსნეს და მაზრის მოსახლეობის ბედი მას მიანდეს. ერთი თვის შემდეგ კი იგი ცენტრალურმა ხელისუფლებამ დანიშნა სამხედრო და სამოქალაქო საქმეების საგანგებო რწმუნებულად ახალციხე-ახალქალაქის მაზრებში და არტაანის ოლქის ფოცხოვის მხარეში. ახალციხეში შალვა მალლაკელიძემ შექმნა სამაზრო კომისარიატი, რომელშიც სანდო და გავლენიანი ადგილობრივი მოხელეები შეიყვანა.

აუცილებელი იყო ქართული სამხედრო ნაწილის, ე.წ. “არტაანის რაზმის“ შედგენა, რომლის მიზანი იყო წესრიგის დაცვა და გაბოლშევიკებული რუსეთის ჯარისკაცების განიარაღება. ეს გადაწყვეტილება მალე გავრცელდა, რის შემდეგ ახალციხეში თავისით გამოცხადდნენ რუსეთის არმიის ყოფილი ქართველი ოფიცრები: კობეშავიძე, კაჭახიძე, ვანნაძე, აბაშიძე და სხვები. მათ შორის იყო ყადირ შერვაშიძე. რომელსაც მაშინ პოდპოლკოვნიკის წოდება ჰქონდა. სწორედ მას დაევალა ცხენოსანი დივიზიის შედგენა. აქვე მოგვიანებით ჩამოვიდა ზია-ბეგ აბაშიძე, რომელიც ცხენოსან დივიზიაში უფროსის თანაშემწის მოვალეობას ასრულებდა.

სამაზრო კომისარიატის შემადგენლობა არაერთგვაროვანი იყო. უმრავლესობა (არა ქართველები) თურქულ ორიენტაციას ადგენენ, ერთხანს მათვე მიემხრო კომისარი ბახში-ბეგ მანაბელიც.

1918 წლის მარტის დასაწყისში თბილისის მთავრობამ შალვა მაღლაკელიძე გაიწვია და მისი მოვალეობა გენერალ ბალო მაყაშვილს დააკისრა (იგი შემდეგ ბოლშევიკებმა წყალში ჩაახრჩვეს).

ქართველი სარდლები სომეხთა ხოცვა-ჟლეტის წინააღმდეგნი იყვნენ და ყოველმხრივ იცავდნენ მოსახლეობას, მაგრამ მათი წარმომადგენლები ნიადაგ ცდილობდნენ რუსებთან კავშირით მესხეთ-ჯავახეთში გაბატონებულიყვნენ. ასეთი მოძრაობა სწორედ ბახში-ბეგ მანაბელმა ჩააქრო და ქართველ სამხედრო მოხელეთა შორის ავტორიტეტიც მოიპოვა (შ.ლომსაძე, მესხები, 303,304). სხვათაშორის ბახში-ბეგ მანაბელი შეებრძოლა ჟლობას ცხენოსან ნაწილს, რომელსაც ერთხანს ბორჯომისაკენ დაახვეინა.

ასეთი ცვალებადი იყო ბახში-ბეგ მანაბლის მოქმედება. ეს ძველი ქართველი ფეოდალი თავის აზრებს იცვლიდა იმის მიხედვით თუ საით დაუბერავდა მისთვის სასარგებლო ქარი. ბუნებრივია ასეთ პიროვნებასთან საერთო ენას ვერ გამოናხავდა ისეთი პირდაპირი, მტკიცე და ერთჯერ არსებული სწორი გზით მავალი კაცი, როგორც იყო ყადირ შერვაშიძე. ბახში ბეგ მანაბლის ასეთმა ორმაგმა თამაშმა განაპირობა მისი საბოლოო დაპირისპირება ყადირ ბეგ შერვაშიძესთან.

როგორც სამხედრო მოღვაწეს შეეფერება, ამ დროისათვის ყადირი ფორმალურად სოციალ-დემოკრატიული პარტიის წევრად ითვლებოდა, ფაქტობრივად ყველა პოლიტიკურ პარტიას ჩამოშორდა და დივიზიაში თავისებური წესი შემოიღო. იგი არ იკარებდა პოლიტიკურ მოღვაწეებს და საერთოდ ყოველგვარ პოლიტიკურ მუშაობას ჯარში კრძალავდა. მისი მიზანი მხოლოდ სამშობლოს დაცვა-გათავისუფლება იყო.

ცხენოსანმა დივიზიამ ელვისებური დარტყმებით შეავიწროვა სერვერ-ბეგის მოთარეშე რაზმები და ისინი რამდენიმე ათეული კილომეტრით გადარეკა. საბრძოლო ზონაში უმწეოდ დარჩენილი მოსახლეობა, მოხუცები, ბავშვები და ქალები აქედან გაიყვანა, ბორჯომის მახლობლად შედარებით უშიშარ ზონაში გახიზნა და

ამით დაახლოებით 2000 სული მშვიდობიანი მოსახლეობისა უეჭველ დაღუპვას გადაარჩინა.

ახალციხეში ყოფნისას ყადირ შერვაშიძემ გამოაქვეყნა გან-
მათავისუფლებელი კომიტეტის მიმართვა მუსლიმანი ქართველე-
ბისადმი. (გაზ. "ერთობა" №71. 28 მარტი. 1918 წ.), რომელიც
ცალკე ფურცლებადაც დაიბეჭდა ქართულ და რუსულ ენებზე. ეს
არის ოსმალ ხელისუფალთა და ადგილობრივ რენეგატთა წინა-
აღმდეგ აშკარა მოწოდება. მისი ავტორი მხურვალედ უჭერს
მხარს დამოუკიდებელი საქართველოს შექმნა-განამტკიცების იდ-
ეას. ქართველი ხალხის გაერთიანებას და საქართველოს ტერიტ-
ორიიდან უცხოელთა განდევნას. ამ ფურცლის ერთად-ერთი
ეგზემპლარი ჩენახულია აჭარის სახელმწიფო მუზეუმში. მისი
ტექსტი ჩვენ მთლიანად პირველად გამოქვეყნეთ 1989 წელს
(იხ. "ლიტერატურული საქართველო", №27, 7 ივლისი, გვ. 11)
აი ისიც:

მონოღეა მუსლიმან ქართველებისადმი

ძმებო მუსლიმანო ქართველებო! თურქების უღელი ექესი
თვის მონობაში ყოფნის შემდეგ მოგხსნათ კისრიდან საქარ-
თველოს დემოკრატიული რესპუბლიკის ჯარებმა. ოსმალთაგან
დატანჯულმა ხალხმა ძლივს ამოისუნთქა თავისუფლათ,
ხალხის მტრები, ოსმალეთის მოსყიდული აგენტები, თქვენ
გაქეზებდნენ ქართველების წინააღმდეგ, გაგონებდნენ
თითქოს საქართველოს ჯარები მოდიოდნენ თქვენს გასანად-
გურებლად და ასაოხრებლად. მაგრამ დღეს თქვენ თვითონ
დაინახეთ, რომ მთელი საქრისტიანო საქართველო ჩვენ გვეყ-
რობა, როგორც თანასწორუფლებიან ძმებს, ამყარებს წესრიგს
და, მომავალში ჩვენზეა დამოკიდებული, თუ როგორ
მოვანყოფთ ჩვენ ცხოვრებას. ექესი თვის ბატონობის დროს
თურქებმა ნათლად დაგვანახვეს, თუ რა სურდათ მათ ჩვენგან,
ძმებად მოვიდნენ ჩვენთან, თუ მტრებად.

ძმებო მუსლიმანებო, ქართველებო! ვერც ერთი მტერი ვერ
გვიზამდა მას, რაც ჩვენ თურქებმა და მისმა მოსყიდულმა პირ-
ებმა გვიყვეს: შებიღნეს ჩვენი წმინდა სჯული და პატიოსნება
, სოფლის მეჩეთები აავსეს ნაპარავი და ნაძარცვი საქონელით,
მთელი თვეები ხალხს მიუხსპეს საშუალება აესრულებინათ თა-

ვისი ლოცვის საქმე. განა ამის მსგავსს რასმეს სწადის საქართველოს მთავრობა? არა, ძმებო მუსლიმანებო, საქართველოს მთავრობა არ ერევა ჩვენი სინდისის, სჯულის საქმეებში. მან საქვეყნოდ მიანიჭა სამუსლიმანო საქართველოს ფართო ავტონომია. ახალციხის ჯამე... საქართველოს მთავრობამ ხელუხლებელი დაუტოვა მუსლიმან ქართველებს. დღეს ახალციხის მუსლიმან ქართველების სიხარული და ზეიშია, მაგრამ, ძმებო ახალციხელებო, იქ თქვენი ძმები აჭარლები ისევე მონობაში არიან. თურქების აფიცრები და ასკერები დევნიან ჩვენს მეზობლებს აჭარლებს. გზააბნეული ოსმალეთი, რომელიც დამარცხდა ბრძოლაში, ჩვენში ცდილობს ეხლა მომხრეების შოვნას და აბრიყვებს ხალხს, მარა განა თქვენ არ დაგიხოცეს როზგებით ძმები? განა თურქები არ გართმევდნენ პურს, კართოფილს და უფასოდ არ მიყავდით ბეგარაზე? განა ცოტა დაგეკარგათ შინაური ოთხფეხი? ოსმალებს მიყავდა თქვენი შვილები ჯარში, არ აცმევდა მათ ტანზე და ფეხზე, სტანჯავდა ახალგაზრდებს და ხარჯს უფასოთ ისევე თქვენგან კრებდა.

საქართველოს მთავრობას კი ჯარში არ მიყავს მუსლიმანი ქართველობა. დღეს თქვენ ახალციხის მუსლიმანები თავისუფალი ხარო, მარა თქვენი ვალია დაეხმაროთ უბედურ აჭარა-ქობულეთს მონობის უღელის მოხსნის საქმეში. მთელი სამუსლიმანო საქართველო თავის ძმა ქართველ ქრისტიანებთან ერთად უნდა იყრიდნენ ერთ ოჯახში თავს.

გაუმარჯოს თავისუფალ სამუსლიმანო საქართველოს დამოუკიდებელ საქართველოში!

გაუმარჯოს აჭარა-ქობულეთის განთავისუფლებას!

გაუმარჯოს ახალციხის მუსლიმან და ქრისტიან ქართველთა ძმობას.

გაუმარჯოს სამუსლიმანო საქართველოს განმათავისუფლებელ კომიტეტს!

სამუსლიმანო საქართველოს განმათავისუფლებელი კომიტეტის რწმუნებული ახალციხეში

შადირ უმერკაშოძე.

ცხენოსანთა დივიზიის მეთაური

ცხენოსანთა დივიზიაში ყადირს შემოკრებილი ყავდა პარტიოტი ქართველები. აქ მისი ადიუტანტი იყო გიგუშა ღვებუაძე (იგი 1937 წელს დახვრიტეს). იყვნენ სხვა ხანდო ახალგაზრდებიც, უპირატესად აჭარიდან. ერთ-ერთი მათგანია ბათუმელი ახმედ ჯიჯავაძე, რომელთანაც ჩვენ პირადად ვისაუბრეთ ჯერ კიდევ 1967 წელს. მან თქვა, რომ იგი ყადირ შერკაშიძემ თავის თანაშემწედ დანიშნა და მართავდა ახალციხის განყოფილების საქმეებს. მნიშვნელოვანი მოვლენებიდან ხანდაშემუღმა ახმედმა გაიხსენა ქართველი ჯარისკაცების შეხვედრა გრიგოლ ვეშაპელთან, რომელიც პოლიტიკური აგიტაციის და ჯარის რეორგანიზაციის მიზნით საგანგებოდ ახალციხეში ჩასულა. იგი ნოე ქორდანიას მოადგილე და ეროვნულ-დემოკრატიული პარტიის ერთერთი ლიდერი იყო. საყურადღებოა, რომ საქართველოს მასინდელი მთავრობის ზოგიერთი მოხელე მიუღებლად თვლიდა რეგულარული ჯარის შენახვას და მთელს იმედებს სახალხო მილიციაზე ამყარებდა. ამის შესახებ 1918 წლის თებერვალში ნოე ქორდანიას სეიმის ერთ-ერთ სხდომაზე უთქვამს: “ყველა შეიარაღებული ძალები, ყველა ეროვნული ნაწილები უნდა დაკომონილონ სეიმს და იმ ორგანოს, რომელთაც სეიმი შექმნის. ჩვენი ცენტრალური საერთო მთავრობა ეს სეიმი და არა ის შტაბები, რომელიც დღეს ჯარს უდგანან სათავეში. არსად ქვეყანაზე არ არსებობენ ეროვნული ნაწილები. ეს ჩვენ მოგვიხდა, როცა ჯარი სტიქიურად სახლში გაეშურა, ეროვნული ნაწილების შედგენას ჩავეჭიდეთ. დღეს კი საუბედუროდ, ამ ნაწილებისათვის იარაღის აყრა და ზოგჯერ გარეკვაც გვიხდება. ეროვნული ჯარები უნდა გაუქმდეს. უნდა მოეწყოს ტერიტორიული ჯარები, რომლებშიც განსაზღვრულ ტერიტორიაზე მცხოვრები ყველა ერები შევლენ. აქ შეიძლება მუსლიმანებისათვის გამოწკლისი მათი ზნე-ჩვეულებების მიხედვით, მათ მიეცემა ცალკე სამზარეულო და ცალკე სადგომი... დემოკრატია და მუდმივი ჯარი წარმოუდგენელია... ერთადერთი გზა მისი თანდათანობითი დაშლა და სახალხო მილიციის შედგენაა“. (“ერთობა“, №40, 18 თებერვალი, 1918).

ქვეყნის მეთაურის ამ ნაბიჯებს არ იზიარებდნენ ქართველი პოლიტიკოსები. რევაზ გაბაშვილის აზრით, “ნოე ქორდანიას თა-

ვისი საკუთარი ჯარისა ყოველთვის უფრო ეშინოდა, ვიდრე მტრისა“, ამის დასასაბუთებლად მას მოჰყავს მაგალითები, როცა 1918 წელს გავიმარჯვეთ სომხებზე, მთავრობამ ჯარი დაშალა, გავიმარჯვეთ ოსებზე, ახალციხელ რენეგატებზე, მთავრობამ ჯარი დაშალა და გადააყენა მთავარსარდალი; 1920 წელს გავიმარჯვეთ რუსებზე აზერბაიჯანში, მთავრობამ ჯარი დაშალა და გადააყენა გამარჯვებული მთავარსარდალი, გენერალი გ.კვინიტაძე (რ.გაბაშვილი. კ. გოგუაძე. “დაბრუნება“. გ. შარაძის გამოცემა. ტ.3. თბ. 1992, გვ. 232,315).

ამგვარად ნოე ჟორდანიას, რომელიც სამი თვის შემდეგ საქართველოს მთავრობის თავმჯდომარე გახდება, კვლავ მოითხოვს ეროვნული საჯარისო ფორმირებების და მათი შტატების დაშლას და “ტერიტორიული ჯარების“ შექმნას. გამოდის, რომ იმერეთს, შიდა ქართლს, ხევსურეთს, სვანეთს, აჭარას თავისი ჯარი უნდა ჰყოლოდა. როგორც სჩანს გრ.ვეშაპელიც სწორედ ამ მიზნით იყო ჩასული ახალციხეში.

აჭარის სახელმწიფო არქივში (ფ.10, არქ. (23) 10) წავაწყდით ცნობას იმის შესახებ, რომ ახმედ ჯიჯავაძე ყადირთან ერთად ბათუმის გიმნაზიაში სწავლობდა. იგი 1907 წლის 13 მაისს მოსამზადებელი კლასიდან გადაიყვანეს პირველ კლასში. იმავე წლის 18 დეკემბერს ყოფაქცევაში დაშვებული დარღვევის გამო გიმნაზიიდან დაითხოვეს. მამის შახბაზ ჯიჯავაძის თხოვნით 1908 წლის 16 იანვარს კვლავ აღადგინეს გიმნაზიის პირველ კლასში.

სწორედ ამ ახმედ ჯიჯავაძის თქმით ყადირმა იცოდა საქართველოს მთავრობის ზოგიერთი ხელმძღვანელის აზრი. ამიტომ სანამ სტუმარი (გრ. ვეშაპელი, რ.ს.) იტყოდა რასმე, მან განაცხადა: “ჩვენი ჯარის მიზანია საქართველოს ტერიტორიიდან უცხოელ დამპყრობთა განდევნა და არა რაიმე პოლიტიკური საქმიანობაო“. ამით მან ხაზი გაუსვა, რომ სანამ არსებობს გარედან შემოჭრის საშიშროება, ქვეყნისათვის რეგულარული ჯარიც აუცილებელიაო. შემდგომში განვითარებულმა მოვლენებმა და ჩვენი ცხოვრების ლოგიკამ მთლიანად დაადასტურა დივიზიის ახალგაზრდა მეთაურის ეს გამონათქვამი. სხვათაშორის, ყადირის დივიზიის მიზნებსა და ამოცანებზე ზუსტად იგივე გაიმიერთა მეორე ჩემმა ინფორმატორმა, ბათუმელმა ჯემალ ფალაქამ: “ყადირის დივიზიონი არცერთ პოლიტიკურ პარტიას არ ირევდა

საქმეში. იგი მხოლოდ ძალისმიერ ბრძოლებს აწარმოებდა თურქთა წინააღმდეგ. ამით ყადირის ხელქვეითი ძირფესვიანად განსხვავდებოდნენ სხვა ნაწილებისაგან“ (მოგონება ჩვენთან ინახება).

სიტყვამ მოიტანა და ვუიქრობ უინტერესო არ იქნება ჯემალ ფაღავას სხვა მოგონებებიც ყადირზე. ეს შესანიშნავი მთხრობელი და დიდებული ინტელიგენტი 1967 წლის 4 სექტემბერს თავად მოვიდა ჩემთან ბათუმის საქალაქო საბჭოში. მე შევეცადე მისი ნათქვამი სიტყვასიტყვით ჩამეწერა: “ყადირ შერვაშიძეს ვიცნობდი 1917-18 წლებში ერთად ყოფნით. თურქების და ინგლისელების შემოსვლისას ბათუმში მცხოვრები ახალგაზრდობის ერთი ნაწილი იძულებული გახდა გასცლოდა მშობლიურ კუთხეს. მე წილად მხვდა ახალციხეში ჩასვლა, სადაც ყ. შერვაშიძის მიერ შექმნილ ცხენოსანთა დივიზიაში ვასრულებდი სამეურნეო დარგის საქმეს. ყადირი ახალციხეში ყოფნისას ასრულებდა აგრეთვე “სამუსლიმანო საქართველოს განმათავისუფლებელი კომიტეტის“ რწმუნებულის მოვალეობას. ამ კომიტეტის სხდომები ძირითადად ბათუმში იმართებოდა მოსკოვის ქ. №19-ში. ჯაფარიძის ბინაზე. ერთერთ სხდომას მეც ვესწრებოდი. ზია აბაშიძე (წვერი) წინააღმდეგი იყო ჩემი და კარაღა ხალვაშის (არა წვერების) დასწრებისა, მაგრამ ყადირის აქტიური ჩარევით დაგვტოვეს სხდომაზე.

ყადირი იყო ძალზე ენერგიული, ამტანი, მომთმენი, მაგრამ არაჩვეულებრივად პრინციპული და ბრძოლისუნარიანი ახალგაზრდა. ამ საქმეში მას ფიზიკური აგებულებაც ხელს უწყობდა. საშუალო ტანის ჩაფსკენილი, კუნთოვანი, ლამაზი სახის, უღვაშა ბიჭი ძალზე კარგ შთაბეჭდილებას სტოვებდა მნახველზე.

როგორც ვიცი 2-ჯერ იურიევში ყოფნისას ყადირს დუელი ქონდა და ორივეჯერ გამარჯვებული გამოვიდა. მოგვიანებით ერთ-ერთი მათგანის ძმა, შტაბს-კაპიტანი ყადირს შეხვდა მატარებელში და უბრძანა: ამ მატარებელს მე ვაცილებ (მაშინ სამხედრო პირები აცილებდნენ შემადგენლობას) და დატოვე ვაგონიო. უშიშარ ყადირს ისიც გამოუწვევია დუელში, რის გამო მამლაცინწა კაპიტანი იძულებული გახდა გასცლოდა მას.

ახალციხეში პურმარილზე ყადირის მხლებელს მემედ დაუთის ძე ნაკაშიძეს მოეჩვენა; რომ იქვე მჯდომ შტაბის უფროსს პოდპოლკოვნიკ გველესიანს ყადირის მისამართით უცენზურო სიტყვა წამოსცდა. გაშმაგებული ნაკაშიძე ბებუთით წაწეულა

გველესიანისაკენ. სასიკვდილოდ გამზადებული დანაზე ყადირს ხელი შეუშველებია (?) (მეორე ვერსიით ახმედ ჯიჯავამეს) და მსუბუქად დაჭრილა. ნაკაშიძე მცირედ დაუსჯიათ.

ტიფმა იმსხვერპლაო, ყადირ შერვაშიძე, ამბობენ, მაგრამ მე 90 პროცენტით მჯერა, რომ იგი მსხვერპლი გახდა რენეგატ ბახში ბეგ მანაბელისა, რომელმაც დაალეგინა დაყოვნებითი მოქმედების საწამლავი. აფსუს! რა ბიჭი იყო!

4 სექტემბერი 1967 წ.“

ცნობისათვის: ჯემალ მემიას ძე ფაღავა, ორთაბათუმის მკვიდრი 1897 წელს დაიბადა. ყადირ შერვაშიძის გარდაცვალების შემდეგ წამოშორდა აქტიურ სამხედრო მოღვაწეობას და ადმინისტრაციულ და სამეურნეო საქმიანობას მიჰყო ხელი. 1928-30 წლებში იყო ბათუმის საქალაქო საბჭოს აღმასკომის თავმჯდომარის მოადგილე, შემდეგ კურორტვაჭრობის უფროსი. ჩაქვის ჩაის ფაბრიკის დირექტორის მოადგილე. 1940 წლიდან მუშაობდა აჭარკოლქავშირის სისტემაში, ხოლო 1958 წლიდან პენსიაზე გასვლამდე აჭარპურტრესტის სისტემაში. გარდაიცვალა 1973 წლის 15 მაისს.

გერმანიაში

როგორც ზემოთ აღვნიშნეთ, 1918 წლის მარტში ბათუმისა და ყარსის ოლქები, გურია და სამცხე-ჯავახეთი ოსმალთ ოკუპანტებმა დაიკავეს. ამიერკავკასიის ხალხები აღსდგნენ მომხდურთა წინაღმდეგ. მაგრამ სეიმში არსებული უთანხმოების გამო ძალების გაერთიანება არ მოხერხდა. აზერბაიჯანელი მუსავატელები სიხარულით ელოდნენ ამ ოკუპაციას, სისხლიც ბლომად იღვრებოდა, მაგრამ ოკუპანტების განდევნა საკუთარი ძალებით ძნელი იყო. ერთადერთი სახელმწიფო, რომელსაც შეეძლო დახმარების გაწევა; ეს იყო გერმანია, რომელმაც ჯერ კიდევ 1917 წლის შემოდგომაზე ავსტრია-უნგრეთთან და ბულგარეთთან ერთად ივალდებულა ეცნოთ საქართველოს დამოუკიდებლობა. ამით ისარგებლეს ქართველმა ლიდერებმა და დაიწყეს სასწრაფო

მზადება ამ ისტორიული აქტისათვის. აკაკი ნხენკელმა წინადადება შეიტანა საქართველოს ეროვნულ საბჭოში დაუყოვნებლივ გამოეცხადებინათ საქართველოს დამოუკიდებლობა, ხოლო ახალ მთავრობას დახმარება გერმანიისათვის ეთხოვა.

საჭირო იყო გერმანიაში დელეგაციის მივლინება. მის შემადგენლობაში აუცილებლად უნდა ყოფილიყვნენ სამუსლიმანო საქართველოს წარმომადგენლები. განმათავისუფლებელმა კომიტეტმა ეს მისია ყადირ შერვაშიძეს და ზია აბაშიძეს დააკისრა. როგორც სხანს ამ გადაწყვეტილების საიდუმლო სათანადოდ ვერ იქნა დაცული და პროსიმალური ორიენტაციის პირთა ყურამდე მივიდა. ქალბატონი ცუცა მიყვება: მათ გადაწყვიტეს როგორმე დაეყოლიებინათ ყადირი, რათა უარი ეთქვა ამ მისიაზე. ამ მიზნით თბილისში სასამართლოს ქუჩაზე თარხან-მოურავის №16 სახლში, სადაც ყადირი ცხოვრობდა და გამგზავრების სამზადისში იყო, ერთ გვიან ღამით უცნობი პირი მივიდა. იგი ოთახში შეიპატივეს. სავარძელში მჯდომმა უცნობმა დიდი ჩემოდანი გახსნა, იქედან მძიმე ტომარა ამოიღო და მაგიდაზე დადო.

- ყადირ ბეგ, ეს ტომარა ოქროთია სავსე. დარწი, ნუ წახვალ გერმანიაში და ეს ჩვენგან სასუქრად მიიღე - თქვა და თავის მოხსნას შეუდგა.

ყადირი თოფნაკრავივით სკამიდან წამოვარდა. უცნობს ხელი სტაცა, წამოაყენა და ტომარა ჩემოდანში ჩააგდო. -

- ახლავე მიბრძანდით აქედან და აღარ გაიმეოროთ, რაც თქვით, თორემ ცოცხალს არ გაგიშვებთ.

ელდანაცემმა კაცმა ჩემოდანი დაკეტა, ხელი დააკლო და უსიტყვოდ გაიპურწა.

ყადირი იმავე ღამით ფარულად ფოთისაკენ გაემართა.

როგორც სხანს, როცა მოსყიდვა არ მოხერხდა, შემდეგ ტერორზე გადავიდნენ. ყადირს რამდენიმე ადგილას დაუგეს მახე, რათა გამგზავრებამდე ფიზიკურად გასწორებოდნენ, მაგრამ განმათავისუფლებელ კომიტეტსაც არ ეძინა. მან თბილისში, ქუთაისში, ფოთსა და ბათუმში, სადაც მოსალოდნელი იყო გერმანიაში მიმავალი ყადირის გადაადგილება, თავისი ხალხი გაგზავნა. ისინი მდებრივად გადაცმულნი თვალყურს ადევნებდნენ ყველას, ვინც საექვოდ მოეწვევებოდათ. სხვათაშორის ასეთი თვალთვალი ყადირის წასვლის შემდეგაც რამდენიმე დღეს გაგრძელდა. ამის მიზანი იყო დაედგინათ ის, ვინც ქართულ ეროვნულ მოძრაობას კრიჭაში ედგა და გამყიდველის და მოლაღატის მანტიით შეიმოსა.

ყადირის უფროსი ქალიშვილი, ქალბატონი გულიკო მიყვება უფროსი ბიძის, ზექერია ბეგის ნათქვამს: “როგორც კი გავიგე, რომ ყადირი საზღვარგარეთ წასვლას აპირებდა, მაშინვე გავი-აზრე, რომ მას დიდი საშიშროება ემუქრებოდა, ძალზე ვღელავ-დი, ამიტომ ფარულად ჩავედი ქუთაისში და გუბერნატორის სასახლისაკენ გავემართე (იგი ახლადდანიშნული იყო საქარ-თველოს მთავრობის მიერ). მინდოდა ჩემი შიში მისთვის გამეზი-არებინა. თეთრ ხიდთან გავლისას მათხოვარს გადავეყარე, მას ქუდი მუხლებთან დაედო და მოწყალებას თხოულობდა. როგორც კი მივუახლოვდი, წამოდგა და რაღაც უცნაურად მიიხედ-მოიხედა. შემდეგ სახით მომიახლოვდა და წურწულით მითხრა:

- ზექე, ყადირი გასცდა სტამბულს.

შემდეგ ნაუქად დაჯდა, ქუდი მოისწორა და თვალი ამარიდა.

მორიახლოს გავსერდი, ფარულად ვუცქერდი. ვიცოდი რომელიღაც ჩვენიანი იყო, მინდოდა ამომეცნო. თვალ-წარბი და ხმა ძალზე მეცნო, თუმცა ვერაფრით ვერ გავიხსენე. იქაურობას მოვუვრდი, რათა ამ თავდადებული კაცისათვის რაიმე ზიანი არ მიმეყენებინა.

ფოთისაკენ მიმავალმა, როგორც კი სენაკს მივადწიე, მაშინვე გამახსენდა ჩემი ნათესავი ფეიზულა-ბეგ სურმანიძე, რომელიც ფორმალურად თითქოს თურქეთის რეზიდენტი იყო, მაგრამ ფაქ-ტობრივად საქართველოს მთავრობის დავალებებს ასრულებდა. იგი ერთხანს სენაკში მოღვაწეობდა და სწორედ იქ გავლისას გა-მახსენდა მისი ხმაც და გამომეტყველებაც.

ასეთ რთულ პირობებში ყადირი ჩავიდა ფოთში, სადაც შეხვდა ზია ბეგ აბაშიძეს, ისინი გემში ჩასხდნენ და ევროპისაკენ გაემგზავრნენ. მათი მიზანი იყო გერმანიისაგან დახმარების მოთხოვნა, რაც იქ ჩასვლის გარეშე არ მოგვარდა. როგორც იქნა მისიაც შედგა და საქართველოს დელეგაცია გერმანიაში ჩავიდა. 1969 წელს ყადირის საოჯახო არქივიდან ქალბატონმა ნელიმ გადმოგვცა სურათი, რომელიც უცნობი ფოტოგრაფის მიერ ბერლინშია გადაღებული. ეს სურათი იმდენად დიდ ისტორიულ ამბებს ეხება და იმდენი დიდი პოლიტიკური მოღვაწეები არიან მასზე გამოსახული, რომ საჭიროდ ვცანით მისი კარგად შესწავ-ლა და მკითხველისათვის მიწოდება (დაწვრილებით იხ. ჟ. “დროშა“ , №12, 1990, გვ. 9)

თითქმის 20 წელიწადს ვეცადეთ, მაგრამ ვერ დავაზუსტეთ სად, როდის და რასთან დაკავშირებით იყო გადაღებული ეს

ფოტოსურათი. ამის გარკვევაში დაგვეხმარა ახლახან გურამ მა-
მულიას რედაქტორობით თეატრის მოღვაწეთა კავშირისა და
კოლპერატივ “ნიაიმორის“ მიერ გამოცემული ზურაბ ავალიშვილი-
სა და ვიქტორ ნოზაძის ძალზე საინტერესო წიგნები: “საქარ-
თველოს დამოუკიდებლობა 1918-21 წლების საერთაშორისო
პოლიტიკაში“ და “საქართველოს აღდგენისათვის ბრძოლა
მესხეთის გამო“.

1918 წლის 26 მაისს დამოუკიდებლობის გამოცხადებისთა-
ნავე ოსმალეთის მთავრობამ საქართველოს რესპუბლიკას ულ-
ტიმატუმი წარუდგინა და 12 დღის ვადაში პასუხი მოსთხოვა.
მეზობელი ქვეყანა მთელი სამუსლიმანო საქართველოს ტერიტო-
რიებზე პრეტენზიებს აცხადებდა. ერთი კვირის შედეგ საქარ-
თველოს მთავრობამ ოსმალეთს შეახსენა, რომ საზღვრები
ბრესტ-ლიტოვსკის ზავის მიხედვით უნდა დადგინდეს, ხოლო
ახალქალაქ-ახალციხის საკითხი საზავო მოლაპარაკებისას გა-
დავწყვიტოთ.

ოსმალეთი ამას არ დასჯერდა. მისი ჯარი კიდევ უფრო
ღრმად შემოვიდა საქართველოს ფარგლებში, საინგილოში,
ბორჩალოსა და აფხაზეთში.

ბრესტ-ლიტოვსკის ზავის მე-4 მუხლის თანახმად ყარსის,
არტაანისა და ბათუმის ოლქებში მოსახლეობის თვითგამორკვევა
უნდა მომხდარიყო კენჭისყრით (რეფერენდუმით).

1918 წლის 14 ივლისს ოსმალეთის მთავრობამ ბათუმში
რეფერენდუმი მოაწყო. იგი ჩატარდა ცალმხრივად, მეზობელი
სახელმწიფოების, მათ შორის საქართველოს მონაწილეობის
გარეშე, ადგილობრივი მოსახლეობის დევნისა და დაშინების
პირობებში. ცხადია რეფერენდუმის შედეგები არაობიექტური იყო
და არ გამოხატავდა ადგილობრივი მოსახლეობის სურვილებს,
რის გამოც საქართველოს მთავრობამ იმავე წლის 1 აგვისტოს
პროტესტი განუცხადა ოსმალეთის ხელისუფლებას.

როგორც ვთქვით, “სამუსლიმანო საქართველოს განმათავი-
სუფლებელ კომიტეტი“ თავისი წევრები ყადირ შერქაშიძე და
ზია აბაშიძე ბერლინში გაგზავნა, რის შესახებაც ცნობას ვხვდ-
ებით ზურაბ ავალიშვილის წიგნში: “აღვნიშნავ აგრეთვე თურქ-
ების მიერ 1918 წლის ივლისში ბათუმის ოლქში ჩატარებულ
რეფერენდუმს. ამ რეფერენდუმის და თურქების ზოგ მოქმე-
დებების წინააღმდეგ მრავალგზის ხსენებულ სამ სანჯაყში (იგუ-

ლისხმება ყარსი, არტაანი და ბათუმი, რ.ს.) ჩვენ პროტესტი განაცხადეთ ბერლინში და საქართველოს მთავრობამ თავის მხრივ- თბილისში. აგვისტოს ბოლოს ბერლინში ქართველ მუსლიმანთა საგანგებო დეპუტატებიც კი ჩამოვიდნენ - ზია-ბეგ აბაშიძე და ყადირ-ბეგ შერვაშიძე ისინი აპირებდნენ კონსტანტინოპოლის კონფერენციისათვის რეკერენდუმის გამო შეეჩივლათ“. (გვ. 140).

1918 წლის 30 ოქტომბერს მუდროსის ზავით ოსმალებმა დატოვეს საქართველო. ამიტომ კონსტანტინოპოლის კონფერენცია აღარ ჩატარდა, მაგრამ ქართველ მოღვაწეებს საქართველოს ტერიტორიული მთლიანობისათვის ბრძოლა არ შეუწყვეტიათ. ყადირ შერვაშიძემ სპეციალური ფურცელი - მოწოდება დაბეჭდა და მოელს სამუსლიმანო საქართველოში გაავრცელა (სრული ტექსტი იხ. აქვე).

ერთი წლის შემდეგ ინგლისელთა ოკუპაციის მეტად ძძძძ და რთულ პირობებში ბათუმში ჩატარდა ბათუმის ოლქის მაჰმადიანთა ყრილობა, რომლის გადაწყვეტილებაში ვკითხულობთ: “ბათუმის ოლქის მუსლიმანთა წარმომადგენელი, რიცხვით ასი კაცი, ვაცხადებთ ღვთისა და ქვეყნის წინაშე, რომ ბათუმის ოლქის მკვიდრნი, სარწმუნოებით მუსლიმანები ისტორიით სისხლით და ხორციით, ყნით, კულტურით და ადათებით ვართ მუსლიმანი ქართველები და ტერიტორიულად და ეკონომიურად ყოველთვის ჩვენი მხარე დედა-სამშობლოს - საქართველოს განუყრელ ნაწილს შეადგენდა, (ყ. ნოზაძე, დასახ. ნაშრომი, გვ. 54).

ასეთი განაცხადება - ოსმალთაგან ჩატარებული რეფერენდუმის შედეგების გაქარწყლება საქართველოს მტრების მიმართ ნამდვილი ლახვარის ჩაცემა იყო, რადგანაც ადგილობრივი მოსახლეობა აშკარად გამოხატავდა პროქართულ ორიენტაციას და ძირიდანვე ამსხვრევდა პანისლამისტთა მზაკერულ გეგმებს.

ქართველ პატრიოტთა სიმტკიცემ და თავდადებულმა ბრძოლამ შედეგი გამოიღო - სამუსლიმანო საქართველოს ერთი ნაწილი აჭარა და სმცხე-ჯავახეთი კვლავ დედასამშობლოს ფარგლებში ღარნა.

ზემოთქმულით დასტურდება, რომ ფოტოსურათი გადაღებულია ბერლინში ზია აბაშიძისა და ყადირ შერვაშიძის ჩასვლისას, როცა გერმანიის დედაქალაქში იმყოფებოდა საქართველოს დელეგაცია (ა.ჩხენკელი, ნ.ნიკოლაძე, ზ.ავალიშვილი, მ.წერეთელი, გ.მანაბელი, ე.ბერნშტეინი, ა. ბეჟანიძე). დელეგაციას ახალ-

გათავისუფლებული რესპუბლიკის მრავალი რთული პოლიტიკური საკითხი უნდა გადაეწყვიტა. ფოტოსურათზე აშკარად ჩანან ნიკო ნიკოლაძე (მარცხნიდან მეოთხე), ყადირ შერვაშიძე (5), აკაკი ჩხენკელი (7), მისი მეუღლე (10), მიხაკო წერეთელი (15), ზიაბეგ აბაშიძე სურათის გადაღების დროს შემთხვევით იქ არ იყო.

სურათზე პირველი მერვე და მეცხრე პიროვნებებიც საქართველოს დელეგაციის წევრები არიან: გასარკვევია, მათგან რომელია ზურაბ ავალიშვილი, გ.მაჩაბელი, ერ.ბერნსტეინი - გერმანული წარმოშობის საქართველოს ქვეშევრდომი და ახმედ-ბეგ ბეჟანიძე, ა. ჩხენკელის მხლებელი, ეს მეტად შთამბეჭდავი გარეგნობის ოფიცერი ქართველი მუსლიმანი.

სურათი გადაღებული უნდა იყოს 1918 წლის აგვისტოს ბოლოს ან სექტემბრის დასაწყისში ბერლინში სასტუმრო "ადლონის" მახლობლად.

საქართველოს დელეგაციის მისია გერმანიაში წარმატებით დასრულდა. გერმანიის მთავრობამ საქართველოში გამოგზავნა რამდენიმე ბატალიონი (სულ 17000 ჯარისკაცი), რომლებიც განლაგდა თურქეთის მხრიდან შემოტევის ზონებში. მართალია ამ აქტმა ნაწილობრივ შეზღუდა ჩვენი ქვეყნის სუვერენიტეტი, მაგრამ შეაჩერა მეზობელი ქვეყნის აგრესიული მოქმედება, ამიტომ ეს იყო ერთადერთი სწორი გზა. 1918 წლის 4 ივლისს საქართველოს დემოკრატიულმა რესპუბლიკამ თურქეთთან ზავი გააფორმა.

ჯილდო

ყადირ შერ ნვაშიძისათვის ეს მისია მეორე მხრივაც მნიშვნელოვანი აღმოჩნდა. აჭარის სახელმწიფო მუზეუმში დაცული საბუთებით დასტურდება რომ ყადირი ბერლინში ქართული ლეგიონის სამახსოვრო ნიშნით დაუჯილდოვებიათ. სამწუხაროდ ყადირის კუთვნილი სამახსოვრო ნიშანი დაკარგულია, სამაგიეროდ შემორჩენილია ამ ნიშნით მისი დაჯილდოების დამადასტურებელი ფერადად მოჩარჩოებული სიგელი, რომლის ტექსტია: "ყადირ ბეგ შერვაშიძეს! მოსაგონებლად იმ ძვირფასი სამსახურისა, რომელიც თქვენ მიგიძღვის ჩვენს საქმეში. გვაქვს პა-

ტივი მოგაწოდოთ სამახსოვრო ნიშანი ქართველთ ლეგიონისა. ნიშანი უნდა იტარებოდეს მკერდის მარცხენა მხარეზე ქვემო-დან“. სიგელს ხელს აწერენ: გიორგი კერესელიძე, მიხაკო წერეთელი, ალექსანდრე ოზაალიშვილი, ზია აბაშიძე. იგი გაფორმებულია ქალაქ ბერლინში 1918 წლის 10 სექტემბერს. სიგელზე დასმულია მრგვალი ბეჭედი, რომელზეც იკითხება: საქართველოს დამოუკიდებლობის პარტია. უცხოეთში მოქმედი კომიტეტი“.

ამ პარტიის დაარსების ისტორიის გასაცნობად მოვიხიშობთ გურამ შარაძის წიგნს “მემედ აბაშიძე“, (თბილისი-ბათუმი, 1995 წ. გვ. 84-108), სადაც ნათქვამია:

1907 წელს გ.ნერქეზიშვილმა, გ.გვაზავამ, მ.წერეთელმა და სხვებმა ჰააგის საერთაშორისო კონფერენციას წარუდგინეს შედგენილი და მრავალი ქართველის ხელმოწერილი მემორანდუმი, რომელშიც მხილებული იყო ქართველი ერის მიმართ რუსეთის მთავრობის მიერ ჩადენილი ბოროტებანი: გიორგიევსკის 1783 წლის ტრაქტატის დარღვევა, საქართველოს სამეფოს გაუქმება, ქვეყნის გუბერნიებად დაყოფა, ფაქტობრივი დაპყრობა და ა.შ.

ჰააგის კონფერენციაზე ამ საკითხმა მრავალი ქვეყნის დელეგაციის ყურადღება მიიპყრო, და ბევრ მათგანში თანაგრძნობაც გამოიწვია. ამით ძალმოცემული და გათამამებული ქართველი მოღვაწეები შეუდგნენ საქართველოს სრული დამოუკიდებლობის პროპაგანდას, მათ 1908 წელს ფარულად შექმნეს საქართველოს დამოუკიდებლობის ჯგუფი (პარტია), რომელშიც შევიდნენ: იაკობ გოგებაშვილი, ალექსანდრე ყიფშიძე (ფრონელი), ფილიპე გოგინაიშვილი, პეტრე სურგულაძე, სვიმონ ყიფიანი, მიხეილ წერეთელი, გიორგი გვაზავა, ვალერიან გუნია, მიხეილ ადამაშავილი (ჯავახიშვილი), ნიკო ლორთქიფანიძე, კიტა აბაშიძე და სხვ. ჯგუფს მხარს უჭერდნენ დიდი პოეტები აკაკი და ვაჟა.

ამ ჯგუფში შედიოდა მემედ აბაშიძეც. რომელმაც სწორედ მაშინ დატოვა სოციალ-ფედერალისტთა პარტიის რიგები, ამ ახალი პოლიტიკური ორგანიზაციის ორგანო იყო ყოველკვირეული საპოლიტიკო, სალიტერატურო და სამეცნიერო-ისტორიული ჟურნალი “ერი“ (რედაქტორ-გამომცემელი პეტრე სურგულაძე). ჟურნალი აშკარად მოითხოვდა იმპერიისაგან საქართველოს გამოყოფას და დამოუკიდებლობას. ბუნებრივია ასეთ რადიკალურ მოთხოვნებს

მოპყვა რუსეთის ხელისუფლების მწვავე რეაქცია. დაიწყო ჯგუფის წევრების დევნა. ზოგი მათგანი რუსეთის შორეულ გუბერნიებში გადაასახლეს კიდეც, მაგრამ ზოგიერთებმა მოასწრეს უცხოეთში გაქცევა. (პ.სურგულაძე - შვეიცარიაში, მ.წერეთელი - ინგლისში და ა.შ.).

ჟენევაში მყოფი პეტრე სურგულაძე დაუკავშირდა ჯერ კიდეც 1906 წელს გახიზნულ ძმებს ლეო და გიორგი კერესელიძეებს, მათს ბიძაშვილს ნესტორ მაღალაშვილს, აგრეთვე ვასილ ციცქიშვილს და მიხეილ იშხნელს. მათთან ლონდონიდან კავშირს ამყარებს მიხაკო წერეთელი, ხოლო ბერლინიდან გიორგი მანაბელი. ამგვარად ჟენევაში შეიქმნა მძლავრი პოლიტიკური ორგანიზაცია “თავისუფალი ჯგუფი“, რომელმაც 1913 წელს დააარსა საკუთარი გაზეთი “თავისუფალი საქართველო“.

1914 წელს, პირველი მსოფლიო ომის დაწყებისთანავე დამოუკიდებლობის ჯგუფი გადაკეთდა “საქართველოს დამოუკიდებლობის კომიტეტად“, რომელსაც კვლავ პეტრე სურგულაძე ჩაუდგა სათავეში. კომიტეტი მიზნად ისახავდა უმალვე დაეყენებინა საქართველოს დამოუკიდებლობის საკითხი, თუ გერმანია ომში გაიმარჯვებდა. ეს ამბავი ლეო კერესელიძის თქმით “ყუმიბარასავით მოეგლინა ქართულ საზოგადოებას: გადაგვარებულნი აღაშფოთა, ხოლო მამულიშვილთ კი გული იმედებითა და სიხარულით აუვსო“. კომიტეტის წევრებმა მიაღწიეს, რომ გერმანიის მთავრობას თავის მხრივ აეღო ვალდებულება: რუსეთზე გამარჯვების შემთხვევაში სცნობდა საქართველოს დამოუკიდებლობას და ყოველმხრივ დაეხმარებოდა დამოუკიდებლობის შენარჩუნებაში. ამის შემდეგ კომიტეტის წევრები სტამბულს ჩავიდნენ და ასეთივე ხელშეკრულება გააფორმეს ოსმალეთის მთავრობასთან. აქ მ.წერეთლისა და გ.მანაბლის თაოსნობით შექმნილა გაერთიანებული კომიტეტი, რომელიც ფაქტობრივად “საქართველოს რევოლუციურ მთავრობად ითვლებოდა“. აქვე კომიტეტს შეემატნენ ოსმალეთში მოღვაწე პატრიოტები: ზია აბაშიძე, მელიტონ ქარცივაძე და შალვა ვარდიძე.

1914 წლის ოქტომბრიდან კომიტეტმა ლეო კერესელიძეს დაავალა შეექმნა ქართული ლეგიონი, რომელიც მონაწილეობას მიიღებდა რუსეთის წინააღმდეგ საბრძოლო მოქმედებაში. ლეგიონის ადგილსამყოფელად შეარჩიეს ლაზეთის სოფელი ვიწე (ახლანდელი ფინდიკლი). ომის დროს გერმანიის მხარეზე

აღმოჩნდა მრავალი ქართველი ტყვე. მათი მოვლა-პატრონობაც კომიტეტმა იკისრა. ტყვეთა შორის აღმოჩნდა მრავალი ქართველი, რომლებმაც სურვილი გამოთქვეს ჩარიცხულიყვნენ ქართულ ლეგიონში. 1916 წლისათვის ქართული ლეგიონი 2000-მდე კაცს ითვლიდა. მათ ხელმძღვანელობდნენ ქართველი და გერმანელი ოფიცრები. ეს უკვე საკმაოდ დიდი ძალა იყო. ლეგიონს შემუშავებული ჰქონდა თავისი წესდება, რომლის შესრულება ყველასათვის კანონი იყო. ლეგიონის შემადგენლობაში უმეტესად მუსლიმანი ქართველები ყოფილან. შემონახულია ერთი კოლექტიური ფოტოსურათი და ცნობილია ზოგიერთი მათგანის გვარი: ახმედ ბეჟანიძე, თავდგირიძე, ისაკ ნაკაშიძე, ფეიზულა ბეგ სურმანიძე, სეფერ ალა ზადე, ჩახრუხაძე, ხასან ჩევიოღლი (ჩალოღლი?), ხალვაში და სხვები.

ლეგიონი იმდენად გაძლიერებულა, რომ თვით ოსმალეთის მხედრობაც კი შეუშფოთებია, რის გამო მას გერმანიის მთავრობის წინაშე დაუსვამს საკითხი ლეგიონის დაშლისა. ეროვნული საჯარისო შენაერთი მართლაც დაშლილა, მაგრამ ძირითადი ბირთვი მაინც შეუნარჩუნებიათ, რომელიც შემდეგ განთავისუფლებულ საქართველოში შემოსულა (აბ.სურგულაძე, ქართული ლეგიონი თურქეთში, ბათუმი, 1994).

ასეთია საქართველოს დამოუკიდებლობის უცხოეთში მოქმედი კომიტეტის ხანმოკლე, მაგრამ დიდი ეროვნული დატვირთვის მქონე ისტორია.

დავებრუნდეთ ლეგიონის სამახსოვრო ნიშანს.

როგორც ცნობილია ლეგიონის სამახსოვრო ნიშნით (თამარ მეფის ორდენით) დაჯილდოებული იყო დიდი მოღვაწე და პატრიოტი მემედ აბაშიძე. მის ოჯახშიც მხოლოდ სიგელის აღმოჩენა მოხერხდა. თავად ორდენი კი დაკარგულია.

ლეგიონის სამახსოვრო ნიშნის ერთადერთი ეგზემპლარი აღმოჩნდა აკადემიკოს სიმონ ჯანაშიას სახელობის საქართველოს სახელმწიფო მუზეუმის ნუმიზმატიკის განყოფილებაში, რომელიც აქ 1969 წლის 15 მარტს შემოუტანია არქეოლოგ თინათინ შალვას ასულ ქარუმიძეს. ესაა რვაკიმიანი ვერცხლის ვარსკვლავი, რომლის შუაგულში ჩასმულია მედალიონი. მუქი ლურჯი ემალის ფონზე დაკრულია თამარ მეფის მოოქროვილი ვერცხლის რელიეფური გამოსახულება, ირგვლივ წარწერა “ქართული ლეგიონი, 1915“. (გ.შარაძის დასახ.ნაშრომი, გვ. 107).

როგორც სწანს, ეს ჯილდო მომდევნო წლებშიც დიდად პოპულარული იყო. ბატონი აბელ სურგულაძე იმოწმებს ბათუმელ მურად ნიჭარაძეს, რომელსაც გაუხსენებია გერმანელთა ტყვეობაში ცნობილ ლეო კერესელიძესთან შეხვედრა და შემდეგ უთქვამს: „მკერდზე რაღაც ორდენი ეკეთა. მას დავუნახე პირველად და შემდეგ მისგანვე გავიგე, თურმე, თამარ მეფის ორდენი ყოფილა... სიამაყით გაიხსენა დაჯილდოების ისტორია. ისიც თქვა. ჩვენი დიდი დედის ეს ორდენი ბევრს მავალებს და სანამ ვსუნოქავ, ვიბრძოლებ საქართველოს თავისუფლებისათვისო“. (აბ.სურგულაძე, საღ წაიყვან სადაურსა. ბათუმი, 1966, გვ. 18-19).

კვლავ ახალციხეში

უცხოეთიდან დაბრუნების შემდეგ ყადირ შერვაშიძე კვლავ ახალციხეშია. აქ დიდი იდეოლოგიური საქმიანობის, პოლიტიკური მოღვაწეობის და ოკუპანტთა წინააღმდეგ ბრძოლის გარდა იგი აქტიურად ჩაება მასობრივი ეპიდემიების წინააღმდეგ ბრძოლაშიც. მოსახლეობას მუსრს ავლებდა განსაკუთრებით საშიში ინფექციები, კერძოდ პარტახტიანი ტიფი. სამწუხაროდ ახალგაზრდა საქართველოს რესპუბლიკას არ გააჩნდა სათანადო ფინანსები, მედიკამენტები. არ ჰყავდა საკმაო კადრები, რის გამო ეპიდემიების წინააღმდეგ ბრძოლა ძალზე ძნელდებოდა. მიუხედავად ამისა ყადირ შერვაშიძემ თავის ირგვლივ შემოიკრიბა სამხედრო და სამოქალაქო სამედიცინო პერსონალი, რომლებმაც ხელში აიღეს პროფილაქტიკური და საკარანტინო ფუნქციები, შესაძლებლობის ფარგლებში მოაწყვეს სახელდახელო ლაზარეთები, სადეზინფექციო კამერები; ამ ღონისძიების შედეგად მრავალი ადგილობრივი მცხოვრები და სამხედრო ნაწილების პირადი შემადგენლობა გადაურჩა უჭკველ სიკვდილს.

1919 წლის თებერვალში სერვერ-ბეგ ქობლიანსკიმ შეავიწროვა ქართული საჯარისო ნაწილები და თავისი „სამთავრობო“ ჯარები საზეიმოდ ახალციხეში შეიყვანა. ადლუმს თურქი ოფიცერი, აწყურის ყოფილი კომენდანტი ლატიფ-ბეი ხელმძღვანელობდა. ჯარმა დაატყვევა ყველა ქართველი მოხელე

და ოფიცერი. აგრეთვე მილიციელები, რომლებმაც ქალაქიდან გასვლა ვერ მოასწრეს. გაცოფებული ოკუპანტები განსაკუთრებულად ეძებდნენ ყადირ შერვაშიძეს, ჰაიდარ აბაშიძეს და ლეო ბურკაძეს. (გაზ. "ერთობა", 20 მარტი 1919 წელი. ახალციხის აჯანყების გარშემო). მიუხედავად ამისა ყადირი ახალციხეში მანინც დარჩა და თავის ნაწილებთან ერთად მოსვენებას არ აძლევდა სერგერ-ბეგის აღვირახსნილ ასკერებს.

გარდაცვალება

1919 წლის აპრილში ყადირ შერვაშიძე თბილისში მიიწვიეს ერთ-ერთ სხდომაზე მონაწილეობისათვის. იგი ჯერ ქუთაისში ჩავიდა, სადაც თავი ძალზე ცუდად იგრძნო. ვერავინ გაიგო მისი ავადმყოფობის მიზეზი. მიუხედავად ამისა თბილისში მანინც ჩააღწია. აქ მდგომარეობა ძალზე გაუარესდა. ექიმები ბევრს ეცადნენ, მაგრამ მისი გადარჩენა ვეღარ შეძლეს და 1919 წლის 8 მაისს გარდაიცვალა.

32 წლის სამხედრო მოღვაწის, პატრიოტისა და აჭარის მკვიდრთაგან პირველი ექიმის გარდაცვალების მიზეზი იმთავითვე ბურუსმა მოიცვა. გავრცელდა ხმა, რომ ყადირი პარტახტიანი ტიფით დაავადდა და სიკვდილის მიზეზიც ეს იყო. ამას იმითაც ადასტურებდნენ, რომ მისი მძლოლი ისაკ ჯღარკავა, რომელიც ყადირს განუშორებლად თან ახლდა, დაავადდა პარტახტიანი ტიფით, მაგრამ შინაურები, ყადირის მეგობრები და უახლოესი თანამებრძოლები დაბეჯითებით თვლიდნენ, რომ ყადირი მოწამლეს. ამ აზრს ისიც აძლიერებდა, რომ თუთიის კუბოში ჩასვენებული ცხედარის ნახვა არ მოხერხდა თითქოსდა იმის გამო, რომ მოსალოდნელი იყო დაავადების გადაღება. საფუძვლიანი სამედიცინო ექსპერტიზა არ ჩატარებულა. როგორც ზემოთ აღვნიშნეთ, ჯემალ ფალავამ დაბეჯითებით თქვა, რომ ყადირი ემსხვერპლა ბახში-ბეგ მანაბლის მუხანათობას.

იგივე დაადასტურა ყადირის გიმნაზიის დროინდელმა ამხანაგმა და შემდგომში მისმა აღიუტანტმა ახმედ ჯიჯავაძემ. ბახში-ბეგ მანაბლისა და ყადირის მწვავე შეტაკებას ერთხელ თა-

ვადაც შეეხწრო. მოქიშპეებმა იარაღი გამოიყენეს, მაგრამ ორივე უვნებლად გადარჩა. მათი მტრული ურთიერთობა ძირითადად პოლიტიკური მოტივებით იყო განპირობებული. ბახში-ბეგი ოსმალეთის ორიენტაციის იყო და რენეგატის პოზიცია ეკავა, რაც ქართული ორიენტაციის მქონე და სისხლითა და ხორცით ქართველი ყადირისათვის სრულიად მიუღებელი იყო.

ახმედ ჯიჯავადის თქმით, სწორედ ამ მინაბელმა შეუგზავნა ყადირს ვიღაც მსახური ქალი, რომელმაც მას დაყოვნებითი მოქმედების საწამლავი შეაპარა.

ასეა თუ ისე ყადირის გარდაცვალების მიზეზი ჩვენს დროშიც საიდუმლოდ დარჩა, ამიტომ არაერთხელ დავაყენე საკითხი გვამის ეკსგუმაციისა და საფუძვლიანი ქიმიურ-ბიოლოგიური ექსპერტიზის ნატარების თაობაზე, რაც დღემდე არ მოხერხდა. არა და ამის გაკეთება აუცილებელია, რათა დადგინდეს, თუ რა მიმე ვითარებაში განვლო სამშობლოს ერთგულმა მამულიშვილმა ცხოვრების ბოლო დღეები და როგორ გამსხვერპლა კიდევ ამას.

ყადირ შერვაშიძის გარდაცვალებამ დიდი გამოხმაურება ჰპოვა მთელს საქართველოში თბილისში, ქუთაისში, ბათუმში, მის მშობლიურ ქედაში.

დამფუძნებელი კრების 9 მაისის სხდომაზე სიმონ მდივანმა “დაახასიათა დამფუძნებელი კრების წევრი ყადირ შერვაშიძე“, დეპუტატებმა “უფიხე ადგომით პატივი სცეს განსვენებულის ხსოვნას. მისივე განცხადებით ყადირ შერვაშიძის და კიდევ ორი სხვა გარდაცვლილი სოციალ-დემოკრატი დეპუტატის ადგილს დამფუძნებელ კრებაში ამიერიდან დაიკავებდნენ: იოსებ ირემაშვილი, ს.ვადაჭკორია და გრ.სირბილაძე (ციტ. აბ.სურგულაძე. ყადირ შერვაშიძე თამარის ორდენის რაინდი, გვ. 43).

გაზეთმა “ერთობამ“ რამდენიმე ნომრის პირველი გვერდი დაუთმო ყადირ შერვაშიძის ხსოვნის მასალებს. მთავრობის ოფიციალურ ცნობაში ნათქვამია: “საქართველოს დამფუძნებელი კრების სოციალ-დემოკრატიული ფრაქცია მწუხარებით აუწყებს ამხანაგებს ფრაქციის წევრის ყადირ ტუფანის ძე შერვაშიძის გარდაცვალებას“. იქვეა ოჯახის განცხადებაც: “ფატმა-ხანუმ, ნადეჟდა, გულიკო და ნელი, ესმე-ხანუმ, ბექირი, რეშიტ, მაშიკო, ვარლამი და გრიგოლი მწუხარებით აუწყებენ ნაცნობთ და ნათესავთ: პირველის შვილის, მეორის მეუღლის, მესამეთა მამის,

მეოთხე, მეხუთე და მეექვსეთა ძმის და უკანასკნელთა სიძის, დამფუძნებელი კრების წევრის, ქართველ მუსლიმანთა დივიზიის უფროსის, პოლკოვნიკ კადირ ტუფანის ძე შერვაშიძის უდროოდ გარდაცვალებას. გამოსვენება შაბათს 10 მაისს, საღამოს 5 საათზე სუდების (ახლანდელი ზუბალაშვილის, რ.ს.) ქუჩიდან №16. აქედან ცხედარს წაასვენებენ სადგურზე სამშობლო აჭარაში დასაკრძალავად“.

ანალოგიური განცხადებები გაზეთ “ერთობაში“ გამოქვეყნდა ქართველ მუსლიმანთა ცხენოსანი დივიზიის მხედრობის, ოფიცრობის, დივიზიის შტაბის და სამუსლიმანო საქართველოს განმათავისუფლებელი კომიტეტის სახელით. (გაზეთი “ერთობა“ №101, 102, 1919 წ.) განცხადებები გამოაქვეყნა “სახალხო გაზეთმა“ (№522, 523, 1919 წ) და სხვა გაზეთებმა.

“თბილისის სადგურზე ყადირის ცხედარი ზღვა ხალხმა გამოაცილა. ოჯახის წევრთა გადმოცემით იქ გამოსამშვიდობებელი მიტინგიც გაიმართა“. ცხედარს მოყვებოდნენ ოჯახის წევრები-გაუბედურებული დედა, უდროოდ დაქვრივებული მეუღლე, პაწაწინა ქალიშვილები, დამწუხრებული და-ძმები და სხვა ახლობლები. “პროცესიას რიონის სადგურზე ქუთათურთა საკმაოდ დიდი წრე დახვდა. ბახტაძეებმა ძვირფასი სიძის ნეშტი თავისთან წაასვენეს და რამდენიმე დღის განმავლობაში მათი სახლიდან სამგლოვიარო საგალობლების ხმა მოისმოდა...“ (იხ. აბ. სურგულაძე, დასახ. ნაშრომი, გვ. 23,24).

დასაწყისში ყადირის დაკრძალვა სურდათ ბათუმში აზიზიეს მოედანზე, მაგრამ მას ხელი შეუშალეს ბათუმში იმ დროს მყოფმა ინგლისელმა ოკუპანტებმა და ჯამეს მესვეურებმა. ვითარებაც ძალზე დაძაბული იყო, წყდებოდა აჭარის ბედი. აქ ჯერ კიდევ არ ჩამოედწია დამოუკიდებლობის ტალღას. ამიტომ ნათესავებმა გადაწყვიტეს ყადირის ნეშტი ქედაში დაესაფლავებინათ.

ყადირ შერვაშიძის გარდაცვალებას დაემთხვა პერიოდი, როცა ბათუმიდან წავიდა გერმანელთა სამხედრო ნაწილები, რომლებიც მეტნაკლებად ზომიერად იქცეოდნენ ხოლო მათ მაგივრად შემოვიდნენ ინგლისელები, რომლებმაც 1919 წლის 10 იანვარს მოახდინეს ბათუმის ოლქის ფაქტობრივი ოკუპაცია და თავს მხარის ბატონ-პატრონად თვლიდნენ. ისინი ყველგან იდგნენ სოფლებში, გზებში, ტყეებში და მეტად გამომწვევად იქცეოდნენ. ილია ჩიქოვანის (პონტელის) თქმით, “ინგლისელები ინდოელი

ჯარისკაცებით და ჯიშინი ჯორებით საქართველოს ყველა კუთხეში გამოიხდნენ. ყველგან უხეშად ეჭირათ თავი, ბატონობდნენ და ჩვენი ქვეყნის მართვა-გამგეობაში ერეოდნენ“ (ი.პონტელი, მოგონებები, თბილისი, 1958. გვ. 22)

ყადირ შერვაშიძის ქედაში გადასვენების პროცესიას სწორედ ინგლისელთა ეს თავაშვებული ჯარისკაცები გადაუდგნენ წინ. საქმეში დროულად ჩაერივნენ სამუსლიმანო საქართველოს განმათავისუფლებელი კომიტეტის თავმჯდომარე მეხედ ბეგ აბაშიძე, კომიტეტის წევრები სულეიმიან დიასამიძე, რეჯებ ნიჟარაძე და სხვები და ინციდენტი მშვიდობიანად დამთავრდა. ყადირი ქედაში წაასვენეს და მისივე სახლის გვერდით, ბაზრის მახლობლად დაკრძალეს.

ყადირის შემდეგ

მკითხველი ადვილად წარმოიდგენს, როგორ დიდი იყო მწუხარება და გლოვა, რომელმაც მოიცვა თითქმის მთელი საქართველო უდროოდ და ბურუსით მოცულ ვითარებაში ახალგაზრდა სარდლისა და მოღვაწის დაკარგვის გამო. მცირე წლოვან ბავშვებს და ნაადრევად დაქვრივებულ ცუცას ოჯახის წევრები ზრუნვას არ აკლებდნენ, განსაკუთრებით ყადირის და-ძმები: ზექერია, რეშიტი, ბექირი, ულფეთი, ზერე, სალიე, ესმა.

1919 წლის ივლისში თბილისის მესამე სასამართლომ ნადეჟდა ვარლამის ასული ბახტაძე-შერვაშიძე გააფორმა მცირეწლოვანი შვილების გულის და ნელის მეურვედ. სპეციალურ საბუთში ნათქვამია, რომ სასამართლოს გადაწყვეტილებით მას უფლება ეძლევა განაგოს გარდაცვლილის მთელი ქონება, რომელიც ამიერიდან მას და მის შვილებს ეკუთვნის და ყოველწლიურად სასამართლოს წარუდგინოს სამეურვეო ანგარიშგება.

ქონება კი საკმაოდ დიდი იყო. ჩვენ მთლიანი ქონების აღწერილობა არ გაგვანჩნია. მაგრამ საოჯახო არქივში არის საბუთები, რომლებიც წარმოდგენას გვიქმნიან ყადირ შერვაშიძის ქონებრივ ცენზე. 1918 წლის 29 ნოემბრის ერთი საბუთით, რომელიც გაუცია საქართველოს რესპუბლიკის შინაგან საქმეთა

მინისტრის კანცელარიას, დასტურდება: ყადირი ფლობდა ფორდის ტიპის მსუბუქ ავტომობილს (№133602) და უფლება ეძლეოდა იგი ქუთაისიდან თბილისში ჩაეყვანა. იმ დროისათვის ეს დიდი კაპიტალი იყო. ოჯახში ასევე შენახულია ამიერკავკასიის ბანკის ანგარიშსწორების წიგნაკი №654, ირკვევა, დაწყებული 1918 წლიდან ყადირ თუფანის ძე შერვაშიძეს ბანკში ჰქონდა გარკვეული რაოდენობის თანხა, რომლის ნაშთი 1918 წლის 1 ივლისის მდგომარეობით 85000 რუსულ მანეთს უდრიდა.

ჩვენ არ ვიცით იმ არეულ დროში რამდენად შეძლო ქალბატონმა ცუცამ კუთვნილი ქონებისა და უფლის გამოყენება, განსაკუთრებით მაშინ, როცა დაიწყო საშინელი ინფლაცია და ბონებს მილიარდობით ითვლიდნენ.

ყადირის ოჯახისადმი განსაკუთრებულ მზრუნველობას იჩენდა ზექერია, რომელსაც საკუთარი ოჯახი არ შეუქმნია და მთელ თავის სიყვარულს ობლად დარჩენილ ძმისშვილებს უნაწილებდა. ქალბატონები გული და ნელი დიდი მადლიერებით იხსენებდნენ უფროსი ბიძის მამობრივ ზრუნვას. აქვე ვიტყვით, რომ ზექერია შერვაშიძეს დიდი წვლილი მიუძღვის იმდროინდელ სამუსლიმანო საქართველოს ზოგიერთი პროცესის მოწესრიგებაში. იგი 1917 წლის თებერვალში აქტიურად მონაწილეობდა მოსახლეობის წარმომადგენელთა კრების მოწყობაში, რომელმაც აირჩია “ქართველ მუსლიმანთა კომიტეტი“. ზექერია ამ კომიტეტის წევრად დაამტკიცეს. მეემედ აბაშიძის თქმით, ამ კომიტეტის მიზანი იყო მოსახლეობაში თვითშეგნების შეტანა, საქართველოს ისტორიული წარსულის გაშუქება და ხალხში საქართველოს ერთიანობის იდეის განმტკიცება (ერმილე მესხია. სამხრეთ-დასავლეთ საქართველოს ისტორიიდან, ბათუმი, 1997. გვ. 9). იმავე წლის შემოდგომაზე ზექერია შერვაშიძე მონაწილეობდა ბათუმის ოლქის მუსლიმანთა საქველმოქმედო საზოგადოების დაფუძნებაში. რომელიც დაუპირისპირდა თურქოფილთა ანალოგიურ ორგანიზაციას (იქვე, გვ. 10). ზ. შერვაშიძე ამ საზოგადოების გამგეობის წევრი იყო.

ზექერია შედიოდა სამუსლიმანო საქართველოს 20 კაციან დელეგაციაში, რომელიც 1916 წლის მარტში ეწვია კავკასიის მეფისნაცვალს და მოითხოვა სახელმწიფო დალატის ბრალდებით დაპატიმრებული აჭარლების გათავისუფლება. 4 მარტს ეს დელეგაცია შეხვდა მოწინავე ქართველ მოღვაწეებს, ბანკეტზე,

რომელსაც 200 კაცი ესწრებოდა, გიორგი ყაზბეგი თამადაობდა. აქ შთამბეჭდავი სიტყვები წარმოთქმევს ისკანდერ ცივაძემ და მემედ-ბეგ აბაშიძემ (თეატრი და ცხოვრება, №11, 1916).

1921 წლის მარტში ნოე უორდანიას პირადად ეახლა ნადეჟდა ბახტაძე-შერვაშიძეს და შესთავაზა ბავშვებთან ერთად ემიგრაციაში წასვლა. ეს ერთის მხრივ გამართლებულიც იყო, რადგანაც “მენშევიკის” ოჯახს დიდი რეპრესიები ელოდა. ეს თავად ცუც-ამაც კარგად იცოდა, მაგრამ დარჩენა აიჯობინა, ხოლო საქართველოს პრეზიდენტს მორიდებით ამცნო:

- ბავშვები სამშობლოში, მამისეულ ოჯახში უნდა გაგზარდო.

პირველ ხანებში ოჯახი არც შეუწუხებიათ. სამიშროება მოსალოდნელი იყო 1924 წლის აჯანყების მზადების დროს, მაგრამ მაზღების, ზეჟერიას და რეშიტის გონივრული მოქმედებით ყადირის ოჯახი ამ ტალღასაც გადაურჩა. შერვაშიძეებმა გააფრთხილეს აჯანყების ყველა მონაწილე საჭიროების შემთხვევაში კავშირი ჰქონოდათ ამ გვარის სხვა ოჯახებთან, ხოლო ცუცას ოჯახს არ მიკარებოდნენ.

როგორც ზემოთ აღვნიშნეთ, ყადირთან ერთად სწავლობდა თავადი გიორგი (გოგლიკა) შერვაშიძე. მას ცოლად პყავდა მოსკოვის გუბერნატორის ქალი ზოია (სამწუხაროდ ქალბატონმა გულიკომ მისი გვარი ვერ გაიხსენა). ზოიაც ექიმის იყო, მუშაობდა ფტიზიატრიაში. 1927 წელს ბათუმში სატარებულა ფტიზიატრთა კონფერენცია, რომელსაც მოსკოვიდან და თბილისიდან 30 სტუმარი ესწრებოდა. ცუცა ზოიასაც იცნობდა, ამიტომ ყველა სტუმარი სახლში დაპატიჟა და საკადრისადაც გაუმასპინძლდა.

ცუცა მართლაც გადაეგო შეილები ალზრდას. მან თავისი პროფესიით სტომატოლოგად მუშაობაზეც კი უარი განაცხადა, ოღონდაც გოგონები ღირსეულ მანდილოსნებად გაეზარდა. ეს მართლაც ასე მოხდა. ორივემ შესანიშნავი ოჯახები შექმნა. გულიკო ცოლად გაყვა საქართველოში ცნობილ მეცნიერს და მჭევრმეტყველს, პროფესორ ნიკოლოზ კანდელაკს (1907-1965). მისი თანამედროვე და ოჯახის მგობარი ყლიზბარ ცისკარიშვილი მოგვიანებით იტყვის: “ნიკოლოზ კანდელაკს ერთი ადამიანური სისუსტე ჰქონდა - ეს იყო რაღაც განსაკუთრებული სიყვარული ქალაქ ბათუმისა და ბათუმელებისა. მე შევხვდი მას ბათუმში. 1960 წელს, შესანიშნავი ექიმის ალექსანდრე ლორიას ოჯახში, სადილზე. ასე გახარებული, გაბრწყინებული სახით კოლია არ მენახა. მისი



ცუცა ბახტაძე შერვაშიძე და...

ქცევა, მისი ყოველი სიტყვა მოწმობდა, რომ იგი ბედნიერი იყო. შემდეგ ბათუმში სეირნობისას ყოველ ქუნასა და კუთხე-კუნჭულს თავისებურად ეფერებოდა“ (გაზ. საქართველოს რესპუბლიკა, №163, 15 ივლისი, 1997 წ. გვ. 4). ავტორი არ ასახელებს მთავარ მიზეზს. სკენი აზრით, ბათუმისადმი ბატონი ნიკოლოზის განსაკუთრებული სიყვარული იმითაც იყო გამოწვეული, რომ აქ დაიბადა და აღიზარდა მისი ცხოვრების მუდმივი თანამგზავრი, ერთგული მეგობარი და მეუღლე, ქალბატონი გული შერვაშიძე.

გულიკოს და ნიკოლოზის ერთად-ერთი ვაჟი რამაზი ასევე საქართველოში ცნობილი ინტელიგენტია. იგი ახლა ბეჭდვითი სიტყვის დეპარტამენტში თავმჯდომარის მოადგილედ მუშაობს და დიდი წვლილი შეაქვს დამოუკიდებელი საქართველოს მშენებელთა სულიერ აღზრდაში. რამაზის და მათ გოგოლაძის შვილი ბაკურ



ყადორ შერვაშიძის მემორიალური დაფის გახსნა ჰუმკინის ქ. №78 სახლთან, დაბაღებიდან 80 წელთან დაკავშირებით; პირველ რიგში მარცხნიდან: აკაკი ბერიძე, ვახტანგ დიასაძიძე, ვიორჯი ხუჩინაშვილი, ვუელიკო შერვაშიძე, რამაზ სურმანიძე, ნელი შერვაშიძე, ოთარ ბზიკაძე, თამარ დობორჯგინიძე, ელენე ნიკოლაევა, ნათესაევი ბი. ლეკუშვილი, 1977 წ.

კანდელაკი თავისი დიდი წინაპრების ყადორ შერვაშიძისა და ნიკოლოზ კანდელაკის ღირსეული მემკვიდრეა. მან და მისმა მეუღლემ თამარ ქავთარაძემ ნამდვილად აჯობეს მშობლებს და ოჯახს ორი ვაჟკაცი მიხეილი და ნიკოლოზი შესძინეს.

ასევე შესანიშნავი ოჯახი დატოვა ნელიმაც. იგი სიცოცხლის ბოლო წლებამდე მუშაობდა აჭარის ჯანდაცვის სისტემაში და სულ ახლახან 1997 წლის მაისში გარდაიცვალა. ნელის შვილი თამაზ ძიმიშვილი, მოსკოვში ცნობილი ბიზნესმენი, უირმა “ქველი არბატის ზღაპრების“ დირექტორი, მეცენატი და ქველმოქმედი. იგი დიდ დახმარებას უწევს სამშობლოში მცხოვრებ

ხელმოკლე თანამემამულეებს, სტუდენტებსა და ავადმყოფებს. მოსკოვის ქართულ სათვისტომოში თამაზ ძიძიშვილს ერთ-ერთი ღირსეული ადგილი უკავია. მეუღლე გალინა სურავლიოვა ქართულ ყაიდაზე მოქცეული მშვენიერი რუსი მანდილოსანია. თამაზის ორი შვილი, ქალ-ვაჟი გიორგი და ნატალია ჰყავს, ისინიც მამის კვალს მისდევენ და დარწმუნებული ვართ ბევრ სასიკეთო საქმეს გააკეთებენ სამშობლოსა და ქართველი ხალხის საკეთილდღეოდ. ასეთია საქართველოში გამოჩენილი გვარის ერთი შტოს შერვაშიძეთა დიდებული ოჯახის ისტორია.

ბოლოთქმა

ყადირ შერვაშიძის დამსახურება დიდხანს საერთოდ მივიწყებული იყო. მის შესახებ მასალების შეგროვება ჩვენ დავიწყეთ 1963 წელს, როცა საქართველოს დამოუკიდებლობისათვის მებრძოლ პატრიოტთა ბიოგრაფიების გამოკვეყნებაზე ჯერ კიდევ ტაბუ იყო დადებული. ჩემს მიერ შეგროვებული მასალები ოთხი წელი უძრავად იყო, ვერც ერთმა რედაქციამ ვერ გაბედა მათი გამომხეურება, მაგრამ გამონდა ჭეშმარიტი ქართველი, გამბედავი და შეუპოვარი რედაქტორი რუბენ სირაძე. მან გადალახა ყველა ბარიერი და ყადირის დაბადებიდან 80 წლისთავზე, გარდაცვალებიდან 48 წლის შემდეგ, პირველად გამოაქვეყნა ჩვენი წერილი “პირველი ექიმი, პატრიოტი” (“საბჭოთა აჭარა“, №98, 21 მაისი, 1967, წ., გვ. 4), მის ფოტოსურათთან ერთად. რამდენიმე ფრაზა რედაქციამ იმ დროის მოთხოვნების კვალობაზე გადააკეთა, მაგრამ ამას უნდა შევრიგებოდით, რადგანაც ამის გარეშე წერილის დაბეჭდვა გამორიცხული იყო. თუმცა ამ “გადაკეთებამ” სულაც ვერ შეუშალა ხელი იმ დიდ გამომხეურებას, რომელსაც ვღებულობთ წერილობითაც და ზეპირი მონათხრობის სახითაც. ყოველივე ეს ორი წლის შემდეგ შევიტანე წიგნში “დაუვიწყარი სახეები” (ბათუმი, 1969).

1970 წელს სპეციალურად ვიმოგზაურე ესტონეთში. მოვიინახულე ტარტუს სახელგანთქმული და ერთ-ერთი უძველესი უნი-

ვერსიტეტი. ჩემი იქაური მეგობრების ვიქტორ კალნინის და სერგეი ისაკოვის დახმარებით ვნახე სახლი, სადაც ცხოვრობდნენ ყადირ შერვაშიძე და მისი მეუღლე ნადეჟდა ბახტაძე. ასევე მივაკვლიე ორ სახლს (კინგისეპის და იულიკოლის ქუჩებზე), სადაც 1910-1914 წლებში, ტარტუში ყადირ შერვაშიძის ყოფნის პერიოდში, მოთავსებული იყო ქართველთა სათვისტომო. რაც მთავარია შევძელი არქივიდან ამომეღო ყადირ შერვაშიძის პირადი საქმე და მრავალი ფოტოსურათი.

1982 წელს, დაბადებიდან 95 წლისთავზე ჩემი ინიციატივით მემორიალური დაფა გაუკეთდა ბათუმში პუშკინის ქუჩაზე მდებარე №78 სახლს, სადაც 1897 - 1905 წლებში ცხოვრობდა ყადირ შერვაშიძე. იმავე დღეს ბათუმის საქალაქო საბჭოს წინაშე დაისვა საკითხი ქალაქის ერთ-ერთი ქუჩისათვის ყადირ შერვაშიძის სახელის მიკუთვნებაზე. ამის შესახებ იყო მრავალი მსჯელობა, თითქოს ყველაფერი კიდევ გადაწყდა, მაგრამ ფაქტობრივად ჯერჯერობით იგი სისრულეში არ არის მოყვანილი.

სახელოვანი მამულიშვილის დამსახურების დასაფასებლად სამწუხაროდ არც ჩვენს დროში გაისარჯნენ. 1987 წელს არავის გახსენებია ყადირ შერვაშიძის დაბადებიდან 100 წლისთავი. ამ სტრასტონების ავტორი მაშინ პარტიაშვილის პროვინციული მთავრობა - ხროვის მიერ სრულიად უდანაშაულოდ იყო პარტიკაყრილი, მისი ნაწერების გამოქვეყნება არაოფიციალურად აკრძალული. ამიტომ ცნობილი პიროვნების ღვაწლის წარმონეწაზე მას ხელი აღარ მიუწვდებოდა.

მიმანია, რომ ყადირის სახელი, მისი დიდი ღვაწლი და დამსახურება დღესაც არ არის სათანადოდ დაფასებული. ეს საყვედური განსაკუთრებით ეხება ჩვენს დედაქალაქს, თბილისს, სადაც თუ მხედველობაში არ მივიღებთ “ლიტერატურულ საქართველოში“ გამოქვეყნებულ ჩვენს ზემოთქმულ წერილს, ყადირ შერვაშიძეზე, როგორც დამოუკიდებელი საქართველოს დამფუძნებელი კრების წევრზე და თვდადებულ მამულიშვილზე დღემდე მნიშვნელოვანი არაფერი გამოქვეყნებულა (ერთად-ერთი გამოწაკლისია აბ.სურგულაძის წიგნი) და მისი ბიოგრაფია ფაქტობრივად აჭარის ფარგლებს არ გასცილებია.

არ შემიძლია არ დავეთანხმო ჩემს მეგობარსა და თანამოქალაქს, ბატონ აბელ სურგულაძეს და მოლიანად არ გავიზიარო მისი გულისტკივილი, რომელიც თავის წიგნში გამოთქვა: “რაოდენ დასანანია, რომ ყადირ შერვაშიძის განსასვენებელი დღესაც არაა სათანადოდ მოვლილ-მოწყობილი. თუ გავითვალისწინებთ იმ საგალალო ფაქტს, რომ წმიდა თამარის ორდენის ერთი კავალერის მემედ აბაშიძის სავანე საერთოდ უცნობია ჩვენი ხალხისათვის, მაშინ შეუწყნარებელია ქედულების უყურადღებობა თავიანთი დიდი შეილისადმი. სახელოვანი წინაპრისადმი გულგრილობას ვერც შერვაშიძეებს მოვუწონებთ“. “მსოფლიო ინტერნაციონალისტები“ 70 წლის განმავლობაში კი ცდილობდნენ დაგვევიწყებინა პატივისცემა ეროვნული გმირებისადმი, მაგრამ დღეს მაინც ნუ ვიქნებით უმადური იმ ადამიანისადმი, ვინც საქართველოს თავისუფლებისა და ერთიანობისათვის ბრძოლის ცეცხლში დაიფერულა. ეროვნულ მოღვაწეთა პანთეონს (ჩვენს ისტორიასაც) ჭეშმარიტად უნდა ამშვენებდეს თამარ მეფის ორდენის რაინდის, სახელოვანი ყადირ შერვაშიძის სახელი“ (გვ. 46, 47). როგორც იტყვიან, კომენტარები და თავის მართლება ზედმეტია.



A. CHIAFFANJON. Petit Gotha illustré. 1908, p. 442.




თუფან-ბეკ შერვაშიძე (ლეგალი). 1987 წ.



თუფან-ბეგ შერვაშიძე შეილებთან და ნათესავეებთან
სხედან: ყადირი, თუფან-ბეგი, მისი ცოლისძმისშვილი ხუსეინ
ავალიანი

დგანან: გეჭერია, რეშიგი, თუფან-ბეგის მსახური მუსგაფა
(თურქი), ქამილი, თუფან-ბეგის ძმის მაჰმუდის შვილი თემური.
1897 წელი



ბათუმის ვაჟთა გიმნაზია. 1900 წ.

31 августа 1905г.
за № 1051

СРОЧНАЯ ВЕДОМОСТЬ

об успехах, внимании, прилежании и поведении ученика пятого класса Батумской его императорского высочества великого князя Цихаила Николаевича гимназии Шервашидзе Кадыр-Оглы за 1904/5 у/г.

Сроки	Успехи													Проп. XBB							
	Язык Божий Логика	Русский язык	Латинский язык	Греческий язык	Арифметика	Алгебра	Геометрия	Тригонометрия	ученика	Космография	История	География	Французский язык		Немецкий язык	Истописание	Рисование	Чтение	Прилежание	Поведение	По причине уваж.
1-я	-	-	3	3	-	-	4	4	-	-	-	3	3	2	3	-	-	3	3	5	
2-я	-	-	3	4	-	-	4	4	-	-	-	3	3	2	3	-	-	3	3	5	
3-я																					
4-я	-	-	3	3	-	2	2	-	-	-	-	3	3	2	3	-	-	-	-	5	
Годовая отметка	-	-	3	3	-	3	2	2	-	-	-	3	3	2	3	-	-	-	-	-	Замечания:
На Письм.																					I. Обучался
испытания	Устным	-	-	-	-	-	3	3	-	-	-	-	-	3	-	-	-	-	-	-	2 года в классах:
Еополн.																					В приготовиле
Общая отметка	-	-	-	-	-	-	3	3	-	-	-	-	-	3	-	-	-	-	-	-	льном два года
Постановление Педагогического Совета	Переводится в пятый класс																			в первом году	
																				да и две года	
																				четверток: два	

М.П.


Директор

подпись


Замечание: Заполняются цифры только тех четвертей учебного года, в течение которых ученик находился в заведении.

ЦГА ГССР в г.Тбилиси, ф.441, оп.1, д.1785, л.63.

Верно: *Шервашидзе*



თბილისის გიმნაზია



ყადირ შერვაშიძის 1909 წელს გადაღებული ფოტოს მეორე კვერღზე

საქართველოს სსრ მინისტრთა საბჭოსთან
კავშირებული საარქივო სამსახურელი
სამმართველოს სსრ
ცენტრალური სახელმწიფო
არქივი
თბილისში

მისამართი ქ. ლ. შ. ტყე 3-18-ბ. 9-04-65

Архивное управление при Совете Министров
Грузинской ССР
ЦЕНТРАЛЬНЫЙ ГОСУДАРСТВЕННЫЙ
АРХИВ
Грузинской ССР в г. Тбилиси
ул. Ленина № 36. тел. 3-18-80, 9-04-65



462

8 - 20.12.1967 წ.

საარქივო ცნობა

Архивная справка

აშხ. რამაზ სურგანიძეს

ბათუმში, ჯაფარიძის 25, ოთახი 15

საქ. სსრ ცენტრალური სახელმწიფო არქივი გაყვნიდა, რომ ყაფიერ მურვამაძე
ძესთან 1909 წ. თბილისის პირველი უაწყობა გიმნაზია რააშაყურეს მეტეფტმა პი-
რებმა : გივიმცრელი ნიკოლოზ, ჯარუმიძე პეტრე, ჩიქოვანი მიხეილ, მურვამაძე
ყაფიერ და გაიბოვი ალი-ბეგი.

ამასთანავე გაყვნიდა-რანაყვნილი მასალები ყაფიერ მურვამაძის შესახებ
არქივში არ ინახება.

საშუამდგომლობა: 9. 441, საქ. 1334, ფურ. 92.

საქ. სსრ, ცენტრალური არქივის


პირველი:


მეორე:

/ა. ივნიძე/

/ბ. დეზანაძე/

გარეუხ უნივერსიტეტი
1912 წ.





სახლი იედნოვს ქ. № 30-ში, სადაც 1914 წელს მოთავსებული იყო ბარტუქ ქართველი
საოქცემო

Иванъ Пыфановъ Шербанузе

ქადირ ბ. შერვაშიძე

Вамъ.нз.

Диагностикою П. З. П.

სრულიად რუსეთის ერთობის კავშირის რწმუნებულის ყადირ თუფანის ძე შერვაშიძის
საკემიტი ბარათი

Handwritten text in Georgian script, appearing to be a list or account. The text is arranged in several lines, with some characters appearing to be numbers or specific symbols. The handwriting is cursive and somewhat difficult to decipher due to the image quality.

Handwritten text in Georgian script, continuing the list or account from the upper section. The text is arranged in several lines, with some characters appearing to be numbers or specific symbols. The handwriting is cursive and somewhat difficult to decipher due to the image quality.

ცხცა ბახტაძის სახელზე გამოგზავნილი ყადირის წერილი ,
შესრულებული საველე ჰოსპიტლის ეზოში გადაღებული კოლექტიური
ფოტოსურათის მეორე გვერდზე
საკარაულო თარიღი 1915 წ. 20 დეკემბერი

ЗАКАВКАЗСКИЙ БАНКЪ

РАСЧЕТНАЯ КНИЖКА

ТЕКУЩИЙ СЧЕТЪ

Шербатиди К. Ш.

18654

№ 32—3000

ყადირ შერვაშიძის სახელზე 1918 წლის 1 ივლისს გაცემული
სალაროს წიგნაკის გარეკანი



ჯადი ბეჭედი

საქართველოში ქართული საბავშვო, რომელიც
საკანონმდებლო ორგანოს მიერ დაარსდა, ქართული
წიგნების დასახელებების ჩამოთვლა უკლებლივ
საქართველოს იუსტიციის მინისტრის განკარგულებაშია
საქართველოს იუსტიციის მინისტრის განკარგულებაშია
საქართველო



Handwritten text or signature, possibly a date or name, next to the seal.

განკარგულებულია 1938 წლის
11 თვის 11-ს

ქართველთა ლეგიონის სამახსოვრო ნიშნით (თამარ მეფის
ორღენით) ჯადი ბეჭედი დაჯილდოების სიგელი



მემედ-ბეკ აბაშიძე

Милостивая Государыня,
Надежда Владимировна!

Переживая боль при смене обстоятельств вы-
дания мне Батумским областным враземь
30 марта 1918 года за № 565 436 когдо устано-
вливается, что за земелью мою принадлежи-
кую большинству с 1-го марта 1916 года во
м. Кедзи Квартиры земли мне не уло-
жены, настоящею добротности прошу
и уполномоченного Вася получить от кон
и откуда сие совете будет причита.
Южился мне с 1 марта 1916 года по
1-е апреля 1918 года земли и в попутания
тасковых расписания. В случае надобности
пожалеть приехать, явиться и издать
получать справки, копии, удостоверения и
иные документы, расписываться тут котор
будет и исполнит все сопряженные с
поручением Вася землем формальности.
Всему, что Вы по сей добротности
законно получите, я Вами верб. спорится
и претворять не буду. Добротности
эта дана Надеждо Владимировне Шервашидзе
Батумский нотариус Шервашидзе 1918 год
ПРИСКИЙ КИ 25 849

გეგერია შერვაშიძის მინდობილობა ნადეჟდა ბახგაძისადმი,
რათა მან მართოს ქელამი კუთვნილი სახლის ვაჭირაეების
საქმეები



ყადირ შერვაშიძის შვილიშვილი რამაზ კანდელაკი,
თამაზ ძიძიშვილი

1982 წ.

მემორიალის გახსნის დღე
ბათუმი, პუშკინის ქ. № 78

შინაარსი

ავტორისაგან	2
გვარის ისტორია	3
თუფან-ბეგი	15
ყადირ-ბეგ შერვაშიძე, ბავშვობა	22
ბათუმის გიმნაზიაში	23
თბილისის გიმნაზიაში	26
უნივერსიტეტში	27
სტუდენტთა სათვისტომო	31
ქორწინება	37
სამხედრო სამსახური	39
ბათუმში	41
ბრძოლა საქართველოს ერთიანობისათვის	43
განმათავისუფლებელი კომიტეტის რწმუნებული ახალციხეში	46
ვინ იყო სერვერ-ბეგ ათაბაგი?	46
ვინ იყო ბახში-ბეგ მაჩაბელი?	50
მონოღება მუსლიმან ქართველებისადმი	55
ცხენოსანთა დივიზიის მეთაური	57
გერმანიაში	60
ჯილდო	65
კვლავ ახალციხეში	69
გარდაცვალება	70
ყადირის შემდეგ	73
ბოლოქმა	78
დოკუმენტები, ფოტოები	81
აქარელ შერვაშიძეთა გენეალოგიური ხე (ყადირ შერვაშიძის შტო)	100

**სააქციო საზოგადოება “პირველი სტამბა“
თბილისი, ჩუბინაშვილის ქ. №50**

რამაზ სურმანიძის წიგნში, „მადრი შერკაშიძე“ გეგმურად შეკლომების გასწორება

გვ.	სტრიქონი	დაბეჭდილია	უნდა იქნას
3	11-12 ზემოდას	სიყვითლე ანთით შერკაშიძე მხოლოდ მსრავალია იდენტურია	-
4	2 ზემოდას	- კლდექცია	საქართველო
11	16 ზემოდას	გაეხსენეთ	გაეხსენეთ
16	17 ქვემოდას	მსოფლიო	მსოფლიო
26	2 ზემოდას	ადავსიკოსი	ადავსიკოსი
	9 ზემოდას	ამ რის	ამ რის
28	15 ზემოდას	მომხდელი	მომხდელი
	13 ქვემოდას	გეგმვა	გეგმვა
29	18 ქვემოდას	საქვეყნობდა	საქვეყნობდა
33	9 ზემოდას	სამედიცინო	სამედიცინო
37	5 ზემოდას	ამოიერება	ამოიერება
	10 ზემოდას	ამოიერება	ამოიერება
38	13 ზემოდას	პარტიკულური ქართული ქალი	პარტიკულური ქალი
42	4 ზემოდას	შეხვედრის	შეხვედრის
43	2 ქვემოდას	საქართველოს	საქართველოს
	8 ქვემოდას	თურქული ენა	თურქული ენა
45	12 ქვემოდას	ეკონომიკით	ეკონომიკით
52	8 ზემოდას	ბანსიკე	ბანსიკე
63	5-7 ქვემოდას	როგორც უთქვით, „სამედიცინო საქართველოს განვითარების უწყვეტ პროცესს“ თავისი წევრები ყაღირ შერკაშიძე და ზია აბაშიძე ბერლინში გაგზავნა, რის შესახებაც ცნობას	„სამედიცინო საქართველოს განვითარების უწყვეტ პროცესს“ წევრების ყაღირ შერკაშიძე და ზია აბაშიძის ბერლინში გაგზავნა ცნობას
65	9 ქვემოდას	შერკაშიძისათვის	შერკაშიძისათვის
66	10 ქვემოდას	ადამსწავლი	ადამსწავლი
77	2 ზემოდას	80 წელთან	95 წელთან
	6 ზემოდას	1977 წ.	1982 წ.
82		1987 წ.	1997 წ.
91		ეროვნის	ეროვნის